

SAN MATEO

Jesucristo a'ajútaya michuna yukuna marí

(Lc. 3.23-38)

1 ¹Mariruna i'imaño Jesucristo a'ajútaya michuna i'imaká. David michú, Abraham michú, kele lakénami nakiyana ri'imaká.

²Abraham i'imari Isaac jara'apá, eyá Isaac i'imari Jacob jara'apá. Jacob i'imari Judá jara'apá, eyá re kaja ajopana rejena i'imaño. ³Eyá Judá i'imari Fares, Zérah, kele jara'apá. Naló íí i'imari Tamar. Fares i'imari Hesrón jara'apá, eyá Hesrón i'imari Aram jara'apá. ⁴Aram i'imari Aminadab jara'apá, eyá Aminadab i'imari Nahasón jara'apá. Nahasón i'imari Salmón jara'apá. ⁵Eyá Salmón i'imari Booz jara'apá. Booz jaló i'imayo Rahab. Eyá Booz i'imari Obed jara'apá. Rut i'imayo raló. Eyá Obed i'imari Jesé jara'apá. ⁶Eyá Jesé i'imari ne'emakana David jara'apá. Urías yajalo wa'até riwá'ako i'imaká. Rujwa'até ri'irí Salomón i'imaká.

⁷Salomón i'imari Roboam jara'apá. Eyá Roboam i'imari Abías jara'apá. Abías i'imari Asá jara'apá. ⁸Eyá Asá i'imari Josafat jara'apá. Eyá Josafat i'imari Joram jara'apá. Eyá Joram i'imari Ozías jara'apá. ⁹Ozías i'imari Jotam jara'apá. Jotam i'imari Acab jara'apá. Eyá Acab i'imari Ezequías jara'apá. ¹⁰Ezequías i'imari Manasés jara'apá. Eyá Manasés i'imari Amón jara'apá. Eyá Amón i'imari Josías jara'apá. ¹¹Josías i'imari Jeconías jara'apá, eyá ajopana rijmerénami chuna jara'apá kaja ri'imaká. Riwakajé nawa'a Israel lakénami nate'eré nakiyá Babilonia te'eré ejo, nachá'atakale ne'emaká nókakajo aú. Raú nawa'a ne'emaká rejo, najápakaloje najló mapeja. Re Josías yaní motho'oño i'imaká.

¹²Napa'akó nate'eré ejo ee, mariruna motho'oño piño i'imaká: Jeconías i'imari Salatiel jara'apá. Eyá Salatiel i'imari Zarobabel jara'apá. ¹³Zorobabel i'imari Abihud jara'apá. Eyá Abihud i'imari Eliaquim jara'apá. Eyá Eliaquim i'imari Azor jara'apá. ¹⁴Azor i'imari Sadoc jara'apá. Eyá Sadoc i'imari Aquim jara'apá. Eyá

Aquim i'imari Eliud jara'apá. ¹⁵Eyá Eliud i'imari Eleazar jara'apá. Eleazar i'imari Matán jara'apá. Eyá Matán i'imari Jacob jara'apá. ¹⁶Eyá Jacob i'imari José jara'apá. Riká José wá'akaro María wa'até i'imaká. Jesús jaló ru'umaká. Ina'uké i'imatájeri penaje ri'imaká.

¹⁷Abraham michú lakénami yuriño rapumí chojé, a'ajná David i'imaká ejená. Pa'u kele iphata ji'imaji nakoje kele (14) na'ajútaya michuna wani i'imaká. David michú apumí chojena i'imaño kaja pa'u kele iphata ji'imaji nakoje kele (14), nawa'a ne'emaká Babilonia te'eré nakoje. Rejomi ne'emá piño pa'u kele iphata ji'imaji nakoje kele (14) Jesucristo motho'oká ejená.

Jesucristo motho'oká yukuna marí

(Lc 2.1-7)

¹⁸Marí ke Jesucristo motho'oká i'imaká: José pura'aró paineko María, Jesús jaló penájeru i'imajíkayo wa'até, nawá'akakoloje pajwa'atéchaka penaje. E'iyonaja unká chiyó ne'emá pajwa'atéchaka, rumano'ó, Tupana Pechu makápo'okale Ri'irí rowó chojé. Raú ruyuró kanupá. ¹⁹Palájne'eke ruyajná penaje José i'imaká, raú unká riwátala ajopana ina'ukena we'epika rumano'oká, nala'aká piyá ruká chapú rijimaje. Raú rimicho'ojnoja riwátaka ruyuríkana, kanupá ru'umakale; unká riwátala runaku apáña'atakana. ²⁰Ilé ke ri'ijnataka ripéchuwa runaku, e lapí ritapú pajluwaja Tupana wa'atéjeri, je'echú chiyaje, ya'ataró rijló. Riká kemari rijló:

—José, David michú lakemi, pipechu i'imaniña ujwí María wa'até wá'akakano nakú. Re ru'urí i'imajé, Tupana Pechu makápo'okale riká rowó chojé. ²¹Rimotho'ojika wakajé, pa'ajé rií Jesús, ke. Ilé ke rií i'imajika, ri'imatájikale rila'ejena ina'ukena kapichákajo liyá. Ripalamane unká Tupana wajálaje ra'apiyá jema'ajeño, pu'umaré nala'akare pachá.

²²Kaja ewaja riphá rená, Tupana kemakare nakú júpimi ke ripuráka'alo ja'apátajeri michujlo i'imaká chojé. Rimá rijló i'imaká:

²³“Pajluwájaru inaya i'imajeyo kanupá,
raú ru'urí i'imajé.

Nemaje rinaku Emanuel, ke. ‘Wajwa'até Tupana’, ke
kemakánaka ri'imajika”.

²⁴Rejéchami José apoka, e kaja rila'á Tupana wa'atéjeri, je'echú chiyaje, kemaká rijló ke. Ri'iwá'ako María wa'até. ²⁵Kanupá ru'umaká ketana, mapeja ri'imajika rowa'á, unká meke rila'aké ruká. Kaja waja ruwa'a ru'urí, paineko ru'urí i'imakare ri'imaká. E José a'á rií Jesús, ke. Rimotho'oká ejomi, raló, José wa'até, i'imaño pajwa'atéchaka kalúyuna ke.

Iwijrina nakú jewíña'ajeño iphaka Jerusalén ejo yukuna marí

2 ¹Jesús motho'orí pajimila Belén e i'imaká, Judea te'eré nakú. Riwakajé Herodes i'imakeri judíona wakára'ajeri. E ajopana ina'ukena iphaño Jerusalén ejo. Kamú jeño'oká ejo pitá eyá nephá. Iwijrina nakú jewíña'ajeño ne'emaká, ñakele nawe'epike kajrú nakaje nakojé. ²Nephaka ee, nemá najló:

—¿Mere chi kele judíona i'imakana penaje motho'orí maare? Wamá iwijrí pato'okó kamú jácho'oko ejo pitá i'imaká, raú wawe'epí rimotho'oká. Ñakele we'ejná majó ramaje, pu'ují wapechu i'imakáloje rinaku penaje.

³Rejomi ne'emá riyukuna ne'emakana Heródesjlo. Rema'aká riyukuna aú, ripechu kawíla'o rinakojé; ñaké kaja piyuke Jerusalén ewá i'imakaño pechu kawíla'ako rinakojé. ⁴Ilé kaje aú Herodes awakátari piyuke sacerdotena wakára'ajeño, Tupana puráka'alo nakú jewíña'atajeño wa'até, rikejá'akaloje naliyá riyukuna mékajeka pajimila nakú, Tupana wakára'ajikare ina'uké i'imatájeri penaje motho'ojé.

⁵Raú nemá rijló:

—Belén e, Judea te'eré nakú rimotho'ojé. Ñaké Tupana puráka'alo ja'apátajeri michú lana'aká riyukuna júpimi i'imaká:

⁶“Judá te'eré nakú pajimila Belén.

Apú pajimila chaje ri'imajika, reyaje ne'emakana penaje i'imajíkale.

Riká amájeri palá nule'ejena ina'ukena, Israel lakénami”, ke rilana'aká i'imaká.

⁷Ilé kaje aú Herodes wa'a rimicho'ojnoja iwijrina nakú jewíña'ajeño maná. Rimá najló:

—¿Na wakajé amá iwijrí pato'okó i'imaká?



Raú ne'emá riyukuna rijló palá. ⁸Rejomi riwakára'a neká Belén ejo, rimá najló:

—I'ijná rejo, eko ikeja'a palá kele to'ojmá yukuna. Iwe'epíjika palá méreka riká, inakuwá i'imichá nojló riyukuna, nu'ujnakáloje kaja nupéchuwa la'ajé pu'ují rijló.

⁹Ilé ke rimaká najló aú, ne'ejná rejo. Rejechéami riká iwijrí namákare penaje i'ijnaká piño natukumá ke. Kaja ewaja ritajno pukunaji, to'ojmá i'imakare chu chaje. ¹⁰Ilé ke namaka aú, pu'ují wani napechu la'akó. E kaja nephá rejo. ¹¹Namujlúka'a nañakaré chojé, amaño riká, raló María wa'até, raú najláma'o to'ojmá jimaje, nephákale ra'apí. Rejomi najme'etá napaúre chaya. Na'á rijló uwiru (oro), a'awaná iká pu'umé amarí, apú a'awaná iká, mirra rií i'imaká, riká kaje na'á rijló. ¹²Rejomi natapú Tupana kemari najló napa'akó piyá Herodes ewá.

Ilé kaje aú napa'ó apú iñe'epú chuwa nate'eré ejo. ¹³Iwijrina nakú jewíña'ajeño pa'akó i'imaká ejomi, Tupana wa'atéjeri, je'echú chiyaje, kemari ritapú Josejlo:

—Chuwa pácho'o maáreya. Piwa'a ilé to'ojmá, raló wa'até, maare eyá ají ke Egipto te'eré ejo. Re pi'imajé najwa'até, a'ajná numájika piño pijló ejená, Herodes wakára'ajikale rikulákana, nenókaloje riká penaje.

¹⁴Raú José jácho'oro reyá. Riká lapija riwa'a ilé to'ojmá, raló wa'até, ne'ejnakáloje ya'ajnaje Egipto te'eré ejo. ¹⁵Re ne'emá, a'ajná Herodes taka'aká i'imaká ejená. Ilé ke nakaje i'imaká najló, ri'imakáloje júpimi ke Tupana puráka'alo ja'apátajeri kemaká rinaku i'imaká chuwa. Rimá i'imaká: “Egipto eyá nócho'otaje piño nu'urí”, ke.

Herodes wakára'aka yuwaná nótakana yukuna marí

¹⁶Herodes we'epiri iwijrina nakú jewíña'ajeño pajlaka rijwa'até, unkale napa'aló piño riyukuna i'imajé rijló, ilé kaje aú kajrú wani riyúcha'ako. Raú riwakára'a piyuke yuwaná kapajareruna Belén e i'imakaño, rawa'á i'imakaño wa'ató, nótakana piyukeja.

Iwijrina nakú jewíña'ajeño kemaño rijló i'imaká, na wakajeka namá ilé iwijrí pato'okó i'imaká. Riká nakojé riwe'epí mékajenaka yuwaná kapichátakana, ñakele riwakára'a piyukeja nayani achiñana, iyamá jarechí kéchajena i'imakaño kapichátakana.

¹⁷Tupana puráka'alo ja'apátajeri Jeremías michú kemaká rinaku i'imaká, chojé riphá ñaké nenótakana aú. Riká lana'arí i'imaká:

¹⁸“Kajrú namájika chapú kaje yajwé nate'eré ewá.

Kajrú neyájika nayani michuna.

Raquel micholo lakénami iyájeño kajrú nayani michuna.

Unká na pala'atálaje napechu najló, namájikale kajrú wani chapú kaje yajwé, nakapichátajikale nayani”, ke rilana'aká i'imaká.

¹⁹Herodes taka'arí i'imaká, e'iyonaja re kaja jo'ó José i'imaká Egipto te'eré nakú. E pajluwa lapí José tapúna'ari. Ritapú ramá pajluwa Tupana wa'atéjeri, je'echú chiyaje, iphaka rinaku, riká kemari rijló: ²⁰“Chuwa pácho'o, piwa'a ilé to'ojmá, raló wa'até. Pipa'ó piño pite'eré Israel ejo, kaja wátaño kele to'ojmá nókana i'imaká taka'ató”, ke.

²¹Raú rácho'o reyá. Riwa'a rijwa'ató ilé to'ojmá, raló wa'até, rejomi napa'ó ají ke nate'eré Israel ejo. ²²Riwátajla riñakajela Judea ejo pa'akano, e'iyonaja nemá rijló: “Arquelao ne'emakana me'etení re”, ke. Herodes michú i'irimi ri'imaká, raú José kero'ó rejo pa'akano piyá. Kaja ritapú Tupana kemari rijló, ri'ijnaká piyá rejo, raú ripa'ó ají ke Galilea te'eré ejo. ²³E kaja nephá pajimila Nazaret ejo. Re Jesús tawá'aro i'imaká, re riñapá. Tupana puráka'alo ja'apátajeño michuna kemaká rinaku, keja ri'imaká. Nemá Jesús nakú: “Nazaret eyaje ri'imajika”.

Juan el Bautista iphaka Tupana yukuna i'imajé najló yukuna marí

(Mc 1.1-8; Lc 3.1-9, 15-17; Jn 1.19-28)

3 ¹Riwakajé Juan el Bautista iphari desierto chojé Tupana yukuna i'imajé Judea eyájenajlo. ²Rimaké najló: “Ipajno'otá ipéchuwa Tupana ejo, pu'uwaré ila'akare liyá. Yewicha riphaka rená chojé, Tupana i'imakáloje ina'uké wakára'ajeri penaje”.

³Júpimi ke Tupana puráka'alo ja'apátajeri Isaías michú lana'aká riyukuna ripiyá i'imaká, rimá:

“Nema'ajé pajluwaja ina'uké awíyo'oka desierto chu.

Rimaje ina'ukejlo: ‘Chuwa ipala'atá ipéchuwa palá wawakára'ajeri pe; ipajno'otá kaja ipéchuwa Tupana ejo, pu'uwaré ila'akare liyá’ ”.^a

⁴Camello chijnemi nakiyá la'akanami ra'arumaká i'imaká; eyá kamejeri ímami nakiyá la'akanami riwachaphila i'imaká; kaja'ayuna kaje, munumunú jalá kaje i'imakeri ra'ajné. ⁵Kajrú pajimila Jerusalén eyájena i'ijnajika Juan puráka'alo jema'ajé, ñaké kaja Judea te'eré e'iyowá i'imakaño, eyá juni Jordán awa'á

ñakajélaruna, keke i'ijnajika kaja rema'ajé. ⁶Ne'emajika ee pu'uwaré nala'ajíkare yukuna Tupánajlo, rila'aké bautizar neká juni Jordán jakojé.

⁷E Juan amari kajrú wani fariseo nakiyana, eyá saduceo nakiyana, keke iphaka rejé rinaku, rila'akáloje bautizar neká penaje. Riwe'epí pu'uwaré la'ajeño ne'emaká, raú rimaké najló: “¡Pajlákachina ta! ¡Kajrú wani Tupana wajájika pu'uwaré la'ajeño! ¿Na kemari ijló i'imajó riliyá, ke? ⁸Ila'á palá, iná we'epíkaloje raú kewaka kaja iyurika iliyó pu'uwaré la'akaná. ⁹Imaniña kaja inakuwá: ‘Abraham michú lakénami nakiyana weká, ñakele unká kapichájeño penájena kalé weká Tupana liyá’, ke, unká ñaké kalé ri'imajíkale ijló. Unká ri'imatálaje iká kapichákajo liyá raú. Riwátakela, rewíña'atajla marí jipa, ri'imakáloje Abraham michú lakénami penaje. ¹⁰Kaja puwe'ení wani me'etení peru, iná i'ikatákaloje raú pají mecharú i'imakare iná mená e'iyá, rimakára'ako ejomi, iná kára'atakaloje riká piyuke ra'apare wa'ató. Ñaké kaja Tupana wajájika pu'uwaré la'ajeño.

¹¹“Nuká la'arí ina'uké bautizar juni aú, raú ajopana we'epíkaloje kaja napajno'otaka napéchuwa Tupana ejo, pu'uwaré nala'akare liyá. Riká penaje nula'á bautizar neká. Eyá nopumí chojé apú iphaje, kajrú wani nuphákare ja'apí, nuchaje wani ri'imakale. Riká a'ajeri ra'apiyá jema'ajeñojlo Tupana Pechu. Riwanaje kaja pu'uwaré la'ajeño eja'awá tajnájiko wakajé. ¹²Nopumí chojé iphájika la'ajeri trigo a'arú ka'ajeño la'aká



ke. Te'erí ichajona kaje aú nácho'ota riká trigo icha ijí, karená apho'okáloje ra'arumi re'iyayá. Rejomí paminá lamá'ata richa ijí riñakarelana chojé, eyá ra'arumi rikupá kera'athani unká yakálare chojé. Ilé ke kaja nopumí chojé iphájikare la'ajika", ke Juan kemaká najló.

Juan la'aká bautizar Jesús yukuna marí

(Mc 1.9-11; Lc 3.21-22)

¹³E kaja Jesús jácho'oro Galilea te'eré eyá, ri'ijnakáloje juni Jordán ejo, re Juan la'akáloje riká bautizar penaje.

¹⁴E'iyonaja ijnú Juan wátaka rila'akana bautizar, ñakele rimá rijló:

—Piká paja la'arijla nuká bautizar. Eta, ¿naje pi'ijná majó nuchaje, nula'akáloje piká bautizar?

¹⁵Raú Jesús kemari rijló:

—Ri'imaláreja numaká pijló ke: Pila'á nuká bautizar, palani wala'aká nakaje Tupana wakára'aka ke.

¹⁶Raú rila'aká bautizar riká ejomi, Jesús jácho'oro junápiya, wa'ató ke je'echú me'etako. Riká chiyá ramá Tupana Pechu witúka'aka ají ke majó. Túku'uchi witúka'aka nakaje nakojé, ke riwitúka'aka rinakojé. ¹⁷Rejéchami nema'aká Tupana kemaká rijló je'echú chiyá: "Marí Nu'urí, íki'ija nuwátakare, pu'ují wani nupechu rinaku".

Jiñá Chi'inárikana ka'átakajla Jesús e'iyajé rema'akáloje ra'apiyá penaje, yukuna marí

(Mc 1.12-13; Lc 4.1-13)

4 ¹Juan la'aká bautizar Jesús i'imaká ejomi, Tupana Pechu wá'ari riká ají ke desierto ejo, re Jiñá Chi'inárikana ka'átakaloje re'iyajé penaje. ²Re ri'imá iyamá ina'ukena le'ejé ke (40) kala ketana. Naketana unká rajñala ra'ajnewá, raú kewí wani me'epijí i'imaká rijló. ³Rejéchami Jiñá Chi'inárikana iphaka Jesús nakú, rika'átakaloje re'iyajé, rila'akáloje pu'uaré penaje, e rimá rijló:

—Kewaka Tupana i'irí pi'imajika ee, piwakára'a marí jipa jewíña'ako a'ajnejí penaje.

⁴Raú Jesús kemari rijló:

—Tupana puráka'alo lana'akéjami kemari: "Unká a'ajnejí palamane aú ja kalé iná i'imajla. Piyukeja Tupana puráka'alo ja'apiyá jema'akana aú iná i'imá kaja". ⁵Rejomí Jiñá Chi'inárikana

wá'ari riká pajimila Jerusalén ejo. Re ri'ijratá riká yenoje Tupana ñakaré ji'iwátaje, ⁶reyá a'ajemi rimá rijló:

—Kewaka Tupana i'irí pi'imajika ee, peño'ó maáreya kawakaje te'erí e'iyajé. Tupana i'irí pi'imajika ee, unká meke pila'alajo, kaja Ripuráka'alo lana'akéjami kemá pinaku:

“Tupana wakára'ajeri rijwa'atéjena, je'echú chiyájena, a'aká nanakojó piká.

Neká patajeño piká, pa'akó piyá kaphí wani jipa nakojé”.

⁷Raú Jesús kemari rijló:

—Re kaja Tupana puráka'alo lana'akéjami e'iyá kemari: “Pila'aniña apo'ojó wani nakaje, pamákalaje mékeka piwakára'ajeri Tupana a'aká piñathé raú”.

⁸E kaja penaje Jiñá Chi'inárikana wá'ari riká ají ke ipuré ji'iwátaje yenoje wani. Reyá a'ajemi riya'atá rijló piyuke ajopana te'eré, ajopana te'eré, ke; piyuke marí eja'awá chu i'imakaño ñakajela riya'atá rijló ipuré ji'iwátaya; piyuke nakaje, palá nojé re'iyá i'imakare wa'ató, riya'atá rijló. ⁹E rimá piño Jesusjlo:

—No'ojé pijló piyukeja nate'eré, pi'imakáloje nawakára'ajeri penaje, piphájika ee no'opí, pitára'ajiko ee pi'irúpachi aú nujimaje.

¹⁰Raú Jesús kemari rijló:

—Pa'apá nuliyá, Satanás, Tupana puráka'alo lana'akéjami kemari: “Tupana ja'apija kalé iná iphá, iná wakára'ajeri wani ri'imakale. Riká ja'apiyaja kalé iná jema'á”.

¹¹Ilé ke rimaká rijló aú, Jiñá Chi'inárikana ja'apá riliyá. Rejomi Tupana wa'atéjena, je'echú chiyájena, iphaño Jesús ñathé a'ajé.

Jesús keño'oká rijápaka'ala la'akana Galilea te'eré e yukuna marí

(Mc 1.14-15; Lc 4.14-15)

¹²Jesús jema'arí naka'aká Juan ina'uké wajákelana chojé yukuna, raú ri'ijná ají ke Galilea te'eré ejo. ¹³Unká riyurilo Nazaret e i'imaká. Reyá ranúka'o pajimila Cafarnaúm ejo. Zabulón, eyá Neftalí, kele te'eré awa'á ri'imaká. ¹⁴Tupana puráka'alo ja'apátajeri Isaías michú kemaká júpimi rinaku i'imaká, keja ri'imaká. Riká lana'arí i'imaká:

¹⁵“Zabulón, eyá Neftalí, kele te'eré juni Jordán pa'anojo pitá, juni jalomi turená awa'á Galilea te'eré. Re kajrú ina'ukena rewá, unká judíona kalé i'imakaño.

¹⁶Ina'ukena, unká we'epílaño Tupana nakojé i'imaká, kalajeruni chu i'imakaño keja neká, amaño chuwa mejáma'atani, nawe'epíkale rinakojé.

Kapichájeño penájena ne'emaká, jema'año chuwa ne'ematajeri yukuna”, ke rilana'aká riyukuna i'imaká.

¹⁷Rejéchami Jesús keño'oká Tupana yukuna i'imakana najló rewá. Rimaké najló: “Chuwa ipajno'otá ipéchuwa pu'uwaré ila'akare liyá Tupana ejo, yewicha riphaka rená chojé Tupánajlo, ri'imakáloje ina'uké nakiyana wakára'ajeri”.

Jesús kemari pa'u kele jiña jana'ajéñojlo, ne'ejnakáloje rijwa'até ra'apiyatéjena penaje. Riyukuna marí

(Mc 1.16-20; Lc 5.1-11)

¹⁸E kaja Jesús chira'aró ají kaéja Galilea turenawa, re ramá Simón Pedro, re'ewé Andrés wa'até. Jiña jana'ajeño wená chojé ne'emaká. Nawenare ka'akana junápeje nakú ne'emá, ejé riphá nanaku, rimá najló:

¹⁹—I'ijná nujwa'até. Jiña jana'akana ijápaka'ala, chuwa no'ojika ijlo apú jápakaje. Iwá'aje nojló ina'uké, ne'emakáloje no'opiyá jema'ajeño penaje.

²⁰Raú nayurí rejeja nawenare, i'ijnaño rijwa'até.

²¹E Jesús ja'apari piño reyá a'ajná ño'ojó kemachi, amari ajopana jana'ajeño: Santiago, re'ewé Juan wa'até, Zebedeo yaní ne'emaká. Nawapúrune chu ne'emá nawenare lamá'atakana nakú. Ramaka aú neká, rimá najló:

²²—I'ijná nujwa'até.

Raú nayurí nawapúrune nara'apá wa'até, e kaja ne'ejná rijwa'até.

Jesús jewíña'ataka kajrú ina'ukena Tupana nakú yukuna marí

(Lc 6.17-19)

²³Jesús ja'apari piyuke Galilea te'eré e'iyowá Tupana yukuna i'imakana nakú. Rewíña'atake neká nawakáka'alo ñakarelana chu; ri'imaké najló Tupana i'imatájika ina'uké kapichákajo liyá yukuna; ra'apátake kaja natámina liyá nayaripune ke'iyapejé.

²⁴Ilé ke rila'ajíkale rewá aú, kajrú riyukuna motho'oká Siria te'eré e'iyowá. E nawa'a richaje kajrú natámina. Kewini yajwé amájeño ne'emaká; ke'iyapejé nayaripune i'imaká; ne'iyajena nakú jiñana pechu kawíla'ake; ne'iyajénajlo nanapona kurúkakeri; eyá ne'iyajénajlo nanapona taka'akeri kamachá. Piyukeja ilé kajena riwakára'ake tejmo'otako natami kaje liyá

²⁵Kajrú ina'ukena Galilea eyájena, Decápolis eyájena, Jerusalén eyájena, eyá Judea te'eré eyájena, kajena i'ijnajika rijwa'até.

Juni Jordán pa'anajo pitá i'imakaño wa'ató i'ijnakeño kaja rijwa'até.

Jesús jewíña'ataka neká Tupana nakú yukuna marí

(Lc 6.20-23)

5 ¹Jesús amaka aú kajrú ina'ukena awakako rinakojé, rácho'o yenuri ji'iwátaje. Re riya'o, rejé ra'apiyatéjena awakako rinakojé.

²E rikeño'ó newíña'atakana marí ke:

³“Pu'ují péchuruna we'epiño pu'uwaré la'ajeñoka neká. Raú unká meke la'ajé nala'alajla palá nekó, raú nawata Tupana a'aká nañathé. Ilé ke péchuruna nanakuwá, i'imajeño Tupana yaní nakiyana.

⁴“Pu'ují péchuruna la'año kamu'ují napéchuwa, pu'uwaré nala'akare pachá, Tupana pala'atájikale napechu najló.

⁵“Pu'ují péchuruna, unká la'alaño nanakuwá we'epéjeño wani ke. Neká i'imajeño Tupana te'eré nakú rijwa'até, rimaká nanaku ke.

⁶“Pu'ují péchuruna, wechi wátakaño Tupana wátaka ke nakaje la'akana, riká a'ajíkale nañathé rila'akana aú.

⁷“Pu'ují péchuruna we'epiño ajopana mu'ují, ñaké kaja Tupana we'epíjika namu'ují.

⁸“Pu'ují péchuruna unká wátalaño pu'uwaré la'akaná. Neká amájeño Tupana.

⁹“Pu'ují

péchuruna wátano palá pajwa'atéchaka i'imakana. Nanaku Tupana kemaje: ‘Nuyani neká’, ke.

¹⁰“Pu'ují péchuruna amaño chapú kaje yajwé, Tupana wátaka ke la'akana jimaje. Neká i'imajeño ñakeja wani rijwa'até.

¹¹“Pu'ují

péchuruna, pu'uwaré napura'akárona nakú, napáña'atakaloje nanaku penaje. Nala'á



kaja ka'ajná iká chapú, jema'akale no'opiyá; napajlá ka'ajná mapeja inaku. ¹²E'iyonaja ipechu pu'ují, palá wani nakaje i'imajíkale ijló je'echú chu. Ñaké kaja nala'ajika a'ajútaya michuna nakiyana chapú, Tupana puráka'alo ja'apátajeño ne'emajíkale.

¹³“Yukira ke iká, no'opiyá jema'ajeño. Palani yukira, iná ka'akachu riká a'ajnejí e'iyajé, e'iyonaja rila'akochu uwi'ichí, unká méño'ojo iná la'alajla piño kajiparé riká rapumí chuwá piño. Palani rijláma'akanaja kalé te'erí e'iyajé, ina'uké payákatakalaje richá penaje.

¹⁴“Kamareji ke iká, no'opiyá jema'ajeño, marí eja'awá chu i'imakaño. Pu'uwaká iná amaka pajimila, yenuri jiiwata nakú i'imakare. ¹⁵Unká iná lukúna'ala iná kamaró, rejomi iná yá'atakaloje riká i'ichí láma'atakejami ja'apejé. Yenoje iná yá'ata riká, piyuke pají chu i'imakaño amákaloje rikamaré chojé palá. ¹⁶Ñakele iká, no'opiyá jema'ajeño, ila'á palá, ajopana amákaloje ila'aká palá no'opiyá jema'akana aú. Raú napura'ajó palá Tupana, je'echú chu i'imakare nakú”, ke Jesús jewíña'ataka neká.

Jesús jewíña'ataka neká Tupana puráka'alo, Moisés michú lana'akare i'imaká, nakú yukuna marí

¹⁷Jesús kemari piño najló: “Ipechu i'imaniña nunaku: ‘Riká ka'ajná kemájeri wajló, wema'aká piyá Tupana puráka'alo Moisés lana'akare, eyá ajopana Ripuráka'alo ja'apátajeño michuna, kele lana'akare i'imaká ja'apiyá, ke. Rimaje ka'ajná wajló, wema'aká piyá ra'apiyá’, ke ka'ajná ipechu nunaku. Unká ilé kaje penaje kalé nuphá majó i'imaká. Nakaje numakare nakú aú, iwe'epeje palá meke kemakánaka riká; nakaje nula'akare aú, iwe'epeje kaja rinakojé. ¹⁸Je'echú, marí te'erí wa'até i'imajika ketana, piyuke nakaje i'imajika Tupana puráka'alo, Moisés lana'akare i'imaká kemaká ke. ¹⁹Unká a'alá rinakojó rimaká ke la'akana piyukeja, eyá jewíña'atari kaja ajopana ina'ukena, na'aká piyá nanakojó riká, i'imajeri mapéjari ke je'echú chu, rewájena wakára'ajeri Tupana i'imakale. ²⁰Palá numaká ijló: Re ijwa'até Tupana puráka'alo nakú jewíña'atajeño, eyá fariséona, kajena. Unká wani i'ijnalaje je'echú chojé, unkájika ee ichá'ata neká, Tupana wátaka ke la'akana aú”, ke Jesús jewíña'ataka neká.

Pacháaka yúcha'akano yukuna marí

(Lc 12.57-59)

²¹“Kaja iwe'epí mékeka Tupana puráka'alo, riyuríkare pheñawilana michúnajlo kemaká: ‘Inóniña ina'uké. Nójeri ina'uké,

wajákana i'imajeri', ke rimaká. ²²Eyá nuká kemari: Yúcha'ajero ka'ajná apú inakiyana cha, wajákana i'imajeri. Pura'ajero pu'uwaré wani inakiyana nakú, iwá'aje iwakára'ajeño ejo, nawajákaloje riká penaje. Kemájeri ka'ajná apú inakiyánajlo: '¡Mapechuru wani piká ta!', amájeri kera'athani unká yakálare yajwé.

²³"Apala pi'ijnajé Tupana ñakaré ejo pipirana nakiyana noje rijló, pu'uwaré pila'akare chaya. Piphájika rejo ee ka'ajná, piwe'epeje re pile'ejé pura'akajo, chapú pinaku péchuri wa'até.

²⁴Ilé ke ri'imajika ee pijló, piyurí rejeja piraji piwátakare nókana Tupánajlo. Paineke pilamá'ata puráka'aloji chapú pinaku péchuri wa'até, rejomi pipa'ajó piño nakaje a'ajé Tupánajlo.

²⁵"Apú ka'ajná arukátari piká, unká pachá pa'alá pilewérikare wemí rijló, raú ka'ajná riwata piwá'akana iwakára'ajeri ejo. Pilamá'ata rijwa'até riká iñe'epú chuwá i'ijnajika nakuwá. Apala iwakára'ajeri a'ajeri piká policíanajlo, naka'akáloje piká ina'uké wajákelana chojé. ²⁶Numá pijló, unká pácho'olajo richiyá, a'ajná pa'atájika pilewérikare wemí rijló ejená.

²⁷"Kaja iwe'epí mékeka Tupana puráka'alo kemaká kalúyunajlo: 'Ila'aniña imanáicho ajopana wa'até'. ²⁸Eyá nuká kemari ijló: Yaká'aro apa'awelo inanaru chaje kakáme'e rujwa'até i'imakana aú, la'arí pu'uwaré, ri'ijnatákale ripéchuwa runaku ñaké.

²⁹"Ñakele apala pijlú pachá ka'ajná pila'ajika ee pu'uwaré, palani rikawícha'akana pinakiyá, pika'akáloje riká pinakiyó, pi'ijnaká piyá ripachá kera'athani yajwé amaje. Pikawícha'akela pijlú majó, pika'akáloje pinakiyó riká penaje, palani ri'imakajla pijló, pi'ijnaká piyá kera'athani chojé. Pinapona nakiyánaja kalé kapichárojla raú. Piyuke pinapona kapichákelo, chapú wani ri'imakajla pijló. ³⁰Pila'akachu pu'uwaré nakaje pila'akare piyáthe'ela aú pachá, piyurí piliyó rila'akana. Palani riyuríkana piliyó, pi'ijnaká piyá ripachá kera'athani yajwé amaje. Pimata'akela pinakiyó piyáthe'ela ka'añá chojori, pila'akare aú pu'uwaré, pika'akáloje riká pinakiyó, palani ri'imakajla pijló. Pila'akela ilé ke, palani ri'imakajla pijló, pi'ijnaká piyá kera'athani chojé. Pinapona nakiyánaja kalé kapichákojla raú. Piyuke pinapona kapichákelo, chapú wani ri'imakajla pijló.

³¹"Nemaké kaja marí ke: 'Iná wátakachu iná yajalo yuríkana kaja penaje, iná a'á rojló puráka'aloji lana'akéjami, ruwe'epíkaloje na pachaka iná yurika ruká. Rejéchami iná yurika ruká'.

³²Eyá nuká kemari: Apala pajluwa yurí riyajalo, unká rula'alá rumanáicho apú wa'até e'iyonaja, raú rila'á rimanáicho. Apú

wá'akajiko ee riyajalo penájemiru wa'até, la'ajeri kaja rimanáicho, Tupana pechu i'imakale runaku: 'Apú yajalo jo'ó ruká', ke.

³³“Jema'á kaja meke nemájika i'imaká: 'Iná kemakachu kewaka, ke Tupana íí a'akana aú, ajopana we'epíkaloje raú rila'ajika rimaká ke, richuwaja rila'ajé riká'. ³⁴Eyá nuká kemari ijló: Unká na penaje imalá apú nakaje íí nakú, ajopana we'epíkaloje raú ila'ajika imaká ke. Imaniña kaja Tupana, je'echú chu i'imakare nakú, reyá i'imajemi riwakára'akale rijwa'atéjena. ³⁵A'aniña kaja eja'awá íí, kamu'ujini wani eja'awá i'imakale Tupánajlo. Nakaje nakojé iná to'otaka iná jil'imá, ke rijló riká. A'aniña kaja pajmila Jerusalén íí, i'imakana wani le'ejé pajmila ri'imakale. ³⁶A'aniña kaja iwíla'aru íí, unkale iwe'epila pajluwélano iwíla' lajnere apiyákakana kameni aú, jareni aú. ³⁷Marí ke imájika: 'Nula'ajé riká', ke ka'ajná; 'Unká nula'alaje riká', ke ka'ajná. Rejeja imaje rinaku; ila'á imaká ke. Jiñá Chi'inárikana liyaje riká, kemari richaje ke nakaje nakú.

³⁸“Jema'á kaja meke nemájika i'imaká: 'Pajluwa ka'ajná la'ajika ee iká chapú, ñaké kaja ila'ajika piño riká chapú inakojó. Apú ka'ajná apichátajika ee ijlú, ñaké kaja apichátajika rijlú. Rapichátajika ee ka'ajná aí nakiyana, ñaké kaja apichájika raí nakiyana', ke nemájika. ³⁹Eyá nuká kemari: Pipura'aniño pile'ejé jakumi nakú, nala'ajika piká chapú kewá. Marí ke pila'ajika: Pajluwa ña'ajika ee ka'ajná piká pajimaya, pajluwa pitanó ka'ajná, pipajno'otá kaja rijló apo'ojó pitari, riña'akáloje piká reyá ñaké kaja penaje. ⁴⁰Pajluwa ka'ajná arukátajeri piká mapeja, raú riwá'aje piká iwakára'ajeño ejo, nalamá'atakalaje pijwa'até riká penaje. E ka'ajná najña'ajé pikamichare pinakiyá multa wemí penaje. Apú pa'arumaká, richari i'imakare wa'ató, pa'ajé rijló. ⁴¹Pajluwaja, ajopana le'ejena suráana nakiyana, wakára'ajika ee pijña'aká nakaje rijló pajluwela eja'awá e'iyowá ketana, pijña'á rijló riká iyajmela eja'awá e'iyowá ketana. ⁴²Pajluwa kemájika ee ka'ajná pijló, pa'akáloje rijló nakaje rila'akare nakú kamu'ují, pa'á rijló riká. Pajluwa kemájika ee ka'ajná pijló, piya'atákalaje rijló nakaje, piyurí rijló riká”, ke Jesús kemaká najló.

Iwátakaloje íki'ija chapú péchuruna inaku penaje yukuna marí

(Lc 6.27-28, 32-36)

⁴³Jesús kemari piño najló: “Jema'á kaja meke nemájika: 'Palá péchuruna inákuja kalé iwátaje íki'ija. Eyá chapú péchuruna inaku, amaje kaja chapú'. ⁴⁴Eyá nuká kemari ijló: Iwata íki'ija

chapú péchuruna inaku, la'año iká chapú. Ipura'ó kaja Tupana wa'até nanaku. ⁴⁵Ilé ke ila'ajika aú, i'imajé Tupana yaní. Jara'apá, je'echú chu i'imakare la'aká, ke kaja ila'ajika raú. Riká wakára'ari kamú pataká palá la'akáñojlo, pu'uwaré la'akáñojlo wa'até; riwakára'a kaja juni ja'akó palá la'akáñojlo, pu'uwaré la'akáñojlo wa'até. ⁴⁶Iwátakachu íki'ija wátaño kaja ikaja kalé, unká Tupana a'alaje ijlo riwemí, unkale ila'alá palá raú. Liñeru ña'ajeño ne'emakánajlo wa'ató wátaño kaja íki'ija palá péchuruna nanaku. ⁴⁷Ajalákakachu ejénaja kalé, unká na ila'alá palá raú; unká we'epílaño Tupana nakojé wa'ató ajalákaño ñaké kaja. ⁴⁸I'imá palá la'akaná nakuja, Jara'apá je'echú chu i'imakare la'aká ke kaja”, ke rimaká najló.

Jesús jewíña'ataka neká palá la'akaná nakú yukuna marí

6 ¹Rimá piño najló: “Ila'aniña nakaje palá, iwátakare la'akana kajrú ina'ukena jimaje, nemakáloje inaku raú: ‘¡Meke palá wani nala'aká!’, ke. Ilé ke ila'ajika ee, unká Jara'apá je'echú chu i'imaká a'alaje ijlo riwemí. ²Ñakele a'ajika ee kamu'ují la'akáñojlo nakaje, i'imaniña riyukuna ajopánajlo. La'año nekó palá la'ajeño ke ina'uké ijlu chu, a'año kamu'ují la'akáñojlo nakaje nawakáka'alo ñakarelana chu ajopana jimaje. Le'ejepelaji ñakarelana kopi, kajrú ina'ukena e'iyá, na'á najló riká, ina'uké pura'akóloje palá nanaku penaje. Numá ijlo: Palá ina'uké pura'akaro nanaku, rikaja kalé i'imajeri najló ilé ke nala'akare wemí. ³Pa'ajika ee kamu'ují la'akáño ñathé, pi'imaniña riyukuna ajopánajlo. Pijwáke'enajlo wa'ató, pi'imaniña kaja riyukuna. ⁴Pa'ajika ee ajopana ñathé, pila'á riká me'echú, palá para'apá je'echú chu i'imaká amaka mékeka pila'aká. Riká a'ajeri pijló palá pila'akare wemí”, ke rimaká najló.

Jesús jewíña'atari neká Tupana wa'até pura'akano nakú. Riyukuna marí

(Lc 11.2-4)

⁵E rimá piño: “Ipura'ajiko ee Tupana wa'até, ila'aniña ajopana la'aká ke kaja. Neká pura'año rijwa'até nawakáka'alo ñakarelana chu kajrú ina'ukena jimaje. Napura'ó kaja rijwa'até le'ejepelaji ñakarelana kópiwa, ajopana amákaloje neká penaje. Nanaku numá ijlo: Ilé ke nala'akare pachá kaja nakana najluwa wajakaje. ⁶Ñakele pipura'ajiko ee rijwa'até, pimujlúka'a ukapú chojé pikoja pipura'akóloje rijwa'até. Palá para'apá Tupana jema'ajika pipura'akó rijwa'até, re ri'imajíkale pijwa'até. Riká

a'ajeri pijló riwemí. ⁷Iná pura'akochu rijwa'até, unká iná kemalá rijló rikaja nakaje nakú. Ke'iyapejé nakaje nakú iná pura'ó rijwa'até. Unká we'epílaño rinakojé pura'año pajluwaja nakuja rijwa'até, napechu i'imakale, 'Riká nakuja wapura'ajiko ee Tupana wa'até, rema'ajé wa'apiyá riká', ke. ⁸T'ítaniña neká ke. Unká chiyó ikeja'a nakaje jara'apá Tupana liyá, kaja riwe'epí naka iwátaka riliyá.

⁹“Ñakele marí nakojé ipura'ajó rijwa'até:

'Wara'apá, je'echú chu i'imakare,
iná iphákare wani ja'apí piká.

¹⁰Wawata piwakára'aka pijwa'atéjena marí te'erí nakú i'imakaño, piwakára'aka pijwa'atéjena je'echú chu i'imakaño, ke kaja.

¹¹Pa'á wajló a'ajnejí chuwapajlo i'imakare, wajñákaloje penaje.

¹²Pamó wachaje pu'uaré wala'akare liyá, wamako ajopana chaje chapú nala'akare weká liyá, ke kaja.

¹³Piyuríniña pu'uaré la'akaná a'aká wame'é rijluwa, wala'akáloje ñaké penaje.

Pi'imatá kaja weká pu'uaré la'ajeño wakára'ajeri liyá.

Pamá palá pile'ejena ina'ukena, piyukeja la'ajerí pi'imakale.

Piká we'epiri piyukeja nakaje la'akana nakojé.

Matajnako pi'imajika; palá piwakára'ajika piyukeja; ñaké ri'imajika' ”,

ke Jesús jewíña'ataka neká Tupana wa'até pura'akano nakú.

¹⁴Rimá piño najló: “Amájiko ee ajopana chaje, chapú nala'akare iká liyá ee, ñaké kaja jara'apá, je'echú chu i'imakare, amájiko ichaje pu'uaré ila'akare liyá. ¹⁵Eyá unkájika ee amó ajopana chaje, chapú nala'akare iká liyá ee, unká kaja jara'apá, je'echú chu i'imakare, amálajo ichaje pu'uaré ila'akare liyá”.

Jesús jewíña'ataka neká na'ajné liyá i'itakano nakú yukuna marí

¹⁶Rimá najló: “T'itajiko a'ajné liyá wakajé, ipechu i'imakáloje Tupana nakuja riwakajé, ila'aniña ajopana la'aká ke kaja. Neká la'año najimawa apo'ojó, kamu'ují péchuruna ke, ina'uké we'epíkaloje raú ne'etakó na'ajné liyá, napechu i'imakáloje nanaku: 'Meke kajrú wani napechu Tupana nakú', ke. Numá ijló: Ilé ke nemakare nanákuja kalé i'imajeri najló palá nala'akare wemí. Unká Tupana a'alaje najló riwemí, unká pachá nala'alá palá. ¹⁷⁻¹⁸Ñakele pi'itajiko pa'ajné liyá wakajé, pilamá'ata palá pikó; pipá kaja palá pijimá chiyá, ajopana we'epika piyá pi'itakó pa'ajné liyá. Rikaja kalé para'apá, je'echú chu i'imakare, we'epéjeri

pi'itakó pa'ajné liyá, raú ra'ajé pijló palá pila'akare wemí”, ke Jesús kemaká najló.

Nakaje awakátakana je'echú chojé yukuna marí

(Lc 12:33-34)

¹⁹Rimá piño najló: “Awakátaniña ijluwa kajrú nakaje marí eja'awá chu i'imakare. Kajrú pi'iréjina apichátaka iná nane maare; kiñaja kaja ritajnáñaaka iná; jata'akáchina mujlúka'año kaja iná ñakaré chojé rata'ajé. ²⁰Ñakele ila'á piyuke Tupana wátaka ke, raú rila'ajé palá inaku je'echú chu i'imajika wakajé. Re unká pi'iréjina i'imalá apichátaño nakaje; re unká kaja nakaje tajnálajo iliyá; unká kaja jata'akáchina mujlúka'alaje rejo nakaje jata'ajé iliyá. ²¹Palá iná i'ijnataka iná péchuwa nakaje íki'ija iná wátakare nakú. Iná wátakachu íki'ija nakaje je'echú chu i'imakare inajluwa, iná i'ijnatá kaja iná péchuwa rinaku. Eyá iná wátakachu íki'ija nakaje marí eja'awá chu i'imakare inajluwa, iná i'ijnatá kaja iná péchuwa rinaku”, ke rimaká najló.

Iná pechu yukuna marí

(Lc 11:34-36)


²²Rimá piño najló: “Iná pechu lokópa'ala iná la'á nakaje. Palá iná pechu i'imakachu, iná la'á kaja palá nakaje. Unkachu iná pechu i'imalá palá, unká kaja iná la'alá palá nakaje. ²³Ñaké palá péchuri pi'imajika ee, piyukeja nakaje pila'ajíkare i'imajika palá waja ajopánajlo. Kamareji chojé palá iná amaka nakaje, ke kaja ajopana amájika palá nakaje pila'ajíkare.

²⁴“Unká meke la'ajé iná jema'alá palá iyamá iná wakára'ajeño ja'apiyá. Apala pajluwa ka'ajná piwata apú chaje, lanakiya unká piwátala apú. Apala pajluwa ja'apiyá ka'ajná pema'ajé palá, eyá apú ja'apiyá unká. Ñaké kaja unká pema'alaje palá Tupana ja'apiyá, kajrú piwátajika ee pijluwa liñeru”, ke rimaká najló.

Tupana a'aká rinakojó riyani yukuna marí

(Lc 12.22-31)

²⁵Jesús kemari ra'apiyatéjenajlo: “Iwó ka'aniño a'ajnejí, i'irakaje, kaje wa'até i'imakáloje ripalamane penaje. Iwó ka'aniño kaja a'arumakaji a'ajíkare inakuwá wa'até. A'ajnejí chaje inajlo kajmuchaji, eyá a'arumakaji chaje inajlo iná naponá. ²⁶Iwe'epí meke kupira'aphana: Yenuwa najrá; unká nejátala nakaje icha ijí najluwa; unká kaja nalamá'atala nakaje icha ijí najluwa. E'iyonaja jara'apá je'echú chu i'imakare a'arí najló a'ajnejí. Kupira'aphana



chaje íki'ika riwátaka iká. ²⁷Iwó ka'ajiko ee nakaje nakú, unká ra'alaje ináthé, i'imakáloje júpija marí eja'awá chu penaje.

²⁸“¿Naje iwó ka'ó a'arumakaji kaje wa'até? Iwe'epí mékeka a'awaná iwí. Unká rijápala, unká kaja rila'alá rijluwa a'arumakaji ra'akáloje rinakuwá penaje. ²⁹Kajrú wani le'ejepelari ne'emakana Salomón michú i'imaká, e'iyonaja unká richá'atala a'awaná iwí palacha ra'arumaká aú i'imaká. ³⁰Ilé ke Tupana la'aká palá a'awaná iwí nakú, meketánaja penaje ri'imaká e'iyonaja. A'awaná iwí ra'aká rinakojó, chaje íki'ika ra'aká rinakojó iká, a'arumakaji i'imakáloje ijló penaje. ¡Meke wejápaja wani ipechu Tupana chojé kaphí! ³¹Ñakele iwó ka'aniño nakaje nakú. Ipechu i'imaníña kaja: ‘¿Na wajñaje? ¿Na we'eraje? ¿Mérowa wephátaje wajluwa a'arumakaji?’, ke. ³²Unká we'epílaño Tupana nakojé, nekaja kalé we'epiño ilé kaje natukumó. Eyá iká, palá Tupana we'epika, ra'akáloje ijló nakaje ila'akare nakú kamu'ují. ³³Iwe'epí itukumó paineko Tupana wakára'aka ke la'akana, riwátaka ke la'akana kaje. Raú ra'ajé ijló a'ajnejí, a'arumakaji, kaje maká piyuke. ³⁴Iwó ka'aniño nakaje akijñojo i'imajíkare ijló wa'até. Riwakajé re kaja nakaje i'imajé piño iná wo ka'ajona penaje. We'echú ka'alá keja re inajlo nakaje, apala unká paala ka'ajná, iná a'akáloje iná nakojó riká penaje”, ke Jesús kemaká najló.

Iná pura'akó piyá mapeja ajopana nakú, meke la'ajeñoka neká. Riyukuna marí

(Lc 6.37-38, 41-42)

7 ¹Jesús kemari piño najló: “Imaníña ajopana nakú meke la'ajeñoka neká Tupánajlo. Raú unká kaja rimalaje inaku meke la'ajeñoka iká rijló. ²Ilé imaká ajopana nakú, ke kaja Tupana kemájika inaku. Palá ila'aká ajopana nakú, ke kaja rila'ajika inaku palá. ³¿Naje pa'á pinakojó wejápaja pu'uwaré apú la'akare? ¿Naje unká pa'alá paineko pinakojó pu'uwaré wani pila'akare? ⁴Pu'uwaré la'ajerí wani piká. Eta, ¿meke la'ajé chi pimajla apú pinakiyanajlo: ‘Piyurí piliyó pu'uwaré la'akaná’, ke? ⁵¡Pajlákachi ta piká! Paineko piyurí piliyó pu'uwaré wani la'akaná, rejomi

pimakáloje pe'ewejo riyuríkaloje riliyó wejápaja pu'uwaré la'akaná”, ke Jesús jewíña'ataka neká.

⁶Rimá piño najló: “Pipura'aniño Tupana le'eje nakaje nakú, unká wátalaño riká wa'até. Apala napura'ajó pu'uwaré wani pinaku rijimaje. Iná a'akachu yawi yurí wánijlo nakaje kawemí nojé, najma'atajla iná rijimaje. Ñaké kaja a'akachu kawemí nojé murewa je'erujlo, mapeja ripayákatajika richá te'erí e'iyajé. Ke kaja unká wátalaño Tupana ja'apiyá jema'akana la'aká iná”, ke rimaká najló.

Tupana a'aká riliyá kejá'ajeñojlo nakaje yukuna marí

(Lc 11.9-13; 6.31)

⁷Jesús kemari piño najló: “Ikeja'a Tupana liyá nakaje, raú ra'ajé ijló riká; ikulá riliyá nakaje, raú iphátaje riká; imá rijló rijme'etachi ijló nakaje apu, raú rijme'etaje ijló riká. ⁸Riliyá nakaje kejá'ajeñojlo, ra'ajé nakaje; riliyá kulájeño, iphátajeño nakaje; rijló kemájeñojlo, rijme'etaje rapu.

⁹“Unká na kalé a'á ri'irijlo jipa, rikejá'akachu riliyá kujnú.

¹⁰Unká kaja na kalé a'á ri'irijlo jeí, rikejá'akachu riliyá jiña.

¹¹Pu'uwaré la'ajeño iká, e'iyonaja iwe'epí iyánijlo nakaje a'akaná palá. Chaje wani jara'apá, je'echú chu i'imakare, we'epika palá nakaje a'akaná riliyá kejá'ajeñojlo.

¹²“Ila'á palá ajopana ina'ukena nakú, iwátaka nala'aká inaku ke kaja. Tupana puráka'alo, Moisés, eyá Ripuráka'alo ja'apátajeño michuna, kele lana'akare i'imaká, wakára'ari iná la'aká ñaké kaja”.

Jesús i'imari najló iyamá tamáka'ako iñe'epú yukuna marí ke

¹³“Re iyamá iñe'epú: pajluwa kamu'ujini, eyá apú chi'itaje. Ilé chi'itaje iñe'epú i'ijnari kapichákajo ejo. Malaka'aphénaru richuwá i'ijnakana. Kajrú ina'ukena i'ijnaká richuwá.

¹⁴“Eyá apú kamu'ujini ñani i'ijnari matajnako iná i'imaká ejo. Jápakaje richuwá i'ijnakana, ñakele mekeleja i'ijnaño richuwá”, ke rimaká najló.

Nakaje ina'uké la'akare aú iná we'epí mékajenaka neká. Riyukuna marí

(Lc 6.43-44)

¹⁵Jesús kemari piño najló: “Amá ikó palá pajlákachina liyá, kemaño nanakuwá: ‘Tupana puráka'alo ja'apátajeño weká’, ke. A'aniña inakojó napuráka'alo. Namákana aú iná pechu nanaku:

‘Palájne'ekena japi neká’, ke, e'iyonaja unká wani ñaké kalé neká. Chapú wani péchuruna neká. ¹⁶Nakaje nala'akare aú iná we'epí mékajenaka neká. Unká méño'oyo lukú arúka'alajla kajmú icha ke; unká kaja kukuná arúka'alajla pipirí icha ke. ¹⁷Palani a'awaná a'arí richawá palá, eyá pu'uwareni a'awaná a'arí richawá pu'uaré kaja. ¹⁸Unká méño'oyo palani a'awaná a'alajla richawá, pu'uwareni a'awaná a'aká richawá ke kaja. Unká kaja méño'oyo pu'uwareni a'awaná a'alajla richawá, palani a'awaná a'aká richawá ke kaja. ¹⁹Unkachu iná paijí a'alá palá richawá, iná i'iká riká, iná ka'akáloje riká kera'athani chojé. ²⁰Ñakele nakaje ina'uké la'akare aú iwe'epeje mékajenaka neká: pajlákachina ka'ajná, palá péchuruna ka'ajná”, ke rimaká najló.

Mékajenaka unká i'ijnalájeño je'echú chojé yukuna marí

(Lc 13.25-27)

²¹E rimá piño najló: “Unká piyukeja kalé kemaño nunaku: ‘Wawakára'ajeri riká’, ke i'ijnalaje je'echú chojé. La'año Nora'apá wátaka ke, nekaja kalé i'ijnajeño rejo. ²²Nuphájika kaja penaje majó wakajé, ne'iyajena kemájeño nojló: ‘Wawakára'ajeri, weká i'imaño piyukuna ajopánajlo; pipuráka'alo aú wawakára'a jiñana pechu jácho'oko ne'iyajena e'iyayá; pipalamane wala'á kajrú nakaje Tupánaja kalé we'epíkare la'akana’, ke nemájika nojló riwakajé. ²³E'iyonaja numaje najló: Unká nuwe'epila mere eyájenaka iká. I'ijná nuliyá, pu'uaré la'ajeño i'imakale”, ke rimaká najló.

Iyamá pají la'ajeño yukuna marí

(Lc 6.47-49)

²⁴Rejomi rimá piño najló: “Ñakele jema'ajeri nupuráka'alo rila'akáloje numaká ke penaje, i'imajeri pajluwa ina'uké kapechuni wani, la'arí palá riñakaró jipa nakojé i'imaká, ke kaja. ²⁵Kajrú juni ja'akó wakajé kaphí ta'akheni juni iphaka riñakaré ja'apejé. Kajrú kaja karená apho'oká rinakojé, e'iyonaja unká riñakaré kojno'olá raú, jipa nakú ripana tára'akole. Ilé ke rila'akale riká palá, unká rikapichalo raú. ²⁶Eyá jema'año nupuráka'alo, e'iyonaja unká nala'alá rimaká ke, i'imaño ina'uké mapechuru, la'arí riñakaró ke'epé e'iyajé i'imaká. Ke kaja nala'aká chapú nekó raú. ²⁷Kajrú juni ja'akó wakajé, kaphí ta'akheni iphaka riñakaré ja'apejé. Kaphí kaja karená apho'oká rinakojé, raú riñakaré kojno'ó junápeje. Ke'epé e'iyá ripana i'imakale aú rikapichó piyukeja”.

28 Ilé ke Jesús jewíña'ataka ne'emaká. Rejomi ripuráka'alo jema'ajeño pechu i'imá rinaku: “Meke palá wani rewíña'atalaka weká. **29** Palá riwe'epika nakaje rewíña'atakare nakojé. Unká Tupana puráka'alo nakú jewíña'atajeño, maárowa i'imakaño, ke kalé riká”, ke napechu i'imaká rinaku.

Jesús tejmo'ótaka pajluwaja ritami yukuna marí

(Mc 1.40-45; Lc 5.12-16)

8 **1**E kaja Jesús witúka'ari yenuri ji'iwátaya. Kajrú ina'ukena i'ijnaká rápumichu. **2**E pajluwaja iphari rinaku. Ritami ri'imaká, rinapona nakiyana patáka'ataro rijló. Ramaka aú Jesús, ritára'o ri'irúpachi aú rijimaje, rimá rijló:

—Wawakára'ajeri, piwátajika ee, pa'apata nuliya nuyaripune.

3Raú Jesús jápari rinaku riyáthe'ela aú, rimá rijló:

—No'opátaje piliya riká. Kaja pinapona pali'ichó pijló.

Ilé ke rimaká rijló eja, rinapona pala'ó rijló. **4** Jesús kemari rijló:

—Pi'imaniña nuyukuna ajopánajlo. Chuwa pi'ijná sacerdote ejo, ramachi piká. Rejomi pa'á Tupánajlo nakaje pinapona pali'ichako wemí, Moisés michú wakára'aka ke. Raú nawe'epeje kaja pinapona pala'akó palá pijló.

Jesús tejmo'ótaka romano nakiyana wa'até jápajeri yukuna marí

(Lc 7.1-10; Jn 4.43-54)

5 Jesús i'ijnari pajimila Cafarnaúm ejo. Re pajluwaja romano nakiyana, suráana wakára'ajeri ri'imajika, iphari rinaku. **6** Rimá Jesusjlo:

—Wawakára'ajeri, ritami wani nujwa'até jápajeri. Unká méño'oyo rikawitala rinapona, kajrú wani ramaka kewini yajwé. Re ritami to'oró nuñakaré chu.

7 Jesús kemari rijló

—Nu'ujnajé pijwa'até ritejmo'ótaje.

8 Raú suráana wakára'ajeri kemari rijló:

—Wawakára'ajeri, unká nuwátala pinaku kawíla'akana. Unká kaja nuwátala pimujlúka'aka nuñakaré chojé, mapeja i'imaká nuká. Ñakele maáreya i'imajémija piwakára'a ritejmo'otako, raú ritejmo'otajo. **9** Re kaja nuwakára'ajeño. Suráana wakára'ajeri nuká, ñakele numakachu pajlúwajlo: “Pi'ijná ajf ño'ojó”, ke, ri'ijná rejo. Eyá numakachu apujlo: “Majó pi'ijná”, ke, ri'ijná nuká ejo.

Nuwakára'akachu nujwa'até jápajeri la'aká nakaje, rila'á riká numaká rijló ke.

¹⁰ Ilé ke rimaká rijló aú Jesús pechu i'imá: “¡Meke kaphí wani ripechu Tupana chojé!” Raú rimá rúpumichu chira'ajéñojlo:

—Kaphí wani ripechu Tupana chojé ra'akáloje riñathé penaje. Unká nuphátala apú Israel lakénami nakiyana e'iyá riká ke wani péchuri. ¹¹ Kajrú ajopana i'imajika a'ajútaya michuna wa'até je'echú chu. Ajopana te'eré eyájena ne'emajika; Abraham, Isaac, Jacob, keke wa'até ne'emajé. ¹² E'iyonaja judíona nakiyana rika'ajé ya'ajna je kalajeruni chojé. Re kajrú neyájika. Kewini akuwaná najma'ajé naiwá kamachá —ke Jesús kemaká najló.

¹³ E rimá piño suráana wakára'ajerijlo:

—Chuwa pipa'ó. Kaphí pipechu i'imakale nochojé, nutejmo'ótaje pijló riká.

Ilé ke rimaká rijló, wa'ató ke rijwa'até jápajeri tejmo'otako.

Jesús tejmo'ótaka Pedro yajneru yukuna marí

(Mc 1.29-31; Lc 4.38-39)

¹⁴ E kaja Jesús i'ijnari Pedro ñakaré ejo, mujlúka'ari richojé, amari Pedro yajneru to'okó. Jelo'okajo nakú ru'umá. ¹⁵ E rijapa ruyáthe'ela nakú, wa'ató ke jelo'okajo mata'aká runakiyá. E rócho'o rutamáka'atakaloje a'ajnejí najló.

Jesús tejmo'ótaka kajrú natámina yukuna marí

(Mc 1.32-34; Lc 4.40-41)

¹⁶ E kaja najúwa'a re. Rejechéami ne'iyajena wá'aka kajrú jiñana pechu i'imakárena e'iyá Jesús ejo. Ripuráka'alo aú ja riwakára'a jiñana pechu jácho'oko ne'iyayá, ritejmo'ota kaja piyuke natámina. ¹⁷ Tupana puráka'alo ja'apátajeri Isaías michú kemaká i'imaká, ke rila'aká natejmo'ótakana aú. Ripiyá rilana'á marí ke i'imaká: “Ritejmo'ótaje weká wayaripune liyá”.

Meke Jesús kemaká wátaño rijwa'até i'ijnakánajlo yukuna marí

(Lc 9.57-62)

¹⁸ Jesús amaka aú kajrú wani ina'ukena awakako rinakojé, rimá ra'apiyatéjenajlo nakuwá'atakaloje riká kaéja pa'anajo pitá. ¹⁹ Re pajluwa Tupana puráka'alo nakú jewíña'atajери i'ijnari rawa'ajé, rimá rijló:

—Wewiña'atajeri, nuwata pijwa'até i'ijnakana méño'ojoka pi'ijnajika ewá.

²⁰ Jesús kemari rijlól:

—Re kamejérinajlo pukunaji nakamátakoloje richu penaje; kupira'aphánajlo re kaja nañakaré; eyá nojlól unká pukunaji i'imalá nuwatána'akaloje richu penaje. Ina'uké i'imakáloje nupalamane penaje i'imaká nuká.

²¹ E apú ra'apiyateje nakiyana kemari rijlól:

—Wawakára'ajeri, piyurí nupa'akó nuñakaré ejo paineko. Nuwata nora'apá tami já'akana ritaka'ajika wakajé.

²² Jesús kemari rijlól:

—Pi'ijná nujwa'até. Unká we'epílaño Tupana nakoje, kaja taka'akaño ke neká nojlól. Neká já'ajeño kaja taka'akaño tami.

Jesús kemaká karenajlo ra'apákalaje penaje yukuna marí

(Mc 4.35-41; Lc 8.22-25)

²³ Muní ke Jesús witúka'aka wapuru chojé ra'apiyatéjena wa'até. ²⁴ Rejéchami mana'í chiyó karená i'imaká nachá kaphí wani. Riká yoko'orí kajrú juni, raú kajrú juni jamo'okó wapuru chojé, e'iyonaja mana'ija Jesús kamátako. ²⁵ Rejéchami napótaka riká, nemá rijlól:

—¡Wawakára'ajeri, pi'imatá weká wejaká, chuwaka wakapichako junápeje!

²⁶ Rimá najlól:

—¿Naje ikero'ó kajrú wani? ¿Naje unká wani ipechu i'imalá kaphí nochojé?

Raú rácho'o; rimá karená, eyá juni yokólajlo wa'até:

—¡Pa'apá!

Raú karená ja'apari, wa'ató ke unká juni yoko'olól. Mana'ija ri'imaká piño rapumí chuwa.

²⁷ Ilé ke Jesús kemaká aú ra'apiyatéjena pechu i'imá rinaku: “¿Na ka'ajná kari? Karená, eyá juni yokola wa'ató jema'arí ra'apiyá”.

Jesús wakára'aka jiñana pechu jácho'oko ina'uké e'iyayá yukuna marí

(Mc 5.1-20; Lc 8.26-39)

²⁸ E kaja nephá pa'anajo pitá, Gerasa te'eré ejo, amaño iyamá ina'ukena i'ijnaká najimajo. Támijimina ka'akelana eyá nephá. Jiñana pechu i'imaño ne'iyá, raú yuriná wani ne'emaká. Unká

na ja'apake rewá, chapú nala'ajika rewá ja'apájikaño. ²⁹Nephaka nanaku ee, nawíyo'oko nemaká Jesusjlo:

—¿Naje pikawíla'a wanaku? Tupana i'irí piká. ¿Pila'akáloje weká chapú, unká chiyó riphá rená chojé wajló, penaje chi pi'ijichá majó?

³⁰A'ajnare ke kajrú je'eruna pirakana chira'akó na'ajnewá kulákana nakú. ³¹Mawó jiñana pechu kemaká Jesusjlo:

—Pácho'otajika ee weká ne'iyayá, piyurí we'ejnaká a'ajnaruna je'eruna e'iyajé.

³²Raú riwakára'a jiñana pechu jácho'oko ne'iyayá. Rejéchami nácho'oko, ja'año je'eruna pirakana e'iyajé. Na'akó aú ne'iyajé, je'eruna jecho'oño ají ke yenuri ji'iwátaje, reyá na'ó kaéja jakojé. Rejeja nakapichó piyukeja junápeje.

³³Je'eruna lamára'ajeño penájemina amaka aú nakapichako, nakero'ó kajrú, raú neñaó reyá. E ne'emá riyukuna pajimila eyájenajlo. ³⁴Raú piyukeja pajimila e i'imakaño i'ijnaño rejo Jesús amaje. Nephaka rinaku ee, mawó nemaká rijló:

—Pácho'o wate'eré nakiyá.

Jesús tejmo'ótaka pajluwa kamachá napona taka'aká rijló i'imaká, yukuna marí

(Mc 2.3-12; Lc 5.17-26)

9 ¹E kaja Jesús witúka'ari wapuru chojé. Nakuwa'a pa'anajo pitá ají ke riñakajela ejo. ²E nawa'a rejo kuwana nakú pajluwaja kamachá napona taka'aká rijló. Jesús we'epika aú kaphí napechu i'imaká richojé ritejmo'ótakaloje riká penaje, rimá ritámijlo:

—Pipechu i'imá kaphí; kaja nomicho pichaje pu'uaré pila'akare liyá.

³Ilé ke rimaká rijló aú, Tupana puráka'alo nakú jewíña'atajeño nakiyana pechu i'imá: “¡Meke unká wani paala rimaká ta! Tupánaja kalé amárojla iná chaje, pu'uaré iná la'akare liyá. Unká Tupana kalé riká”, ke napechu i'imaká rinaku.

⁴Jesús we'epiri mékeka napechu i'imaká rinaku, raú rimá najló:

—¿Naje chi i'ijnatá ipéchuwa ilé ke wani? ⁵Mapeja apujlo kemakana: “Kaja nomicho pichaje pu'uaré pila'akare liyá”, ke. Eyá puwichani inajlo, iná wakára'akaloje ritami jácho'oko ra'apákaloje penaje. ⁶Nakele iwe'epíkaloje penaje Tupana wakára'aka nomako ina'uké chaje pu'uaré nala'akare liyá

aú, nula'ajé nakaje me'etení iwe'epíkaloje kewaka numaká nunakuwá.

E rimá kamachá napona taka'akajlo:

—Chuwa pácho'o, pijña'a pikuwanare pijwa'ató, pipa'achó.

⁷Rejéchami rácho'oko, e ripa'ó riñakaré ejo. ⁸Rácho'oko aú ramájeño pechu i'imá Jesús nakú: “¡Meke piyuke wani rila'alaka!”, ke. Palá napura'akó Tupana nakú, ra'akale Jesús ñathé kajrú wani.

Jesús kemaká Matéojlo ri'ijnakáloje rijwa'até yukuna marí

(Mc 2.13-17; Lc 5.27-32)

⁹E kaja Jesús ja'apari piño reyá, amari Mateo yá'ako rijápaka'ala la'akana nakú. Liñeru ña'akana nakú ina'uké liyá ne'emakánajlo penaje nakú ri'imá. E Jesús iphari rinaku rejé, rimá rijló:

—Pi'ijná nujwa'até.

Raú rácho'o riyá'ako eyá, i'ijnari rijwa'até. ¹⁰Rejomi riwakára'a nala'aká kajrú a'ajnejí, ajopana ajñákaloje na'ajnewá Jesús wa'até riñakaré chu. Re kaja liñeru ña'ajeño ne'emakánajlo, eyá ajopana nemakárena nakú: “Unká ina'ukélaruna”, ke, i'imaño najwa'até re. Jesús ja'apiyatéjena i'imaño kaja najwa'até. ¹¹Ilé ke fariséona nakiyana amaka aú rajñaka ra'ajnewá najwa'até, nemá ra'apiyatéjenajlo:

—¿Naje chi jewíña'atajeri ajná ra'ajnewá ilé kajena ina'ukena, unká ina'ukélaruna ta wa'até?

¹²⁻¹³Jesús jema'arí nemaká ilé ke najló, raú rimá najló:

—Peyajwéruna i'imakaño unká i'ijnalaño pujána'ajeri ejo, natámina i'imakáñoja kalé i'ijnaño richaje. Ñaké kaja nuká ina'ukejlo: re ina'uké, natámina ke neká Tupánajlo pu'uaré nala'akare pachá; re ne'iyajena pechu nanakuwá: “Kewaka, pu'uaré la'ajeño weká”, ke. Ilé ke péchuruna i'imakaño nanakuwajlo nu'ujná majó Tupana yukuna i'imajé, napajno'otákaloje napéchuwa pu'uaré nala'akare liyá Tupana ejo.

Ñakele chuwa jewíña'o meke kemakánaka ijlo marí Tupana puráka'alo kemakare nakú: “Iká noño pirájina, ikára'atakaloje nojló pu'uaré ila'akare chaya. E'iyonaja nojló chaje wani palaka ina'uké mu'ují we'epíkana”.

Eyá ajopana ka'ajná pechu nanakuwá: “Palá la'ajeño weká”, ke, e'iyonaja unká ñaké kalé neká. Ilé ke péchuruna

nanakuwajlo unká nu'ujnalá majó Tupana yukuna i'imajé —ke rimaká najló.

Napura'akó Jesús wa'até a'ajnejí liyá i'itakano nakú yukuna marí

(Mc 2.18-22; Lc 5.33-39)

¹⁴E kaja Juan el Bautista ja'apiyatéjena iphaño Jesús nakú, nemá rijló:

—Methú ke weká, fariséona wa'até, i'itakono wa'ajné liyá, riwakajé wapechu i'imakáloje Tupana nakuja. Eta, ¿naje unká pa'apiyatéjena la'alá ñaké kaja?

¹⁵Jesús kemari najló:

—Nawá'akako wakajé piyuke nayukupé'akarena pechu pu'ují waja. Unká ne'etaló a'ajnejí liyá, ruwá'akajikaro wa'até i'imakale re najwa'até. Ñaké kaja riká nujwa'atéjenajlo: najwa'até nu'umajika ketana, unká na penaje ne'etaló a'ajnejí liyá. Tupana wá'ajikaja nuká naliyá ejomi, ne'etajó na'ajné liyá —ke rimaká najló.

Jesús jewíña'atari neká nema'akáloje ripuráka'alo ja'apiyá penaje. Riyukuna marí

¹⁶Rimá najló: “Unká na kalé mata'arí wajé a'arumakaji nakiyana jupichumi tepé penaje. Re'iyayá jipakana ejéchami, jupichumi jiyo'otako wajé liyá. Kaja penaje jiyo'otákeja piyukeja a'arumakaji yuriko. ¹⁷Unká kaja iná akho'olá nakaje jalá wajé amúra'atakanami jupichumi ra'akuná chojé, iná lamá'atakaloje riká richojé penaje. Kamejeri ímami nakiyá la'akanami riká ra'akuná, ñakele iná akho'okachu wajé nakaje jalá jupichumi ra'akuná chojé, rijiyotá riká riñapaka ejéchami. Rejeja rikapichó piyuke. Eyá wajé ra'akuná chojé iná akho'okachu wajé nakaje jalá amúra'atakanami, unká rijiyotála riká, wajé ra'akuná ña'akale panaku riká, raú unká na kapichalo”, ke ri'imaká najló yuku.

Jesús makápo'oka Jairo itu, eyá apa'awelo tejmo'otako ra'arumaká nakú jápakana aú, yukuna marí

(Mc 5.21-43; Lc 8.40-56)

¹⁸Jesús i'imaká najló yuku ketana, pajluwa iphaka nanaku. Judíona wakára'ajeño nakiyana ri'imaká. Riphá Jesús nakú, e rijláma'o ri'imá nakojé, rimá rijló:

—Wajé nutu taki'ichaka. Pi'ijná nujwa'até nuñakaré ejo pijápakaloje runaku piyáthe'ela aú, rupala'akóloje raú penaje.

¹⁹Raú Jesús, ra'apiyatéjena wa'até, i'ijnaño rijwa'até riñakaré ejo. ²⁰⁻²¹Najwa'até apa'awelo ja'apayo kaja. Iyamá iphata ji'imaji nakojé kele (12) jarechí ketana cha ru'umaká rutami. Jirá ja'apákeri runakiyá. Rupechu i'imá Jesús nakú: “Ra'arumaká nakú jápakana aú ja nutejmo'otajo”, ke. Ñakele ro'opá rápumichu, rujapa ra'arumaká ji'imá nakú.

²²Rejéchami Jesús pajno'okó ruchaje yaká'ajo, amari ruká, rimá rojló:

—Pipechu i'imá palá. Kaja pitejmo'otiyó pitami kaje chiyá, pipechu i'imakale kaphí nochojé.

Raú ja rutejmo'otó.

²³E kaja na'apá, iphaño Jairo ñakaré ejo. Kajrú ina'ukena i'imaká re. Kewirí kaje chojé apho'ojeño i'imaño kaja re. Támijimi já'akana yale napho'ó kewirí kaje chojé. Re kaja nawinano la'ajeño i'imaño, raú kajrú namejé i'imaká, kajrú nala'aká nawinano. ²⁴E kaja Jesús kemari najló:

—I'ijná a'ajná ño'ojó. Unká ilerú yuwaló taka'alacha, rukamátakaja.

Raú ne'echá rinaku. ²⁵E'iyonaja Jesús wakára'ari nácho'oko pají chiyá, rejomi rimujlúka'a ukapú támijimi i'imakare chu chojé. Ripatá rutami ruyáthe'ela nakiyá, raú rócho'o.

²⁶Rejomi rimakápo'oka piño ruká yukuna motho'ó kajrú wani nate'eré ewá.

Jesús ja'apátaka naliyá mejlukaji yukuna marí

²⁷E kaja Jesús ja'apari piño. Iyamá mejluruna i'ijnaño rápumichu. Nawíyo'oko nemaká rijló:

—Piká, Tupana wakára'akare majó ina'uké i'imatájeri penaje, piwe'epí wamu'ují.

²⁸Jesús mujlúka'ari pají chojé, rápumichu ke neká, e rimá najló.

—¿E chi ipechu nakú no'opátakajla iliyá mejlukaji?

—A'a, wawakára'ajeri.

²⁹E rijapa nejlú nakú, rimá najló:

—Ipechu i'imaká kaphí nochojé lokópa'ala ri'imajé ijló.

³⁰Rejéchami namaka palá. E Jesús kemari najló:

—¡Pa! I'imaniña riyukuna ajopánajlo.

³¹Raú napa'ó, e'iyonaja ne'emá piyuke nañakajela ewájenajlo palá Jesús la'aká neká yukuna.

**Jesús wakára'aka jiñá pechu jácho'oko pajluwaja
manumarú e'iyayá yukuna marí**

³²Kaja mejluruna i'imakaño penájemina pa'año. Nayámojo ajopana piño iphaño Jesús nakú. Nawa'a najwa'ató pajluwa jiñá pechu i'imakare e'iyá, nakojé unká méño'ojo ripura'aló. ³³Jesús wakára'aka jiñá pechu jácho'oko re'iyayá ejomi, palá ripura'akó. Piyuke ramájeño kemaño:

—¡Meke piyuke wani la'aká Jesús! Unká wani wamala apú la'aká ñaké maare Israel lakénami te'eré nakú.

³⁴Eyá fariséona nakiyana kemaño rinaku:

—Jiñana wakára'ajeri a'arí riñathé, riwakára'akaloje jiñana pechu jácho'oko ne'iyayá.

Jesús we'epika ripuráka'alo jema'ajeño mu'ují yukuna marí

³⁵Jesús ja'apákeri apú pajimila ewá, apú pajimila ewá ke, newíña'atakana nakú nawakáka'alo ñakarelana chuwá. Ri'imaké Tupana i'imataka ina'uké kapichákajo liyá yukuna najló, raú ne'emakáloje rijwa'atéjena nakiyana penaje. Ritejmo'ótake kaja natámina piyukeja nayaripune liyá. Kewini yajwé amájeño ne'emajika, ke'iyapejé nayaripune i'imajíkale.

³⁶Jesús amaka aú kajrú wani ne'emaká, riwe'epí namu'ují. Ujwí péchuruna ne'emaká; chapú kaje yajwé amájeño kaja ne'emaká, unkale namájeri i'imalá; ovéjana, nekó chira'akaño, keja ne'emaká. ³⁷Raú rimá ra'apiyatéjenajlo:

—Jema'á marí: Kajrú ina'ukena jema'akajla Tupana ja'apiyá, ajopana i'imakela najló riyukuna. E'iyonaja unká riyukuna i'imajeño i'imalá. ³⁸Nakele ipura'ó Tupana wa'até riwakára'akaloje riyukuna ja'apátajeño ajopánajlo, ajopánajlo ke —ke rimaká najló.

**Jesús wakára'aka riyawe'ená ajopana chaje, ajopana chaje ke
yukuna marí**

(Mc 3.13-19; Lc 6.12-16)

10 ¹E kaja Jesús kemari ra'apiyatéjenajlo nawakákolaje richaje. Iyamá iphata ji'imaji nakojé (12) kele ne'emaká. Neká awakaño rejé, rimá najló:

—Nupuráka'alo aú iwakára'aje jiñana pechu jácho'oko ina'uké e'iyayá. Raú kaja itejmo'ótaje natámina ke'iyapé nayaripune liyá.

²Iyamá iphata ji'imaji nakojé (12) kele riyawe'ená i'imaká. Marí kele ne'emaká: Simón. Apú rií Pedro. Andrés, Simón e'ewé ri'imaká. Eyá Santiago, re'ewé Juan wa'até, Zebedeo yaní

ne'emaká. ³Eyá Felipe, Bartolomé, Tomás, Mateo, liñeru ña'ajeri ne'emakánajlo penájemi ri'imaká, eyá apú Santiago, Alfeo i'irí ri'imaká. Eyá Tadeo, ⁴Simón, cananeo nakiyana ri'imaká. Eyá kaja penaje Judas Iscariote. Nenoka Jesús wakajé, riká wá'ari ripinana ri'imaká ejo, napatakáloje riká penaje. Keleja ri'iwapá rijluwa riyawe'ená penaje i'imaká.

**Jesús wakára'aka riyawe'ená i'imaká Tupana yukuna
ajopánajlo, ajopánajlo ke, yukuna marí**

(Mc 6.7-13; Lc 9.1-6)

⁵Jesús wakára'aka riyawe'ená i'ijnaká yámona, rimá najló: “Tijnaniña unká judíona kalé i'imakaño te'eré ewá. Imujlúka'aniña kaja pajimila Samaria te'eré ejo. ⁶Palani i'ijnaká Israel lakénami chaje, kapichájeño penaje i'imakaño ne'emakale. ⁷I'ijná, i'imichá najló riyukuna: Yewicha riphaka rená chojé Tupana i'imakáloje ina'uké nakiyana wakára'ajeri. ⁸Itejmo'ótaje natámina; imakápo'otaje kaja taka'akaño; napona patáka'atarojlo ipala'ataje napona; iwakára'aje kaja jiñana pechu jácho'oko ne'iyayá. Ilé ke ila'ajika nupuráka'alo aú. Mapeja no'óká ijlo péchují, unká riwemí aú kalé. Nakele unká kaja imalaje najló na'akáloje ijlo nakaje ila'ajíkare najló wemí.

⁹“Mapeja i'ijnajika, unká ijña'alaje ijwa'ató liñeru. ¹⁰Unká kaja ijña'alaje ijwa'ató itulané. Pajluwaja a'arumaká chuja i'ijnajé. Unká kaja ijña'alaje ji'ima'ulaji, ikutiware, kaje ijwa'ató. Nakaje ila'ajíkare najló wemí, na'ajé ijlo a'ajnejí.

¹¹“Iphájika pajimila ejo wakajé, ikulaje palájne'eke ina'uké, iyuríkoloje rijwa'até riñakaré chu. Rijwa'ateja iyurejo re i'imajika ketana. ¹²Imujlúka'ajika ee nañakaré chojé, ajalaka richu i'imakaño. Imá Tupánajlo rila'akáloje palá napechu. ¹³Palá péchuruna ne'emajika ee, nakaje imájikare nakú najló i'imajeri ñaké najló. Eyá unká paala péchuruna ne'emajika ee, imá Tupánajlo rila'aká piyá neká palá.

¹⁴“Eyá unkájika ee nañakaré chiyájena wátala iká, unká kaja ka'ajná nawátalaje ipuráka'alo jema'akana. E itaka'ajé ji'ima'ulá nakiyá mu'upé najimaje, raú nawe'epíkaloje pu'uwaré la'ajeñoka neká, unkale nawátala ipuráka'alo jema'akana. ¹⁵Tupana wajájika pu'uwaré la'ajeñó wakajé, kajrú riwajájika neká, unká wátalaño iká. Riwajaka Sodoma eyájena michuna, eyá Gomorra eyájena michuna wa'até i'imaká, pu'uwaré la'ajeñó wani ne'emakale, chaje wani riwajájika neká unká wátalaño iká”, ke rimaká najló.

Chapú nala'aká Jesucristo ja'apiyá jema'ajeño yukuna marí


¹⁶E kaja Jesús kemari piño najló: “Jema'á marí: Mayuchéruna iká, e'iyonaja nuwakára'a iká chapú péchuruna ejo, ñakele i'imá kapechú najwa'até. Ila'á mana'ija ipéchuwa najwa'até. ¹⁷Ilé ke ri'imajika ijló, jema'akale no'opiyá. Nemaje inaku: ‘Pu'uaré la'ajeño neká’, ke. Raú nawá'aje iká iwakára'ajeño ejo. Awakáka'alo ñakarelana chu naña'ataje iká. ¹⁸Ya'ajná, ajopana chaje wakára'ajeño ejo, nawá'aje kaja iká nawajákaloje iká rejo penaje. No'opiyá jema'ajeño i'imaká jimaje nawajaje iká. Palani ijló ñaké ila'akana, i'imakáloje najló nuyukuna rewá. Unká judíona kalé i'imakáñojlo i'imajé kaja nuyukuna. ¹⁹Nawá'ajika ee iká iwakára'ajeño ejo nawajákaloje iká penaje, iwó la'aniño mékeka imájika najló ja'apí. Riphájikaja rená chojé ijló ipura'akóloje ichayo penaje ee, Tupana kemaje ijló mékeka imájika najló. ²⁰Unká ipechu keja kalé imájika najló. Jara'apá Pechu kemájika ijló, ke imájika najló.

²¹“Ne'iyajena a'ajeño nejena ajopánajlo nenókaloje neká penaje, no'opiyá jema'ajeño ne'emakale; ne'iyajena a'ajeño kaja nayani ajopánajlo nenókaloje neká; ñaké kaja ne'iyajena a'ajika nach'i'iná ajopánajlo nenókaloje neká, no'opiyá jema'ajeño ne'emakale. ²²Kajrú ina'ukena pechu i'imajika chapú inaku, jema'akale no'opiyá. Ña'ajeri panaku ilé ke nala'ajíkare iká, nu'umataje kapichákajo liyá. ²³Nala'ajika ee iká chapú, iñaajó naliyá pajimila ejo, eyá apú pajimila ejo ke, i'imakáloje rewá nuyukuna najló. Unká chiyó iñapata nuyukuna i'imakana piyuke Israel te'eré nakuwá, wakajé nuphaje majó. Ina'uké i'imakáloje nupalamane penaje i'imaká nuká, pa'ajero piño majó.

²⁴“Unká meke la'ajé jewíña'ajero pechu i'imalajla rewíña'atajери chaje; unká kaja meke la'ajé apú wa'até jápajeri i'imalajla rikariwate chaje. ²⁵Palá pipechu i'imá nakaje pewíña'akaro nakú wa'até, pewíña'atajери pechu ke kaja pipechu i'imakale raú. Ñaké kaja apú wa'até jápajeri pechu i'imajika rikariwate pechu ke kaja. Jewíña'atajери nuká, iwakára'ajeri kaja nuká, nemá nakú: ‘Jiñana pechu wakára'ajeri riká’, ke. Ñaké kaja richaje wani napura'ajiko inaku pu'uaré, nujwa'atéjena nakiyana i'imakale.

²⁶“Numá ijló: ikero'oniño ina'uké piyá, unká na kalé i'imajeri me'echuje, unká iná we'epílare nakojé. Piyukeja nakaje ina'uké la'akare i'imajika pu'uwaká. ²⁷Nakaje numakare nakú ijló wekámika ke, eko i'imá riyukuna pu'uwaká kajrú ina'ukénajlo. ²⁸Ikeroniño ina'uké nójeño piyá. Iná napónaja kalé nakapichata,

eyá iná pechu unká meke la'ajé nakapichátalajla. Tupana piyá ikero'ó. Riká kapichátarijla iná napona, iná pechu wa'até, kera'athani unká yakálare chojé, iná taka'aká ejomi. Ñakele ripiyá ikero'ó. ²⁹Mawemiru iyamá kupira'aphana wemí, e'iyonaja unká nataka'alá unkachu jara'apá Tupana yurila nataka'aká. ³⁰⁻³¹Kupira'aphana chaje wani íki'ika riwátaka iká. Piyukeja wani Tupana we'epika nakaje nakojé. Riwe'epí kaja mekeleka iná wilá iná wíla'aru nakú. Ñakele ikero'oniño ajopana ina'ukena piyá, ra'akale rinakojó iká”, ke rimaká najló.



Iná apáña'ako piyá Jesús ja'apí yukuna marí

(Lc 12.8-9)

³²E Jesús kemari piño najló: “Re ka'ajná pajluwa nujwa'ateje, unká apáña'alo no'opí ajopana ina'ukena e'iyá. Raú rimá najló nunaku: ‘Rijwa'ateje nuká’, ke. Ñaké kaja numájika rinaku Nora'apá, je'echú chu i'imakárejlo: ‘Nujwa'ateje riká’, ke. Ñaké waja numájika rijló unká micho'otálaño nuchaya nakú. ³³Eyá apú nujwa'ateje ka'ajná apáña'aro no'opí ajopana ina'ukena e'iyá, raú ka'ajná rimá najló nunaku: ‘Unká rijwa'ateje kalé nuká’, ke. Ñaké kaja numájika rinaku Nora'apá je'echú chu i'imakárejlo: ‘Unká nujwa'ateje kalé riká’, ke. Ñaké waja numájika rijló piyuke micho'otaño nuchaya nakú”, ke rimaká najló.

Jesús puráka'alo jimaje ne'iyajena pechu i'imaká chapú panakuwáaka yukuna marí

(Lc 12.51-53; 14.26-27)

³⁴E rimá piño najló: “Apala ipechu nunaku: ‘Majó riphá ra'akáloje wañathé, we'emakáloje palá pajwa'atéchaka, wapechu i'imaká piyá chapú panakuwáaka’, ke. Unká ilé kaje penaje kalé nuphá majó. ³⁵Apala nupuráka'alo ja'apiyá jema'akana jimaje

ka'ajná ri'irí pechu i'imajé chapú rara'apá nakú; ñaké kaja ka'ajná rutu pechu i'imajé roló nakú chapú. Apala nupuráka'alo ja'apiyá jema'akana jimaje ru'urinó pechu i'imajé chapú ruyajneru nakú. ³⁶Ilé ke ka'ajná ne'iyajena i'imajika pajwa'atéchaka nejena wa'até, na'akale nanakojó nupuráka'alo.

³⁷“Wátari rara'apá ka'ajná, raló ka'ajná, nuchaje íki'ika, unká meke la'ajé ri'imajajla nujwa'ateje. Wátari ri'irí ka'ajná, ritu ka'ajná, nuchaje íki'ika, unká kaja meke la'ajé ri'imajajla nujwa'ateje. ³⁸Eyá kero'oró no'opiyá jema'akana piyá, nenoka piyá riká, unká kaja meke la'ajé ri'imajajla nujwa'ateje.

³⁹Ina'uké nakiyana we'epiño khaí nanakuwá. Ilé ke we'epíkaño nanakuwá khaí, kapichájeño Tupana liyá. Eyá unká we'epílaño khaí nanakuwá, ne'emakáloje nujwa'atéjena penaje, i'imajeño matajnako nujwa'até je'echú chu.

⁴⁰“Palá pechu i'imaká no'opiyá jema'ajeño nakú, pechu palá kaja nunaku. Wátari nuká, wátari kaja wakára'ari nu'umaká majó. ⁴¹Ila'akachu palá Tupana puráka'alo ja'apátajeri nakú, palá ila'aká raú. Tupana a'ajika ripuráka'alo ja'apátajeriijlo riwemí, ke kaja ra'ajika palá ila'akare riká wemí. Ila'akachu nakaje apujlo, palá la'ajerí ri'imakale, palá kaja ila'aká raú. Tupana a'ajika palá la'ajeriijlo rila'akare wemí, ke kaja ra'ajika ijló riwemí. ⁴²Apala pajluwa la'arí apú nakú palá, no'opiyá jema'ajeri ri'imakale. Ra'á ka'ajná rijló juni ipe'élani ri'irakáloje penaje. Ilé ke rila'akale riká palá, Tupana a'ajé rijló riwemí”, ke Jesús jewíña'ataka ra'apiyatéjena i'imaká.

Juan el Bautista wakára'aka ra'apiyatéjena nakiyana i'ijnaká Jesús chaje yukuna marí

(Lc 7.18-35)

11 ¹Jesús ñapátaka iyamá iphata ji'imaji nakojé kele (12) riyawe'ená i'imakaño jewíña'atakana ejomi, ri'ijná piño apú, apú ewá ke ina'uké jewíña'atakana Tupana nakú.

²Ina'uké wajakelana chu Juan el Bautista i'imaká wakajé, rema'á piyuke nakaje Jesús la'akare yukuna, raú riwakára'a ra'apiyatéjena nakiyana i'ijnaká ramaje. ³Nephaka Jesús nakú ee, nemá rijló:

—Wawakára'ajeri kemari pinaku: “¿Piká chi riká kele nemakare nakú i'imaká, iphájeri majó we'ematájeri penaje? Wawátaje ka'ajná re jo'ó kaja apú. ¿Meke chi riká?”, ke rimaká pinaku.

⁴Jesús kemari najló:

—Ipa'ó Juan ejo, i'imachi rijló mékeka amíchaka nula'aká nakaje yukuna. Nakaje nowíña'atakare nakú yukuna wa'ató i'imá kaja rijló. ⁵Eko imá rijló nunaku: “Mejluruna i'imakaño liyá ra'apata mejlukaji, namákaloje palá penaje. Unká meke la'ajé ja'apálaño, ritejmo'ota kaja na'apákaloje palá; napona patáka'atakarojlo ripala'atá kaja napona palá; unká jema'alaño liyá ra'apata kaja me'ejwíkaji nema'akáloje penaje; támijimina nakiyana rimakápo'ota kaja; kamu'ují la'akáñojlo ri'imá Tupana i'imataka iná kapichákajo liyá yukuna. Ilé kaje la'akana nakú riká. ⁶Pu'ují péchuruna unká la'alájeño ujwí napéchuwa nuliya i'imajika”, ke imájika Juanjlo nunaku.

⁷E napa'ó. Rejomi Jesús kemari ripuráka'alo jema'ajéñojlo Juan nakú: “Iká i'ijnakeño desierto ejo ripuráka'alo jema'ajé. Unká i'ijnaké rejo, amákaloje iyamá chuwa péchuri penaje, unká iyamá chuwa péchuri kalé ri'imakale. ⁸¿Amákaloje palá a'arumakari penaje chi i'ijnaké rejo? Unká kaja palá a'arumakari kalé ri'imaká. Kaja iwe'epí palá mékajenaka palá a'arumakáruna. Nawakára'ajeño ñakaré chiyájena a'arumaká palá nojé. ⁹Eta, ¿naje chi i'ijnaké rejo ramaje? ¿Amákaloje Tupana puráka'alo ja'apátajeri penaje chi i'ijnaké rejo? Riká jo'ó ri'imaká. Ajopana, Tupana puráka'alo ja'apátajeño michuna i'imaká, chaje wani riká. ¹⁰Tupana puráka'alo lana'akéjami kemari rinaku:

‘Nuwakára'aje pajluwaja ina'uké i'ijnaká pitukumá rilamá'atakaloje ina'uké pechu pipé, pu'uwaré nala'akare liyá’, ke Tupana kemaká Juan nakú, unká chiyó riphá marí eja'awá nakojé i'imaká”, ke Jesús kemaká najló.

¹¹Rimá piño najló: “Jema'á marí: Marí eja'awá chu unká na apú i'imalaje chá'atajери Juan, ri'imakáloje richaje penaje. Eyá je'echú chu na'apejé wani i'imaká nakiyana i'imajeri Juan chaje.

¹²“Juan i'imaká Tupana yukuna ina'ukejlo wakajé, eyá maárejecha, wechi kajrú ina'ukena wátaka Tupana wa'atéjena i'imakana. Napechu lokópa'ala nala'á nakaje, ne'emakáloje rijwa'atéjena penaje. ¹³Tupana puráka'alo ja'apátajeño michuna, eyá Moisés michú, kele lana'año riyukuna i'imaká. Nemá: ‘Riká i'imajeri ina'uké wakára'ajeri penaje’, ke nemaká Juan nakú, unká chiyó ri'imá. ¹⁴Tupana kemari kaja rinaku: ‘Nuwakára'aje piño majó nupuráka'alo ja'apátajeri Elías’. Juan el Bautista nakú rimá Elías, ke i'imaká. ¹⁵Ke'ejwiruna i'imajika ee, a'á inakojó ilé numakare nakú”.

¹⁶Rimá kaja najló: “Marí ke ina'uké me'etení i'imakaño: Yuwaná yá'ano le'ejepelaji ñakarelana chu kátakajo nakú, keja

neká. E nawa'á i'imakaño, najwáke'enajlo nemá: ¹⁷‘Wapho'ó ijlo kewirí chojé i'imaká, e'iyonaja unká arápa'ala. Wataní kaja ijlo jema'kaji i'imaká, e'iyonaja unká ipechu la'aló kamu'ují rema'akana aú', ke nemaká najló”.

¹⁸“Juan iphari majó i'imaká, ri'itakó ra'ajné liyá ripechu i'imakáloje Tupana nakuja. Unká kaja ri'iraké nakaje jalá amúra'atakanami, e'iyonaja imaké rinaku: ‘Jiñá pechu re'iyá', ke. ¹⁹Eyá nuká iphari majó ina'uké i'imakáloje nupalamane penaje. Ajñaka a'ajnewá, ke kaja nojñaka no'ojnewá. Ñaké kaja nu'uraká nakaje jalá amúra'atakanami, raú imá nunaku: ‘Kawale'eké riká ta; i'irakachi kaja riká; unká ina'ukélaruna wáke'ewe kaja riká; liñeru ña'ajeño ne'emakánajlo wáke'ewe kaja riká', ke imaká nunaku. E'iyonaja iná we'epí nakaje Tupana la'akare jácho'ojiko palá”, ke Jesús kemaká najló.

Jesús akha'aká ina'uké unká jema'alaño Tupana ja'apiyá yukuna marí

(Lc 10.13-15)

²⁰Kajrú Jesús la'ajika nakaje pajimila ewá Tupánaja kalé we'epíkare la'akana, e'iyonaja unká rewájena pajno'otake napéchuwa, pu'uwaré nala'akare liyá, raú rakha'á namaná marí ke: ²¹“Chapú wani nakaje i'imajika pajimila Corazín eyájenajlo, ñaké kaja ri'imajika pajimila Betsaida eyájenajlo. Kajrú namaka nula'aká nakaje rewá Tupana Pechu aú, rikaja kalé we'epíkare la'akana, e'iyonaja unká nema'alá no'opiyá. Unká kaja napala'atala napéchuwa, pu'uwaré nala'akare liyá. Tupana la'akela ñaké kaja nakaje pajimila Tiro ewá, pajimila Sidón ewá wa'até, kajrú rewájena pajno'otákajla napéchuwa, pu'uwaré nala'akare liyá, riká ejo. Na'ajla nanakuwá pu'uwaré nojé a'arumakaji. Naka'ajla kaja nachó pa'ilá, raú ina'uké we'epíkaloje kaja napajno'otaka napéchuwa, pu'uwaré nala'akare liyá, Tupana ejo. ²²Tupana wajájika pu'uwaré la'ajeño wakajé, riwajaje richaje wani Corazín eyájena, ñaké kaja Betsaida eyájena. Kajrú riwajaka pajimila Tiro eyájena michuna, eyá Sidón eyájena michuna i'imaká riwakajé. Chaje wani riwajájika neká. ²³Eyá pajimila Cafarnaúm e i'imakaño pechu nanakuwá: ‘Je'echú chu i'imajíkaño penájena weká', ke, e'iyonaja unká ñaké kalé ne'emajika. Kawakala ejo naka'ajé neká, nakapichákolaje rejé penaje. Kajrú nula'aká nakaje rewá i'imaká. Nula'akela ñaké kaja pajimila Sodoma ewá, re jo'ó kaja ri'imakajla me'etení. ²⁴Tupana wajájika

pu'uaré la'ajeño wakajé, pajimila Sodoma eyájena michuna riwajaka i'imaká, chaje wani riwajájika iká”, ke Jesús kemaká najló.

Jesús kemari: “T'ijná nuchaje iwatána'akaloje penaje”.

Riyukuna marí

(Lc 10.21-22)

²⁵ Jesús pura'aró Tupana wa'até, rimá rijló: “Nora'apá, eja'awá, je'echú wa'até, minárikana piká. Palá pila'aká nuká, pila'akale ina'uké nakiyana palá. Yuwaná pechu, ke kaja péchuruna neká. Nawe'epí kewákaje puráka'aloji, numakare nakú najló, nakoje. Eyá kajrú jewíña'akañojlo, kapechúrunajlo me'echuje jo'ó riká. ²⁶Nora'apá, kaja keja piwátaka najló ri'imaká”, ke rimaká rijló.

²⁷E rimá piño re i'imakáñojlo: “Nora'apá a'arí nuká nu'umakáloje piyukeja wakára'ajeri penaje. Unká na kalé we'epiri na wánika nuká, Ri'irí. Rikaja kalé, Nora'apá, we'epiri naka nuká. Unká kaja na kalé we'epiri na wánika Nora'apá. Nuká, Ri'irija kalé, we'epiri naka riká. Nu'umá nuwátakarenajlo riyukuna, nawe'epíkaloje naka riká penaje. ²⁸Nakaje ne'iyajena wakára'akare ila'aká, ri'imakáloje palá Tupana nakú penaje, laka'apheji rila'akana ijló. Kaja jaya'ó rinaku. Ijló numá: Iyurí ichó nojló nu'umakáloje iñathé a'ajeri, iwatána'akaloje nakaje laka'apheji ila'akare liyá. ²⁹Ila'á nujwa'até nakaje nuwakára'aka iká ke; jewíña'o kaja nupuráka'alo nakú. Unká nuyúcha'alo ijwa'até; unká kaja nula'alá nokó kajrú la'aká ke. Ilé kaje aú palá ipechu i'imajika. ³⁰Nakaje, nuwátakare ila'aká nujwa'até, unká laka'apheji kalé riká; unká kaja jaya'alajo rila'akana nakú”, ke Jesús kemaká najló.

Watána'akaje i'imaká wakajé Jesús ja'apiyatéjena chíra'aka wejapa trigo nakiyana yukuna marí

(Mc 2.23-28; Lc 6.1-5)

12 ¹ Watána'akaje i'imaká wakajé, Jesús ja'apari ají ke iñ'epú chuwá ra'apiyatéjena wa'até. Iñ'epú, na'apákare chuwá, ja'apari ajopana mená e'iyowá. Re'iyá kajrú trigo i'imaká. Kewí me'epijí i'imaká najló aú, na'apaka re'iyowá nakuwaja nachíra'a wejapa trigo icha nakiyana. Riká natojro'ó nakápojo najñákaloje penaje. ² Fariséona nakiyana ja'apaño kaja najwa'até. Ilé ke namaka Jesús ja'apiyatéjena chíra'aka trigo icha nakiyana aú, nemá rijló:

—¡Piyaka'o! Chuwajá watána'akaje jená, e'iyonaja kajona pa'apiyatéjena jápaño. Unká nala'alá Moisés puráka'alomi lana'akéjami kemaká ke.

³Raú Jesús kemari najló:

—Palá iwe'epika mékeka Tupana puráka'alo lana'akéjami kemaká David michú nakú i'imaká. Kewí rijló me'epijí i'imaká, ñaké kaja rijwa'até chira'akáñojlo. ⁴Akuwaná rimujlúka'a Tupana ñakaré chojé pan, Tupánajlo na'akare i'imaká penájemi, ajñaje. Sacerdótenaja kalé ajñáñojla riká, e'iyonaja rajná ri'imaká. Ra'á kaja rijwa'atéjenajlo rinakiyana. ⁵Iwe'epí kaja mékeka Moisés puráka'alomi kemaká sacerdótena nakú: “Unká nawatána'alaje watána'akaje wakajé, riwakajé nala'akale najápaka'ala Tupana ñakaré chu, e'iyonaja kalé unká nala'alá pu'uaré raú”, ke rimaká nanaku. ⁶Ñakele numá ijló: Palani ijló Tupana ñakaré, e'iyonaja re pajluwa maare richaje palaka. ⁷Tupana puráka'alo kemari rinaku: “Pirájina nókana nojló pu'uaré ila'akare chaya, chaje wani nuwátaka iwe'epika ajopana mu'ují”, ke. Numá ijló: Iwe'epíkela palá ilé kaje nakojé, unká imalajla mapeja ajopana nakú: “Pu'uaré la'ajeño neká”, ke. ⁸Ina'uké i'imakáloje nupalamane penaje i'imaká nuká. Ñakele nuká kemari ijló naka la'akana palani watána'akaje wakajé.

Jesús lamá'ataka kaja yáthe'ela a'amitakó rijló yukuna mari

(Mc 3.1-6; Lc 6.6-11)

⁹E kaja Jesús jácho'oro reyá, mujlúka'ari nawakáka'alo ñakarelana chojé. ¹⁰Re pajluwaja i'imari najwa'até, kaja yáthe'ela a'amitakó. Re kaja ajopana i'imaño najwa'até re, neká wátaño Jesús nakú kemakana: “Pu'uaré la'ajerí riká”, ke. Raú nemá rijló:

—¿Meke chi Tupana puráka'alo lana'akéjami kemaká rinaku? ¿E chi palani riyáthe'ela lamá'atakana watána'akaje jená wakajé?

¹¹Jesús kemari najló:

—Apala pajluwa ipirá oveja ka'ajná ja'arolja ulawí chojé watána'akaje wakajé. ¿Unká chi jácho'otalajla riká richiyá riwakajé? ¹²Oveja chaje íki'ika iná wátaka ina'uké, ñakele palani nanaku la'akana palá, watána'akaje wakajé wa'ató.

¹³E rimá yáthe'ela a'amitárojlo:

—Piya'atá nojló majó piyáthe'ela.

Raú riyá'ataka rijló riká ejéchami, riyáthe'ela pala'akó rijló palá. Apú riyáthe'ela keja riyuriko rijló palá rejéchami. ¹⁴Ilé ke fariséona amaka aú Jesús la'aká watána'akaje wakajé aú, nácho'o reyá napura'akóloje pajwa'atéchaka rinókana nakú.

**Nakaje Tupana puráka'alo ja'apátajeri kemakare
Jesús nakú júpimi i'imaká ke yukuna marí**

¹⁵ Jesús we'epiri napura'akó rinókana nakú, raú rácho'o reyá. Kajrú ina'ukena i'ijnaká rijwa'até. Natámina i'imakaño ritejmo'ota piyuke. ¹⁶ Rimá najló, ne'emaká piyá riyukuna ajopánajlo, nawe'epika piyá na wánika ri'imaká. ¹⁷ Tupana puráka'alo ja'apátajeri Isaías michú i'imari riyukuna júpimi ke i'imaká, unká chiyó Jesucristo iphá eja'awá nakoje. Rimá rinaku i'imaká:

¹⁸ “Nojló nakaje la'ajeri riká.

Ajopana e'iyayá nu'uwapá nujuwa ri'imaká.

Íki'ija nuwátakare riká.

Pu'ují kaja nupechu rinaku.

Rijló no'ojé Nupechu.

Palá nula'akare ina'uké nakú yukuna ri'imajé najló.

Ajopana, unká judíona kalé i'imakaño nakiyana, wa'ató jema'ajeño kaja riyukuna.

¹⁹ Unká rakha'ákalajo ajopana wa'até;

unká kaja rawíyo'olaje najló.

²⁰ Ra'ajé chapú kaje yajwé amájeño ñathé;

ra'ajé kaja ujwí péchuruna ñathé.

Ilé ke rila'ajika, palá la'ajeño wakára'ajeri ri'imajíkale.

Rejomi unká pu'uwaré la'akaná i'imalaje.

Rejéchami palá ina'uké i'imajika pajwa'atéchaka, reyá a'ajná ño'ojó.

²¹ Piyukeja ina'ukena, eja'awá chu i'imakaño, pechu i'imajika

kaphí richojé”, ke Isaías lana'aká Jesucristo yukuna i'imaká.^b

Ne'iyajena kemaño Jesús nakú: “Jiñá pechu wa'ateje riká”.

Riyukuna marí

(Mc 3.29-30; Lc 11.14-23; 12.10)

²² Nawa'a pajluwa mejlurú Jesús ejo. Manumarú kaja ri'imaká; jiñá pechu i'imari kaja re'iyá. Jesús pala'ataka riká ejomi, palá ripura'akó, palá kaja ramaka. ²³ Raú ramájeño pechu i'imá Jesús nakú: “¡Meke piyuke wani rila'alaka!” Nemá pajlokaka:

—¿Riká chi kele nemaké nakú jupeje, waícha majó ina'uké i'imatájeri penaje?

²⁴ Fariséona nakiyana jema'año nemaká ilé ke rinaku, raú nemá najló:

—Jiñana wakára'ajeri, Beelzebú, pechu aú riwakára'a jiñana pechu jácho'oko ina'uké e'iyayá.

²⁵ Jesús we'epiri mékeka napechu i'imaká rinaku, raú rimá najló: “Ajopana wakára'ajeri wa'atéjena nókakelo pajwa'atéchaka, nakapichátajla pekowáaka raú. Ñaké kaja iná ejena nókakelo pajwa'atéchaka, nakapichátajla kaja pekowáaka. ²⁶ Ñaké kaja riká Satanás, Jiñá Chi'inárikana. Rijwa'atéjena piyuke jiñana pechu. Rika'akela neká ina'uké e'iyayá, rila'ajla chapú rikó. Rejéchami unká meke rila'alajla, unkale rijwa'atéjena i'imalajla. ²⁷ Iká kemaño nunaku: ‘Beelzebú, jiñana wakára'ajeri, pechu aú riwakára'a jiñana pechu jácho'oko ne'iyayá’, ke. Eta, ja'apiyatéjena ka'año kaja jiñana pechu ina'uké e'iyayá. ¿Ñaké kaja chi imaká nanaku? Neká we'epiño kaja: unká kewaka kalé riká imakare nakú. ²⁸ Tupana Pechu aú nuwakára'a jiñana pechu jácho'oko ina'uké e'iyayá, ñakele ilé kaje aú iná we'epí kaja Tupana keño'oká ina'uké nakiyana wakára'ajeri i'imakana”, ke rimaká najló.

²⁹ E Jesús i'imari ilé yuku najló, nawe'epíkaloje raú richá'ataka Jiñá Chi'inárikana. Rimá najló: “Unká na kalé mujlúka'arijla katejmuni ina'uké ñakaré chojé rinane ña'ajé riliyá. Apú richaje katejmuka iphákela rinaku, riká jepo'otárijla riká. Kéchami rijña'atákajla rinane riliyá”, ke ri'imaká yuku najló, raú nawe'epíkaloje richá'ataka Jiñá Chi'inárikana.

³⁰ Rimá piño najló: “Unkachu ne'iyajena wátala nuká, chapú napechu nunaku. Unkachu nala'alá ina'uké nakú palá nujwa'até, napajno'otá napechu Tupana liyá apo'ojó.

³¹ “Tupana amaro ina'uké chaje piyukeja pu'uwaré nala'akare liyá, eyá pu'uwaré nemakare Tupana Pechu nakú, rikaja kalé unká ramálajo chaje. ³² Ina'uké i'imakáloje nupalamane penaje i'imaká nuká. Pu'uwaré, ina'uké kemakare nunaku, liyá Tupana amojla nachaje. Eyá pu'uwaré, nemakare Tupana Pechu nakú, ilé kalé unká ramálajo chaje. Ñaké riká me'etení; ñaké kaja ri'imajika reyá a'ajná ño'ojó i'imajíkañojlo”.

Iná we'epí ina'uké nakojé mékajenaka neká, nakaje nemakare nakú aú, nakaje nala'akare aú wa'ató. Riyukuna marí

(Lc 6.43-45)

³³ “Palani a'awaná i'imakachu, palani kaja richa. Eyá pu'uwareni a'awaná i'imakachu, pu'uwareni kaja richa. Richa aú iná we'epí mékajeka a'awaná palani, eyá mékajeka pu'uwareni. Ñaké kaja iná we'epika mékajenaka ina'uké. ³⁴ Pu'uwaré péchuruna iká, ñakele unká meke la'ajé ipura'aló palá nakaje nakú. Iná pechu nakú nakaje

i'imaká, ke iná pura'akó. ³⁵Palá péchuri pura'aró kaja palá nojé puráka'aloji nakú ripechu lokópa'ala. Eyá pu'uaré péchuri pura'aró kaja pu'uaré nojé puráka'aloji nakú ripechu lokópa'ala. ³⁶Kaja penaje riphájika rená chojé wakajé, Tupana kemaje inaku mékeka rila'ajika iká. Riwakajé riwajaje inakiyana, pu'uaré imakare nakú pachá. ³⁷Nakaje, imakare nakú, nakoje rimaje mékajenaka iká. E'iyajena riwajaje ipuráka'alo pachá", ke Jesús kemaká najló.

**Unká ina'ukélaruna kemaño Jesusjlo rila'akáloje nakaje
Tupánaja kalé we'epíkare la'akana. Riyukuna marí**

(Mc 8.12; Lc 11.29-32)

³⁸E kaja fariséona nakiyana, eyá Tupana puráka'alo nakú jewíña'atajeño nakiyana wa'até, kemaño Jesusjlo:

—Jewíña'atajeri, eko pila'á wajló nakaje Tupánaja kalé we'epíkare la'akana.

³⁹Rimá najló:

—Pu'uaré la'ajeño unká la'alá Tupana wátaka ke. Nekaja kalé wátano nula'aká najló nakaje rikaja kalé we'epíkare la'akana. Unká nula'alaje ijlo rika. Kaja iwe'epí mékeka Tupana la'aká ripuráka'alo ja'apátajeri Jonás michú i'imaká. Ri'imaká rijló, ke kaja ri'imajika nojló. ⁴⁰Weji ke kala ketana Jonás i'imaká kajruni wani jiña wo chu. Ñaké kaja nu'umajika liri chu weji ke kala ketana. Ina'uké i'imakáloje nupalamane penaje i'imaká nuká.

⁴¹Nínive e i'imakaño penájemina kemájeño Tupánajlo, kaja penaje riphájika rená chojé wakajé, riwajákalaje iká penaje. Neká pajno'otaño napéchuwa, pu'uaré nala'akare liyá, Tupana ejo i'imaká, Jonás i'imakale najló Ripuráka'alo yukuna. Eyá iká unká jema'alaño no'opiyá nupuráka'alo, Jonás chaje nu'umaká e'iyonaja.

⁴²Ñaké kaja kawakajo pitá i'imakaño i'imakánaru kemájika inaku Tupánajlo, riwajákalaje iká penaje. Ruká micholo i'ijnayo ya'ajnaje Salomón michú chaje ripuráka'alo jema'ajé. We'epiri wani ri'imakale, ru'ujná rejo. Eyá maare nuká ijwa'até me'etení, Salomón chaje wani nuwe'epika nakaje nakoje, e'iyonaja unká a'alá inakojó nupuráka'alo —ke rimaká najló.

Jesús i'imaká najló meke jiña pechu pa'akó piño yukuna marí

(Lc 11.24-26)

⁴³Jesús i'imari najló marí yuku: “Jiña pechu jácho'ochako pajluwaja ina'uké e'iyayá ejomi, ra'apicha desierto chuwa pukunaji kulákana nakú rijluwa, re riwatána'akaloje penaje. E'iyonaja unká riphátalacha rika, ⁴⁴raú rimicha: ‘Nupa'ajíkoja

nuñakaremi ejo, ilé ina'uké nócho'okaro i'imaká e'iyayá ejo'. Raú ripi'ichó piño rapumí chuwa, amíchari palani ri'imichaka, palá lamá'atakeja ke ri'imichaka ripé. ⁴⁵Raú ri'ijichá iyamá kuwá'ata kele jiñana pechu wá'aje rijwáke'ena penaje. Richaje chapújne'ekena ne'emichaka. Neká piyukeja mujlúki'ichaño ilé ina'uké e'iyajé, ne'emakáloje riwakára'ajeño penaje. E kaja penaje chapújne'eke wani ilé ina'uké i'imichaka na'apiyá i'imakana aú. Júpimi ri'imaká chaje wani chapújne'eke ri'imichaka na'apiyá", ke ri'imaká najló yuku. Rejomi rimá najló: "Ñaké kaja ri'imajika la'año pu'uwaré me'etenijlo".

Jesús jaló, rejena wa'até, i'ijnaká ramaje yukuna marí

(Mc 3.31-35; Lc 8.19-21)

⁴⁶Jesús i'imari kajrú ina'ukena wa'até phachu. Yuku ri'imá najló, e Jesús jaló, rejena wa'até iphaño rejo. Nawata rijwa'até pura'akano, ⁴⁷raú pajluwa kemari Jesusjlo:

—Paló iphíchayo pejena wa'até pají kópeje. Nawata pijwa'até pura'akano.

⁴⁸Rimá rijló:

—¿Mékajeru chi noló, eyá nojena?

⁴⁹Raú riya'atá ra'apiyatéjena chaje.

—Mariruna noló, nojena ke nojló. ⁵⁰La'año nakaje Nora'apá, je'echú chu i'imakare, wakára'aka ke, neká noló, eyá nojena ke nojló —ke rimaká najló.

Nakaje icha ijí ejátajeri yukuna marí

(Mc 4.1-9; Lc 8.4-8)

13 ¹E kaja Jesús jácho'oro pají chiyá, i'ijnari kaéja turenaje. Re riya'o. ²Rejé kajrú ina'ukena awakako rinakojé, raú riwítúka'a wapuru chojé yá'ajo, eyá neká yuriño ke'epé nakú. ³E ri'imá najló yuku rewíña'atakaloje neká Tupana nakú raú. Rimá najló: "Pajluwaja ina'uké i'ijichari nakaje icha ijí ejátaje. ⁴Te'erí mojyo'okéjami e'iyowá ri'ijichá rejátaje. Rika'akana nakú ri'ijichá re'iyowá. Richa ijí riki'ichaje nakiyana ja'acharo iñe'epú chojé. Riká kupira'aphana ajmílo'otiya piyuke. ⁵Apú richa ijí riki'ichaje nakiyana ja'acharo jipa nakojé. Wejápaja te'erí i'imichákale rinaku aú kiñaja reño'ochákajla, ⁶e'iyonaja kamú meríya'atiya riká kiñaja, unkale ra'apare i'imalacha palá aú. ⁷Eyá apú richa ijí riki'ichaje nakiyana ja'acharo pu'uwareni jimichi e'iyajé. Riká jimichi iphíchari nakaje icha ijí rejátiyaje wa'até. Riká tawáña'ichari riká, raú

riwajri'ichá re'iyajé, unká rarúka'alacha. ⁸Eyá apú richa ijí riki'ichaje nakiyana ja'acharo palani te'erí e'iyajé. Ilé iphíchari palá; palá kaja ritawá'ichako; palá kaja rarúki'ichaka. Ke'iyapé rarúki'ichaka: re'iyajé a'achari cien ka'alá richawá; re'iyajé a'achari sesenta ka'alá ewá richawá; eyá re'iyajé a'achari treinta ka'alá ewá richawá”, ke ri'imaká yuku najló. ⁹E Jesús kemari rema'ajéñojlo: “Jema'á palá, a'á inakojó riyukuna”.

**Jesús kemari ne'iyajénajlo nájeka ri'imaká yuku najló.
Riyukuna marí**

(Mc 4.10-12; Lc 8.9-10)

¹⁰Riñapátakaja najló yuku i'imakana ejomi, ra'apiyatéjena i'ijnaño Jesús awa'ajé, nemá rijló: “¿Naje chi pewíña'ata ina'uké yuku kaje i'imakana najló aú?”

¹¹Rimá najló: “Ijló Tupana a'á pu'uwaká nakaje me'echú i'imakare, iwe'epíkaloje rinakojé penaje. Eyá ajopánajlo me'echú jo'ó riká me'etení. ¹²Ñakele jema'ajeño Tupana puráka'alo ja'apiyá, we'epéjeño richaje, richaje ke, rinakojé. Eyá ajopana, unká jema'alájeño Ripuráka'alo ja'apiyá, unká we'epílaje rinakojé. Wejápaja nawe'epíkare rinakojé kapichájero napechu nakiyá. ¹³Ñakele nowíña'ata neká yuku aú. Nema'ajejla riyukuna, e'iyonaja unká nawe'epílaje meke kemakánaka ri'imajika. Unká kaja nawe'epílaje nakaje namájikare nakojé. ¹⁴Kaja júpimi ñaké Tupana puráka'alo ja'apátajeri Isaías michú i'imaká nayukuna marí ke:

‘Nema'ajejla riyukuna,
e'iyonaja unká nawe'epílaje meke kemakánaka ri'imajika.
Namájejla piyukeja nakaje,
e'iyonaja unká nawe'epílaje meke kemakánaka nakaje
namájikare i'imajika.

¹⁵Ilé ke ri'imajika najló, ijnú nema'akale no'opiyá,
pachá unká riphálaje napechu nakojé palá.
Unká kaja nawe'epílaje meke kemakánaka ri'imajika.
Unká nayurílaje nachó nojló nulamá'atakaloje palá napechu',
ke Tupana kemaká nanaku Isaíasjlo i'imaká”, ke Jesús kemaká najló.^c

¹⁶Rimá piño najló: “Eyá iká no'opiyatéjenajlo, unká ñaké kalé riká. Palani ijló riká, palá jema'akale riká. Palá kaja riphaka ipechu nakojé; iwe'epí kaja meke kemakánaka nakaje

amákare. ¹⁷Ñaké júpimi Tupana puráka'alo ja'apátajeño, palá la'ajeño wa'até, wátaka nakaje amákana, iká amaka me'etení riká ke kaja, e'iyonaja unká ri'imalá ñaké najló riwakajé i'imaká. Ñaké kaja nawátakajla nupuráka'alo jema'akana, jema'aká riká me'etení ke, e'iyonaja unká nema'alá ñaké ri'imaká riwakajé”, ke rimaká najló.

Jesús jewíña'atari neká meke kemakánaka nakaje icha ijí ejátajeri yukuna. Marí riyukuna

(Mc 4.13-20; Lc 8.11-15)

¹⁸“Chuwa, jema'á meke kemakánaka kele nakaje icha ijí ejátajeri nu'umichá yukuna ijló: ¹⁹Ne'iyajena jema'año Tupana puráka'alo yukuna, e'iyonaja unká nawe'epila palá meke kemakánaka riká, raú kiñaja Jiña Chi'inárikana ka'aká napechu nakiyá ripuráka'alo wejápaja nawe'epíkare nakojé. Nakaje icha ijí iñe'epú chojé ja'akaro, ke kaja neká. ²⁰Eyá richa ijí, jipa wejápaja te'erí i'imakare nakojé ja'akaro, ña'arí panaku meketánaja riphaka ejomi. Ke kaja ne'iyajena jema'aká palá Tupana puráka'alo. Pu'ují napechu la'akó raú. ²¹Meketánaja kalé napechu palá rinaku, e'iyonaja nawátakale ripuráka'alo ja'apiyá i'imakana, ajopana ka'ajná la'año neká chapú. Napura'ó ka'ajná nanaku pu'uwaré. Chapú kaje yajwé ka'ajná namaka aú, nayurí naliyó riká, unkale napechu i'imalá kaphí richojé.

²²“Eyá richa ijí nakiyana, pu'uwareni jimichi e'iyajé ja'akaro, iphari meketana i'imajemi. E'iyonaja riwajra'á re'iyajé, raú unká rarúka'ala. Ke kaja Tupana puráka'alo jema'ajeño nakiyana. Nakeño'ó ra'apiyá i'imakana, e'iyonaja kajrú na'aká nanakojó nakaje marí eja'awá chu i'imakare, napechu i'imakale: ‘Palá wani we'emajika kajrú liñeru, ñó'ope le'ejepelaji kaje wa'até’. E'iyonaja unká ñaké kalé riká ina'ukejlo. Ilé ke péchuruna ne'emakale, unká na'alá nanakojó Tupana puráka'alo, nala'akáloje palá ra'apiyá i'imakana aú. ²³Eyá richa ijí nakiyana, palani te'erí e'iyajé ja'akaro, jeño'orí palá. Palá ritawá'ako; palá kaja rarúka'aka. Ina'uké nakiyana ke kaja riká. Nema'á Tupana puráka'alo; nawe'epí kaja meke kemakánaka riká; na'á kaja nanakojó riká, raú nala'á palá ra'apiyá i'imakana aú. Apala nakaje icha ijí nakiyana palá tawá'ako arúka'ari cien ewá ka'alá ka'ajná, sesenta ewá ka'alá ka'ajná. Ñaké kaja riká Ripuráka'alo ja'apiyá i'imakáñojlo. Ne'iyajena la'año palá wani kajrú, eyá ajopana ra'apejé kemachi, ra'apejé ke nala'aká palá”, ke Jesús jewíña'ataka neká.

Jesús i'imaká najló jimichi, eyá trigo, kele yukuna marí

²⁴“Ina'uké nakiyana wakára'ajeri, Tupana. Chuwa nu'umajika yuku ijló, iwe'epíkaloje rinakojé penaje: Pajluwa ina'uké i'ijichari trigo ejátaje ri'ikakapere e'iyá. E kaja riñapátiya rejátakana. ²⁵Lapí rikamátiyako cháyomi, apú chapú rinaku péchuri iphíchari ri'ikakapere e'iyajé jimichi pu'uwaré nojé ejátaje. Rejátiyaka riká ejomi, ripi'ichó. ²⁶E kaja trigo tawá'icho ri'ikakapere e'iyá. Ewá riwirulá li'ichako rarúka'akaloje penaje. Rejéchami rijwa'atéjena amíchaka kajrú jimichi, trigo ke amákanami, i'imichaka re'iyá. ²⁷Ilé ke rijwa'até jápajeño amíchaka aú, ne'ejichá paminajlo kemaje: ‘Palani ko trigo ijí pejata i'imaká. Eta, ¿méreya chi pu'uwareni jimichi iphajla kajrú wani re'iyá?’ ²⁸Raú paminá kemíchari najló: ‘Chapú nunaku péchuri ta ejátari re'iyowá riká’, ke. Raú nemicha rijló: ‘¿E piwátaka we'ejnaká rero'otaje?’ ²⁹‘Unká’, ke rimíchaka najló. ‘Reja ri'imaláreja ñaké, apala jero'ojla trigo nakiyana rijwa'até. ³⁰Reja ri'imareja. Richa ña'akana iphájika rená chojé wakajé, nuwakára'aje nujwa'até jápajeño pu'uwaré nojé jimichi jero'otaje re'iyayá. Rejomi nepo'otaje riká nakára'atakaloje riká. Kéchami najña'ajika trigo icha, nalamá'atakaloje riká riñakarelana chojé penaje’, ke rimíchaka najló”, ke Jesús imaká najló yuku.

Mostaza icha ijí yukuna marí

(Mc 4.30-32; Lc 13.18-19)

³¹Jesús i'imari piño najló yuku marí ke: “Ina'uké nakiyana wakára'ajeri Tupana. Wejápaja rijwa'atéjena me'etení; a'ajná ño'ojó chami richaje ne'emajika. Mostaza icha ijí ñani, nejátakare ne'ekakapere e'iyowá, ke neká. ³²Kapajé nojé wani richa ijí. Unká na apú icha ijí i'imalá marí eja'awá chu riká ke kapajé nojeka, e'iyonaja jíma'alami yenuna nojé ketana kaja ritawá'ako. Kajrú kaja ri'iché, ripaná e'iyowá kupira'aphana la'aká nañakaró”, ke ri'imaká najló yuku.

Pan amúra'atajona yukuna marí

(Lc 13.20-21)

³³Jesús kemari piño najló marí ke: “Ina'uké nakiyana wakára'ajeri Tupana. Wejápaja rijwa'atéjena me'etení; a'ajná ño'ojó chami richaje rijwa'atéjena i'imajika. Chuwa nu'umajika ijló pan amúra'atajona yukuna iwe'epíkaloje rinakojé penaje: Inaana ka'año wejápaja pan amúra'atajona (levadura) kajrú harina e'iyajé,

raú kajrú ramúra'atako. Ñaké kaja Tupana yukuna jema'akó kajrú ina'ukena e'iyowá, nema'akáloje ra'apiyá penaje, ne'emakáloje rijwa'atéjena raú”.

³⁴ Kajrú Jesús jewíña'atajika neká nakaje nakú yuku i'imakana najló aú. ³⁵ Tupana puráka'alo ja'apátajeri michú kemaká rinaku i'imaká, ke rewíña'ataka ne'emaká. Marí ke rimaká:

“Yuku i'imakana aú numaje najló nakaje nakú.

Nakaje me'echuje i'imakare piyuke ina'ukejlo Tupana keño'ótaka eja'awá wakajé, eyá maárejecha, nakú numaje najló”, ke rimaká rinaku.

Jesús kemaká najló meke kemakánaka jimichi, trigo, kele yukuna marí

³⁶ E kaja Jesús i'imari riyukuno najló, mujlúka'ari pají chojé. E ra'apiyatéjena awakaño rawa'ajé, nemá rijló:

—Pi'imá wajló meke kemakánaka jimichi, trigo, kele pi'imichá yukuna wajló.

³⁷ Rimá najló: “Ina'uké i'imakáloje nupalamane penaje i'imaká nuká. Palani nakaje icha ijí ejátajeri, ke kaja nuká. ³⁸ Ri'ikakapere, ke piyuke ina'ukena marí eja'awá chu i'imakaño. Eyá trigo icha ijí, ke kaja piyuke Tupana ja'apiyá jema'ajeño. Eyá jimichi pu'uwareni, ke kaja ina'uké Jiñá Chi'inárikana wa'até i'imakaño. ³⁹ Jiñá Chi'inárikana, ke kaja chapú péchuri, ejátari pu'uwareni jimichi ri'ikakapere e'iyajé. Eja'awá tajnájiko wakajé, ke kaja richa ña'akana iphájika rená chojé. Tupana wa'atéjena, je'echú chiyájena, ke kaja richa ña'ajeño”, ke rimaká najló.

⁴⁰ Rimá piño najló: “Richa ña'ajeño awakátaka re'iyayá pu'uaré nojé jimichi, naka'akáloje riká kera'athani chojé penaje, ke kaja ri'imajika eja'awá tajnájiko wakajé. ⁴¹⁻⁴² Ina'uké i'imakáloje nupalamane penaje i'imaká nuká. Nuwakára'aje nujwa'atéjena, je'echú chiyájena, i'ijnaká pu'uaré la'ajeño, eyá amátaño ajopana ñaké la'akana aú, wá'aje. Nawá'aje neká, naka'akáloje neká kera'athani chojé. Re kajrú neyájika. Kamachá najma'ajika naiwá, kewini yajwé namájikale. ⁴³ Eyá Tupana wátaka ke la'akaño i'imajeño palá wani je'echú chu Nora'apá Tupana wa'até. Aá inakojó numakare nakú ijló”, ke Jesús kemaká najló.

Nakaje kawemí nojé pajluwa iphátake rijluwa yukuna marí

⁴⁴ Jesús kemari piño najló: “Palani inajlo Tupana ja'apiyá i'imakana. Kawemí nojé wani nakaje ina'uké wátakare najluwa,

ke kaja riká. Pajluwa ka'ajná iphátari apú te'eré e'iyá nakaje kawemini wani, me'echú i'imakare. Ramaka riká ejomi, rapára'ata piño riká rapumí chojé. Pu'ují wani ripechu i'imaká, riphátakale riká. E ripa'ó riñakaré ejo. Ra'á ajopánajlo piyukeja rinane riwemí aú, riká liñeru aú riwarúwa'akaloje paminá liyá riká te'erí", ke rimaká najló.

Kawemí nojé nakaje yukuna marí

⁴⁵ Jesús i'imari piño apú yuku, rimá najló: "Palani inajlo Tupana ja'apiyá i'imakana. Nakaje, kajrú iná wátakare inajluwa, ke riká. Pajluwa le'ejepelaji miná ka'ajná i'ijnari palá nojé le'ejepelaji kulaje. ⁴⁶E ka'ajná riphata nakaje riwátakare, apú nakaje chaje palá nojé, kawemí nojé, raú ka'ajná ra'á piyukeja rinane riwemí aú, riká liñeru aú riwarúwa'akaloje rijluwa riká", ke rimaká najló.

Nawenare yukuna marí

⁴⁷E rimá piño najló: "Ina'uké nakiyana wakára'ajeri Tupana. Nawenare naka'akare junápeje, ke kaja neká. Naka'á nawenare junápeje, raú ke'iyapejena jíñana ja'año richojé. ⁴⁸Kajrú na'akó nawenare chojé. Rejéchami nachíra'aka riká ají ke juni turenajo ke'epé nakojé. Rejomi najña'á ne'iyayá palá nojena jíñana, eyá pu'uwaréruna nakupá ne'iyayá. ⁴⁹Ñaké kaja ri'imajika ina'ukejlo eja'awá tajnájiko wakajé. Tupana wa'atéjena, je'echú chiyájena, i'ijnajeño unká ina'ukélaruna wá'aje. Pu'uwaré la'ajeño nawá'aje ajopana ina'ukena e'iyayá, naka'akáloje neká kera'athani chojé. ⁵⁰Re kajrú nawíyo'ojika; kajrú neyájika; kamachá najma'ajika naiwá, namájikale kewini jajwé", ke rimaká najló.

⁵¹ Rejomi Jesús kemari najló:

—¿E iwe'epika meke kemakánaka numíchaje nakú ijló?

—A'a —ke nemaká.

⁵² E rimá najló:

—Tupana puráka'alo nakú jewíña'atajeño a'akachu nanakojó nupuráka'alo, nawe'epí palá raú. Nakaje i'imaká pají minajlo, ke kaja najló riká. Re pají minajlo palá nojé nakaje jupichumi, wajé wa'até. Tupana puráka'alo nakú jewíña'atajeño jema'año no'opiyá, we'epiño kaja ripuráka'alo, júpimi riyuríkare najló i'imaká nakojé, meyá le'ejé nakojé wa'atoja. Raú nawe'epí palá ripuráka'alo ja'apátakana ajopánajlo.

Jesús i'ijnaká pajimila Nazaret ejo yukuna marí

(Mc 6.1-6; Lc 4.16-30)

⁵³ Jesús i'imaká yuku najló ejomi, ra'apá reyá, ⁵⁴ iphari rite'eré ejo. Re richape piño rikeño'ó newíña'atakana Tupana nakú nawakáka'alo ñakarelana chu. Ripuráka'alo jema'ajeño pechu i'imá: “¡Meke piyuke wani riwe'epílaka nakaje nakojé!” Nemá rinaku:

—¿Na liyá ka'ajná riwe'epí piyukeja wani ilé kaje nakojé? ¿Meke la'ajé ka'ajná riwe'epíkajla piyuke nakaje Tupánaja kalé we'epíkare la'akana nakojé? ⁵⁵ Mirapewa nakú jápajeri i'irí riká. María raló, eyá Santiago, José, Simón, Judas, kele rejena. ⁵⁶ Maare we'iyá rijmerelomi ñakaré. Eta, ¿meke riwe'epíkajla piyukeja puráka'aloji nakojé? —ke nemaká Jesús nakú.

⁵⁷ Namána'apa ri'imakale, unká nephala ra'apí. Unká kaja na'alá nanakojó ripuráka'alo. E rimá najló:

—Piyuke ina'uké, ajopana te'eré eyájena, iphaka Tupana puráka'alo ja'apátajeri ja'apí. Nekaja kalé, rite'eré eyájena, eyá rejena, kele unká iphálaño ra'apí —ke rimaká najló.

⁵⁸ Rewá unká méño'ojo Jesús la'alá kajrú nakaje Tupánaja kalé we'epíkare la'akana, unká pachá napechu i'imalá kaphí richojé.

Mékeka nenoka Juan el Bautista yukuna marí

(Mc 6.14-29; Lc 9.7-9)

14 ¹ Piyuke nakaje Jesús la'akare yukuna jema'akó rewá i'imaká. Riwakajé Herodes i'imari Galilea te'eré eyájena i'imakana. Riká jema'arí kaja riyukuna. ² Raú rimá rijwa'até jápajeñojlo: “Apala Juan el Bautista penájemi ka'ajná kele makápo'oro piño rapumí chuwá. Raú Tupana Pechu aú rila'á kajrú nakaje Tupánaja kalé we'epíkare la'akana”, ke rimaká rinaku.

³ Re jo'ó kaja Juan el Bautista i'imaká wakajé, Herodes wakára'ari rika'akana ina'uké wajákelana chojé. Jepo'okeya nayurika ri'imaká richu. Ilé ke Herodes la'aká ri'imaká chapú riyajalo Herodías puráka'alo aú. Re'ewé Felipe yajálomi ru'umaká paineko, ⁴ e'iyonaja rika'á riliyá ru'umaká. Ilé ke rila'aká pachá Juan akha'arí ri'imaká, rimá rijló: “Pe'ewé yajalo penájemiru kelerú pi'imá wa'até me'etení, unká Tupana wátala iná la'aká ilé ke”.

⁵ Ilé ke rimaká rijló aú, Herodes wátari rinókana, e'iyonaja rikero'ó ina'uké piyá, palá napechu i'imakale Juan nakú. “Tupana puráka'alo ja'apátajeri riká”, ke napechu i'imajika rinaku.

⁶E kaja Herodes iphátari jarechí, raú rila'á fiesta. Riwakajé kajrú riyukupéra'akarena iphaka rinaku, raú riwakára'a riyajalo itu arápa'aka najimaje piyuke. Palá wani ri'imaká rinaku, ⁷raú rimá rojló:

—Pikeja'a nuliyá nakaje piwátakare me'etení, no'ojé pijló riká. Tupana we'epiri kewaka numaká.

⁸Raú ru'ujná roló ejo rojló kemaje naka rukejá'ajika riliyá.

Raú rumá rútujo:

—Pimá rijló, ra'achí pijló pachiya chojé Juan el Bautista wíla'arumi.

E rupa'ó ropumí chuwá rijló kemaje ñaké.

⁹Ilé ke rumaká Heródesjlo aú, kamu'ují wani ripechu la'akó, e'iyonaja unká meke rila'alajla. Kaja rimá rojló i'imaká: “No'ojé pijló nakaje piwátajikare kaje. Tupana we'epiri kewaka numaká”, ke. Piyukeja ina'ukena riyukupéra'akarena jimaje rimá rojló ñaké, raú riwakára'a na'aká rojló riwíla'arumi. ¹⁰Riwakára'a pajluwa ina'uké i'ijnaká ina'uké wajákelana ejo Juan núrupi mata'ajé, raú nala'á rimaká najló ke. ¹¹Rejomi nayá'ata riwíla'arumi pachiya chojé na'akáloje rojló riká. Rejomi ro'ó rolojlo riká, raú ruwe'epí kaja nenóchaka riká. Ilé ke nenoka Juan michú i'imaká.

¹²Nenoka riká ejomi, ra'apiyatéjenami i'ijnaño ina'uké wajákelana ejo ritami ña'ajé, nato'otákaloje ritami támijimina to'otákkelana chojé. Rejomi ne'ejná riyukuna i'imajé Jesusjlo.

Jesús a'aká cinco mil ina'ukénajlo a'ajnejí yukuna marí

(Mc 6.30-44; Lc 9.10-17; Jn 6.1-14)

¹³Kaja ne'emá Jesusjlo riyukuna. E ri'ijná reyá ra'apiyatéjena wa'até wapuru chu apo'ojó reyá, rewá ne'emakáloje nekoja ajopana ina'ukena liyá, e'iyonaja ajopana we'epiño méño'ojoka ne'ejnaká. Kajrú pajimila i'imaká rewá. Re i'imakaño i'ijnaño pe'iyoo'wa ají ke ne'ejnaká ejo, iphaño natukumá. ¹⁴E kaja narúka'o. E Jesús jácho'oro wapuru chiyá, amari kajrú wani ina'ukena i'imaká re. Riwe'epí namu'ují, raú ritejmo'ota natámina nawá'akarena rejo. ¹⁵Natejmo'otakana nakú najúwa'a. E ra'apiyatéjena i'ijnaño rawa'ajé, kemaño rijló:

—Kaja wajúwa'aka chuwa, unká na ñakaré i'imalá maárowa, ñakele piwakára'a chuwa ina'uké pa'akó pajimila ejo nawarúwa'akaloje najluwa a'ajnejí reyá.

¹⁶E'iyonaja Jesús kemari najló:

—Unká napa'alajo, iká a'ajeño najló a'ajnejí.

¹⁷Raú nemá rijló:

—Unká a'ajnejí i'imalá maare najñákalaje. Pajluwa thé'ela ka'alá ñani pan, iyajmela jíñana ñánija kalé maare wakapi.

¹⁸Rimá najló:

—Iji'ichá riká majó.

¹⁹E riwakára'a nayá'ako jimichi palá nojé rewá i'imakare e'iyajé. Rejomi rijña'á rikápojo pajluwa thé'ela ka'alá pan, iyajmela jíñana wa'até. E riyaka'o je'echú chojé, rimá Tupánajlo:

—Palá pila'aká weká marí a'ajnejí aú.

Rejomi ritupa'atá pan najló; riyupha'atá kaja jíña najló. Ra'á ra'apiyatéjenajlo riká natamáka'atakaloje piyuke ina'uкеjlo riká penaje. ²⁰⁻²¹Piyukeja najñaka na'ajnewá namano'oká ejé. Cinco mil ewá ka'ajná achiñana i'imaká. Nekaja kalé nalapa'atá i'imaká, unká nalapa'atala inaana, yuwaná wa'até. Rejomi ra'apiyatéjena awakátaño rijlupemí yuríkaro. Iyamá iphata jí'imaji nakojé kele (12) kuwá'ala namano'otá rijlupemí aú pu'utheno waja.

Jesús ja'apaka juni jimó yukuna marí

(Mc 6.45-52; Jn 6.16-21)

²²Rejomi Jesús wakára'ari ra'apiyatéjena witúka'aka wapuru chojé nakuwá'akaloje kaéja pa'anajo pitá ritukumá. Riwakára'a ajopana ina'ukena pa'akó. ²³Rejomi ri'ijrá rikoja yenuri jí'iwátaje Tupana wa'até pura'ajó. Kaja kalajerúwaka ne'emaká. ²⁴Ra'apiyatéjena i'imaño kaéja pe'iyó leñakaje nakú. Karená iphari ají ke najimajo kaphí, raú kajrú juni yoko'okó. Riyokola ña'arí wapuru nakojé kaphí. ²⁵Kaja ewaja najme'etá, luwíchiphika ee Jesús iphari nanaku. Mapeja ra'apaka juni jimó. ²⁶Namaka riká aú, kajrú nakeró'okó, raú nawíyo'o:

—¡Apala ina'uké ñakami ta ka'ajná kele waícha!

²⁷E Jesús kemari najló:

—¡Ila'á ipéchuwa kaphí, Jesús nuká, ikero'oniño!

²⁸Raú Pedro kemari rijló:

—Piká pí'imajika ee, piwakára'a kaja no'opaka ñaké juni jimó pijimajo.

²⁹—Majó pí'ijná —ke Jesús kemaká rijló.

Raú Pedro jácho'oro wapuru chiyá juni jimaje. Rikeño'ó juni jimó ja'apákana ají ke Jesús jimajo. ³⁰Rejéchami ripechu i'imaká: “¡Kaphini wani ta karená!”

Raú rikero'ó, wa'ató ke ra'akó junápeje. Reja rawíyo'o:

—¡Pí'imatá nuká!

³¹Rejéchami Jesús pataká riká ra'anapitá nakiyá. Rácho'ota junápiya riká, rimá rijló:

—¿Wejápaja wani pipechu kaphí nochojé? ¿Naje piyuricha kaphí nochojé i'imakana?

32 Rejéchami

nawitúka'aka wapuru chojé, wa'ató ke karená mata'aká.

33 E wapuru chu i'imakaño tára'año ne'erúpachi aú Jesús jimaje, nemá rijló:

—Tupana i'irí jo'ó piká.

34 Rejomi nakuwa'a

pa'anajo pitá ají ke Genesaret te'eré ejo.

35 Namaka Jesús aú, ne'emá riyukuna apujlo, apujlo ke, nate'eré

ewá. Raú nawa'a kajrú natámina ri'imaká ejo. **36** Natámina i'imakaño kemaño rijló riyuríkaloje najápaka ra'arumaká ji'imá nakú, raú piyukeja rinaku jápajeño tejmo'otako.



Na aú ka iná la'aká pu'uaré yukuna marí

(Mc 7.1-23)

15 ¹E kaja fariséona nakiyana, eyá Tupana puráka'alo nakú jewíña'atajeño, kele iphaño Jesús nakú. Jerusalén eyájena ne'emaká, nemá rijló:

²—¿Naje chi unká pa'apiyatéjena jema'alá pheñawilana michuna puráka'alomi ja'apiyá? Unká nepalá nayáthe'ela chiyá najñaka na'ajnewá piyá, wachi'iná michuna la'ajika ke.

³Raú rimá najló:

—Eta iká, ¿naje iyurí iliyó Tupana puráka'alo kemaká ke la'akana, rilanakiya ila'akáloje pheñawilá michuna puráka'alomi kemaká ke? ⁴Tupana puráka'alo kemari: “Iphá ichi'iná ja'apí; ipura'aniño pu'uaré nanaku. Pura'ajero pu'uaré richi'iná nakú, nókana i'imajeri”. ⁵Eyá iyani nakiyana kemaño ijlo: “Unká méño'ojo no'olá iñathé liñeru aú, kaja no'okale Tupánajlo riká”, ke. ⁶Mapeja nemaká ijlo ñaké, un kale nephala ja'apí. Kaja nayurí naliyó Tupana puráka'alo kemaká ke la'akana, nala'akáloje pheñawilá michuna puráka'alomi kemaká ke penaje. ⁷Pajlákachina wani iká. Mapeja ila'aká inakuwá palá la'ajeño ke ajopana

ijlú chu, unká ñaké la'ajeño kalé i'imaká e'iyonaja. Tupana puráka'alo ja'apátajeri Isafas i'imari iyukuna júpimi marí ke i'imaká:

⁸ “Mariruna pura'año nunaku palá nanuma chiyaja kalé, eyá napechu nakú unká wani nawátala nuká.

⁹ Unká na penaje kalé nala'á pu'ují napéchuwa nojló.

Kaja ina'uké puráka'alo nakuja kalé newíña'ata neká, rinaku napechu i'imakale Tupana puráka'alo japi riká ke”.

¹⁰E Jesús kemari najló ne'ejnakáloje rawa'ajé penaje, rimá najló:

—Chuwa jema'á meke kemakánaka marí: ¹¹Piyukeja nakaje iná ajñakare iná numá chiyá aú, unká iná la'alá pu'uwaré. Rikaja kaja iná numá iná pura'ó chiyá pu'uwaré, riká la'arí iná pu'uwaré la'ajerí.

¹²E Jesús ja'apiyatéjena i'ijnaño rawa'ajé, nemá rijló:

—¿E piwe'epíchaka fariséona yúchi'ichako kajrú wani pichá, ilé ke pimíchaka aú?

¹³Raú rimá najló:

—Nora'apá, je'echú chu i'imakare, ka'ajeri piyuke ina'ukena, unká rile'ejena kalé i'imakaño. ¹⁴Reja ne'emareja. Mejluruna ke neká. Eyá jema'año napuráka'alo na'apiyá, mejluruna ke kaja neká. Unká meke la'ajé pajluwa mejlurú pako'otálajla apú mejlurú, iyamano na'akojla ulawí chojé.

¹⁵E Pedro kemari rijló:

—Pi'imá wajló palá meke kemakánaka kele pimíchaje nakú wajló yukuna.

¹⁶Jesús kemari rijló:

—¿Unká kaja chi iwe'epila rinakojé? ¹⁷Piyukeja nakaje iná ajñakare iná numá chiyá witúka'ari ají ke iná julá chojé, rejomi ra'apá iná e'iyayá. ¹⁸Rikaja kaja iná numá chiyá iná pura'ó nakaje nakú, iná pechu nakú ri'imaká ke. Riká la'arí iná pu'uwaré la'ajerí. ¹⁹Pu'uwaré péchuri iná i'imakale, iná i'ijnatá iná péchuwa pu'uwaré la'akaná nakú: apala ajopana nókana nakú ka'ajná; iná manáicho la'akana ajopana wa'até nakú ka'ajná; ajopana nane jata'akana nakú ka'ajná; najwa'até pajlakana nakú, eyá chapújra'akajo, kaje nakú iná i'ijnatá iná péchuwa. ²⁰Ilé kaje la'akaná la'arí iná pu'uwaré la'ajerí. Unkachu iná ipalá iná yáthe'ela chiyá, iná ajñaka iná a'ajnewá piyá, ichi'iná michuna kemájika rinaku ke, unká iná la'alá pu'uwaré raú —ke Jesús jewíña'ataka neká.

**Ajopana te'eré eyájeru pechu i'imaká kaphí Jesús chojé
yukuna marí**

(Mc 7.24-30)

21 Reyá Jesús ja'apari ají ke Tiro, eyá Sidón, kele te'eré ejo.

22 Re pajluwájaru, Canaán te'eré eyájeru ru'umaká, iphayo Jesús amaje. Ruphaka rinaku ee, rowíyo'oko rumaká rijlól:

—Wawakára'ajeri, Tupana wakára'ari pi'imaká majó iná i'imatájeri penaje. Piwe'epí numu'ují. Kajrú wani nutu amaka chapú kaje yajwé, jiñá pechu i'imakale ro'iyá.

23 Unká Jesús a'ajipalá rojlól. E ra'apiyatéjena i'ijnaño rawa'ajé, nemá rijlól:

—Piwakára'a rupa'akó, kajrú wani rowíyo'oka wápumi chu.

24 E Jesús kemari rojlól:

—Tupana wakára'ari nuká majó, no'okáloje Israel lakénami nakiyana ñathé, kapichájeño Tupana liyá penájena ne'emakale.

25 E'iyonaja ru'ujná rijimaje. Rutára'o ru'urúpachi aú rijimaje, rumá rijlól:

—Wawakára'ajeri, pa'á nuñathé.

26 Rimá rojlól:

—Unká paala pan ka'akana iná yaní liyá, iná a'akáloje riká yawi pirakánajlo penaje.^d

27—Ke jo'ó, wawakára'ajeri, e'iyonaja kalé yáwina ajná kaja pan mujrumi te'erí e'iyajé ja'akaro.

28 Raú Jesús kemari rojlól:

—¡Meke kaphí wani pipechu nochojé! Piwátaka nakaje i'imaká pijlól, keja ri'imajika pijlól.

Ilé ke rimaká rojlól, a'apona ke jiñá pechu jácho'oko rutu e'iyayá ejéchami rutejmo'otako.

Jesús tejmo'ótaka kajrú natámina yukuna marí

29 Jesús jácho'oro reyá, ja'apari piño ají ke kaéja Galilea ejo. Reyá rácho'o yenuri ji'iwata nakoje, rejé riyá'o. **30** Kajrú ina'ukena wá'akarena najwa'ató natámina iphaka rinaku rejé. Ne'iyajena unká méño'oyo ja'apálaño palá, ajopana mejluruna, ne'iyajena unká pura'alaño, eyá ajopana apicháka'alona. Ke'iyapejé nayaripune i'imaká nawa'a richaje. Neká nato'otá ri'imá awa'ajé ritejmo'ótakaloje neká penaje. Ritejmo'ota piyukeja neká ke'iyapejé nayaripune liyá. **31** Unká pura'alaño, pura'año

d 15:26 “Yáwina pirakana”, ke judíona kemájika ajopana te'eré eyájena nakú.

palá; apicháka'alona i'imakaño, pala'año kaja palá; unká ja'apálaño palá, ja'apaño kaja palá; mejluruna i'imakaño, amaño kaja palá. Ilé kaje aú napechu i'imá: “¿Meke piyuke wani rila'alaka!” Palá wani napura'akó Tupana, Israel michú pechu i'imakare chojé kaphí, nakú.

Jesús a'aká cuatro mil ina'ukénajlo a'ajnejí yukuna marí

(Mc 8.1-10)

32E Jesús wá'ari ra'apiyatéjenajlo ne'ejnakáloje richaje, rimá najló:

—Kajrú wani nuwe'epika mariruna mu'ují. Kaja weji ke kala cha nujwa'até neká, eyá kaja na'ajné tajno. Unká nuwakára'alaje napa'akó nañakaré ejo me'epijí wa'até, apala unká natejmu íphálajla nephákalaje palá penaje.

33Raú ra'apiyatéjena kemaño rijló:

—Eta, ¿méreya chi wephátajla najló a'ajnejí maárowa?

Íki'iruna wani neká, unká na ñakaré i'imalá maárowa.

34Rimá najló.

—¿Méka'ala pan ikapi maare?

—Iyamá kuwá'ata ka'alá (7), eyá jíñana le'epé mekeleja.

35E riwakára'a nayá'ako te'erí e'iyajé. **36**Kéchami rijña'aká rikápojo iyamá kuwá'ata ka'alá pan, jíña wa'até. E ripura'ó Tupana wa'até, rimá rijló:

—Palá pila'aká weká marí a'ajnejí aú.

Rejomi ritupa'atá pan nakiyana najló. Ra'á ra'apiyatéjenajlo riká natamáka'atakaloje riká ina'ukénajlo. **37-38** Cuatro mil ewá achiñana i'imaká. Nekaja kalé nalapa'atá i'imaká, unká nalapa'atala inaana, yuwaná wa'até. Piyuke neká ajñaño na'ajnewá namano'oká ejená. Rejomi nawakata rijlupemí yuríkaro, iyamá kuwá'ata ka'alá kuwá'ala pu'utheno waja. **39**Najñaka na'ajnewá ejomi, Jesús i'imari riyukuno najló. Rejomi riwitúka'a wapuru chojé, i'ijnari ají ke Magadán te'eré ejo.

Jesús akha'aká fariséona nakiyana, Tupana puráka'alo nakú jewíña'atajeño wa'até, yukuna marí

(Mc 8.11-13; Lc 12.54-56)

16¹E kaja fariséona nakiyana, Saducéona nakiyana wa'até iphaño Jesús nakú. Nawata rinaku kulákatakano, raú nemá rijló mapeja rila'akáloje najló nakaje Tupánaja kalé we'epíkare la'akana, rená ke'ená penaje. ²Raú rimá najló: “Laínchu amákachu kerani je'echú jimá, imá: ‘Puji'iní i'imajeri’, ke. ³Lapiyami, amákachu kerani je'echú jimá, kajrú juni juwáka'ala wa'até, imá: ‘Unká paala chuwa'ajá i'imajika’, ke. Palá

iwe'epika mékeka nakaje i'imajika je'echú jimá amákana aú. Eta, ¿naje unká iwe'epila palá wakára'ari nula'aká nakaje e'iyowá nakojé? ⁴ ¿Unká ina'ukélaruna ta iká, la'año inakuwá mapeja palá la'ajeño ke, ina'uké ijló chu, unká ñaké la'ajeño kalé i'imaká e'iyonaja! Iwata nula'aká ijló nakaje Tupánaja kalé we'epíkare la'akana, e'iyonaja unká nula'alaje na ijló. Nuwata iwe'epika mékeka rila'aká ripuráka'alo ja'apátajeri Jonás michú i'imaká. Ñaké kaja rila'ajika nuká”, ke Jesús kemaká najló.

Rejomi ra'apáña neká.

Na'aká piyá nanakojó fariséona puráka'alo yukuna marí

(Mc 8.14-21)

⁵ Jesús, ra'apiyatéjena wa'até, kuwá'año kaéja pa'anajo pitá. Nephaka rejo ee, nawe'epí unká najña'alá najwa'ató pan. ⁶ Jesús kemari najló:

—Eko amá ikó palá fariséona, eyá saducéona, kele le'ejé pan amúra'atajona (levadura) liyá.

⁷ Raú ra'apiyatéjena kemaño pajlokaka nekámika:

—¿E jemi'ichaka mékeka rimaká wajló, unká pachá wajña'alacha wajwa'ató pan?

⁸ Riwe'epí mékeka napura'akó pajwa'atéchaka, raú rimá najló:

—¿Naje chi imá: “Unká wajña'alacha wajwa'ató pan”, ke? ¿Meke wejápaja wani ipechu nochojé kaphí! ⁹ ¿Unká wani chi iwe'epila meke itamáka'ataka pajluwa thé'ela ka'alá ñani pan cinco mil ina'ukénajlo i'imaká? ¿Méka'ala kuwá'ala imano'otá rijlupemí aú i'imaká? ¹⁰ ¿Unká kaja chi iwe'epila meke itamáka'ataka iyamá kuwá'ata ka'alá ñani pan cuatro mil ina'ukénajlo i'imaká? ¿Méka'ala kuwá'ala imano'otá rijlupemí aú i'imaká? ¹¹ Numicha ijló i'imichaka: Eko amá ikó palá fariséona, eyá saducéona, kele le'ejé pan amúra'atajona liyá. Unká pan wani nakú kalé numicha ijló ilé ke kemakana aú. ¿Naje unká wani iwe'epila rinakojé?

¹² Ilé ke rimaká najló aú nawe'epí unká rimalá najló, namákaloje nekó nale'ejé pan amúra'atajona liyá. Rimá najló na'aká piyá nanakojó fariséona, eyá saducéona, kele puráka'alo nemakare nakú.

Pedro we'epika na ina'ukeka Jesús i'imaká yukuna marí

(Mc 8.27-30; Lc 9.18-21)

¹³ Rejomi nephá Cesarea de Filipo te'eré nakojé. E Jesús kemari ra'apiyatéjenajlo:

—Ina'uké i'imakáloje nupalamane penaje i'imaká nuká. ¿Meke jema'aká ajopana ina'ukena kemaká nunaku, na ina'ukeka nuká nemaká?

14 Nemá rijló:

—Ne'iyajena kemaño pinaku: “Juan el Bautista riká”, ke. Eyá ajopana kemaño: “Elías riká”, ke. Ajopana kemaño kaja pinaku: “Jeremías riká”, ke. Eyá ajopana kemaño pinaku: “Tupana puráka'alo ja'apátajeño, júpimi i'imakaño, nakiyana ka'ajná riká”, ke.

15 E Jesús kemari najló:

—Eta iká, ¿meke imaká nunaku?

16 Simón Pedro kemari rijló:

—We'emátájeri penaje piká. Tupana, matajnako i'imajika, i'irí piká.

Raú Jesús kemari rijló:

17—Pedro, Jonás i'irí, palá piwe'epika naka nuká. Unká ina'uké liyá kalé piwe'epí nunakojé. Nora'apá, je'echú chu i'imakare, liyá piwe'epí riká. **18** Piká Pedro. Jipa, ke kemakana pií. Kaphí no'opiyá jema'ajeño pechu i'imajika nochojé, pipechu i'imaká nochojé ke kaja, raú unká taka'akaje chá'atalaje neká. Matajnako ne'emajika nujwa'até je'echú chu. **19** Nuyurí pijló rinakojé, piwakára'akaloje nujwa'atéjena marí eja'awá chu. Nakaje, unká piyurílaje nala'aká marí te'erí nakú, unká kaja nuyurílaje nala'aká riká je'echú chu. Eyá nakaje, piyuríjikare nala'aká marí te'erí nakú, nuyureje kaja nala'aká riká je'echú chu —ke rimaká Pédrojlo.

20 Rejomi Jesús kemari najló:

—¡Pa! Imaniña ajopánajlo nuyukuna naka nuká, Tupana wakára'akare majó iná i'imatájeri penaje.

Jesús kemaká najló mékeka ritaka'ajika yukuna marí

(Mc 8.31--9.1; Lc 9.22-27)

21 Rejomi Jesús kemari ra'apiyatéjenajlo mékeka nala'ajika riká chapú nakú, rimá:

—Tupana wakára'ari nu'ujnaká Jerusalén ejo, nomákalaje re chapú kaje yajwé. Re pheñawilana, eyá sacerdotena, Tupana puráka'alo nakú jewíña'atajeño wa'até, la'ajeño nuká chapú. Nawakára'aje nonókana, e'iyonaja weji ke kala i'imajemi numakápo'oyo piño nopumí chuwá.

22 Rejomi Pedro wá'ari Jesús apo'ojó naliyá. Rakha'akó rimaká rijló:

—Eko Tupana we'epí pimu'ují. ¡Unká wani nala'alaje ilé ke piká!

23 Raú Jesús pajno'oró riyámajo, rimá Pédrojlo:

—¡Pi'ijná nuliyá, Jiñá Chi'inárikana pechu ke wani pipechu! Raú unká piwátala nula'aká nakaje Tupana pechu nakú ri'imaká ke. Piyukeja ina'uké i'ijnataka napéchuwa ke wani pipechu.

24 Rejomí rimá piyuke ra'apiyatéjenajlo:

—Iwátajika ee nujwa'atéjena i'imakana, iyureje iliyó piyuke nakaje la'akana ipechu keja. Unká kaja iwe'epílaje khaí inakuwá, nenójika iká nupuráka'alo yukuna i'imakana jimaje. **25** Eyá unká yurílaje riliyó nakaje la'akana ripechu keja, kapichájero. Eyá nenójikare nuwátaka ke la'akana jimaje nujwa'ateje ri'imakale, i'imajero. **26** Unká na penaje inajlo kajrú nakaje marí eja'awá chu i'imakare wátakana i'imalá, iná kapichájikole Tupana liyá rilanakiya. **27** Ina'uké i'imakáloje nupalamane penaje i'imaká nuká. Eja'awá tajnájiko wakajé nuphaje majó Nora'apá wa'atéjena, je'echú chiyájena wa'até. Kajrú mejáma'atani e'iyowá wephaje majó. Riwakajé no'ojé piyuke ina'ukénajlo nakaje nala'akare wemí. **28** Unká chiyó inakiyana, maare i'imakaño nakiyana, taka'á, ri'imajé ilé numaká rinaku ke. Neká amájeño nujwa'atéjena la'aká Tupana wakára'aka ke. Ina'uké i'imakáloje nupalamane penaje i'imaká nuká —ke Jesús kemaká najló.

Jesús napona apiyákako najimaje yukuna marí

(Mc 9.2-13; Lc 9.28-36)

17 ¹Pajluwa kuwá'ata ke (6) kala ja'apaka ejomí, Jesús jácho'oro ipuré jli'iwátaje. Riwa'a rijwa'ató Pedro, Santiago, eyá re'ewé Juan, keleja. Nephaka rejoy ejéchami, ²Jesús jimá apiyákako najimaje. Kamú kamaré pataká ke rijimá amako. Jareni wani, sereni ke ra'arumaká amako rejéchami. ³E mana'í chiyó namá Moisés, Elías wa'até, iphaka rawa'ajé rejé. Neká pura'año Jesús wa'até. ⁴E Pedro kemari Jesusjlo:

—Wawakára'ajeri, ¡meke palá wani weká maare! Piwátajika ee, wala'ajé weji kele ka'apejé maare: pajlúwa'ala wala'ajé pijló, eyá apa'alá Moisesjlo, eyá apa'alá Elíasjlo.

⁵Ilé ke Pedro kemaká ejéchami, juni juwáka'ala wapuruka nachá. Re'iyá nema'á Tupana kemaká najló:

—Ilé Nu'urí, íki'ija nuwátakare, palá wani nupechu rinaku: jema'á ra'apiyá.

⁶Ilé ke rimaká aú, ra'apiyatéjena láma'año pajima'aló te'erí e'iyajé, kajrú wani nakero'okole. ⁷E Jesús iphari nawa'ajé, tujla'arí neká wejápaja riyáthe'ela aú, rimá najló:

—Jácho'o, ikero'oniño.

⁸E nácho'o yaká'ajo, amaño unká na i'imalá. Rikaja kalé Jesús namá. ⁹Nawitúka'aka ipuré nakiyá nakuwá, Jesús pura'aró najwa'até, rimá najló:

—I'maniña ajopánajlo nakaje amíchaje waje yukuna. Numakápo'ojiko ejómiko, i'imá najló riyukuna. Ina'uké i'imakáloje nupalamane penaje i'imaká nuká.

¹⁰E ra'apiyatéjena kemaño rijló:

—Tupana puráka'alo nakú jewíña'atajeño kemaño Elías michú nakú: “Riká waícha piño majó, Tupana wakára'ajikare ina'uké i'imatájeri penaje tukumá”, ke. ¿Naje chi nemá ilé ke?

¹¹Rimá najló:

—Ilé ke jo'ó nemaká. Elías iphájeri majó paineko, rilamá'atakaloje piyuke nakaje rapumí chuwa. ¹²Eyá nuká kemari ijlo: kaja Elías iphá majó nutukumá i'imaká, e'iyonaja unká nawe'epila na ina'uकेका ri'imaká, raú nala'á ri'imaká chapú. Ñaké kaja nala'ajika nuká chapú. Ina'uké i'imakáloje nupalamane penaje i'imaká nuká, ña'ajeri chapú kaje yajwé panaku.

¹³Ilé ke rimaká najló aú nawe'epí rimaká Juan el Bautista michú nakú: “Kaja Elías iphá majó i'imaká”, ke.

Jesús wakára'aka jiñá pechu jácho'oko yuwají e'iyayá yukuna marí

(Mc 9.14-29; Lc 9.37-43)

¹⁴E kaja nephá kajrú ina'ukena i'imaká ejé. E pajluwaja nanakiyana i'ijnari Jesús jimajo. Riká tára'aro ri'irúpachi aú rijimaje, rimá rijló:

¹⁵—Piwe'epí nu'urí mu'ují. Apú eyá ke kajrú wani ritaka'atako; kajrú wani ramákano chapú kaje yajwé. Ritaka'atako kewá ra'akono jiyá chojé, apú eyá ke ra'ó kaja junápeje. ¹⁶Majó nuwá'icha riká pa'apiyatéjena ejo, natejmo'otákaloje riká, e'iyonaja unká meke nala'alacha riká.

¹⁷E Jesús kemari ra'apiyatéjenajlo:

—¡Meke unká wani ipechu i'imalá Tupana chojé kaphí! ¿Unká jo'ó chi iwe'epila naka la'akana palani, eyá naka la'akana unká paala? ¿Meketana júpika nu'umajika ijwa'até, iwe'epíkaloje rinakojé nuliyá penaje? Iwá'icha riká majó.

¹⁸Raú nawa'a riká rejo. E Jesús akha'arí jiñá pechu re'iyá i'imakare, raú rácho'o re'iyayá, rejomi peyajweni ri'imaká reyá a'ajná ño'ojó.

19 Rejomí ra'apiyatéjéna pura'año Jesús wa'até nekámika ke, nemá rijló:

—¿Naje unká méño'ojo wawakára'alacha jiñá pechu jácho'oko re'iyayá?

20 Rimá najló:

—¡Meke unká wani ipechu i'imalá Tupana chojé kaphí! Raú unká méño'ojo iwakára'alacha rácho'oko re'iyayá. Ipechu i'imakela wejápaja ñani kaphí richojé, imajla marí ipurejlo: “Patató a'ajná ño'ojó”, ke. Raú ratatojla a'ajná ño'ojó. Ipechu i'imajika ee kaphí Tupana chojé, ila'ajé piyukeja nakaje ñaké.

21 Iná wakára'akaloje ilé kaje jiñá pechu jácho'oko ina'uké e'iyayá yámona, iná pura'ó Tupana wa'até, iná i'itaó kaja iná a'ajné liyá —ke rimaká najló.

Jesús i'imaká najló mékeka ritaka'ajika yukuna marí

(Mc 9.30-32; Lc 9.43-45)

22-23 Jesús chira'aró ra'apiyatéjéna wa'até Galilea te'eré nakuwá. Riwakajé rimá najló:

—Ina'uké i'imakáloje nupalamane penaje i'imaká nuká. Na'ajé nupinánajlo nuká nenókalaje nuká penaje, e'iyonaja weji ke kala i'imajemi numakápo'ojo piño nopumí chuwa.

Ilé ke rimaká najló aú, kamu'ují wani napechu la'akó.

Jesús a'aká liñeru Tupana ñakaré chojé penaje yukuna marí

24 E kaja Jesús iphá rijwa'atéjéna wa'até Cafarnaúm ejo. Re ajopana kejá'año liñeru ina'uké liyá Tupana ñakaré chojé penaje. Neká iphaño Pedro nakú, nemá rijló:

—¿E jewíña'atajeri a'aká liñeru Tupana ñakaré chojé penaje?

25—A'a, ra'á kaja liñeru —ke Pedro kemaká.

E rimujlúka'a pají chojé. Jesús kemari rijló:

—¿Meke chi pipechu rinaku? ¿Na liyá chi marí eja'awá chu i'imakaño wakára'a liñeru ña'akana? ¿Najwa'atéjéna liyá ka'ajná, ajopana te'eré eyájéna liyá ka'ajná?

26 Pedro kemari rijló:

—Ajopana te'eré eyájéna liyá najña'á riká.

Jesús kemari rijló:

—Ke jo'ó riká. Unká najwa'atéjéna kalé a'año najló liñeru.

27 Unká naje kalé no'ó najló liñeru, Tupana wa'ateje nu'umakale. E'iyonaja kalé no'ojé najló liñeru, napechu i'imaká piyá chapú nunaku. Ñakele pi'ijná kaéja ejo, piki'ichá jana'ajori junápeje. Chíra'ajeri paineko, pijña'ajé. Rinuma chu piphátaje liñeru

nakejá'akare nuliya, piliya wa'até, wemi lokópa'ala. Riká pijña'ajé, rejomi pa'achá najló riká.

Nachá'atajeri yukuna marí

(Mc 9.33-37; Lc 9.46-48)

18 ¹Rejomi Jesús ja'apiyatéjena i'ijnaño Jesús awa'ajé, nemá rijló:

—¿Na chá'atari pijwa'atéjena e'iyayá nakaje la'akana aú?

²E Jesús wá'ari pajluwaja yuwajijlo, rejomi ritára'ata riká ne'iyajó.

³Rimá ra'apiyatéjenajlo:

—Jema'á. Unká yuwaná la'alá nanakuwá ajopana chá'atajeño ke. Unkájika ee ipajno'otá ipéchuwa, ipechu i'imakáloje yuwaná pechu ke kaja, unká i'imalaje nujwa'atéjena. ⁴Unká la'alá rinakuwá kajrú la'aká ke, i'imajeri ajopana nujwa'atéjena chaje. Marí yuwají pechu i'imaká rinakuwá, ke kaja ripechu i'imakale rinakuwá. ⁵Wátajeri marí yuwají, nujwa'ateje ri'imakale, wátajeri kaja nuká —ke rimaká najló.

Chapú wani ri'imajika amátaño pu'uaré la'akaná aujlo yukuna marí

(Mc 9.42-48; Lc 17.1-2)

⁶E rimá piño najló: “Chapú wani nakaje i'imajika amátaño no'opiyá jema'ajeño pu'uaré la'akaná aujlo. Palani naka'akela namátajeño junápeje kajruni jipa jepo'okeya nanúrupi nakú ke. Palani najló ilé ke nala'akana i'imakajla, chapú kaje yajwé namájikare ijlnami chojé.

⁷“Re kajrú wani nakaje marí eja'awá chu, ka'átari iná e'iyajé iná la'akáloje pu'uaré raú penaje. Ñaké riká, e'iyonaja kalé chapú wani ri'imajika amátajeri apú pu'uaré la'akaná aujlo.

⁸“Ñakele piyáthe'ela pachá ka'ajná, pi'imá pachá ka'ajná, pila'akachu pu'uaré, palani rimata'akana pinakiyó pika'akáloje riká penaje. Palani ilé ke la'akana i'imakajla pijló, pikapichako piyá ripachá kera'athani unká yakálare chojé. ⁹Eyá pijlú pachá ka'ajná pila'akachu pu'uaré, palani kaja rika'akana pinakiyó. Palani ilé ke la'akana i'imakajla pijló, pikapichako piyá ripachá kera'athani unká yakálare chojé”, ke Jesús kemaká najló.

Oveja kapichako yukuna marí

(Lc 15.3-7)

¹⁰Jesús kemari piño najló: “Ipechu i'imaniña yuwaná nakú: ‘Mapéjaruna neká’, ke. Tupana wa'atéjena, je'echú chiyájena

i'imakale nawa'aphena. Nora'apá, je'echú chu i'imakare, awa'á neká. ¹¹Ina'uké i'imakáloje nupalamane penaje i'imaká nuká. Nu'umatákalaje ina'uké kapichákajo liyá penaje nuphá majó i'imaká.

¹²“Re ka'ajná pajluwaja ina'uké pirana cien ovéjana. Nanakiyana ka'ajná kapicharo pajluwaja. Paminá amíchaka aú unká ri'imalacha najwa'até, riyuricha ajopana noventa y nueve na'ajnewá ajñakana nakú ri'ijnakáloje kapicharo ne'iyayá kulaje. ¹³Riphátiyaka riká aú pu'ují ripechu li'ichako. Ajopana chaje ripechu i'imichaka pu'ují kapicharo nakú, riphátiyakale riká. ¹⁴Ñaké kaja jara'apá, je'echú chu i'imakare. Unká riwátala pajluwa mariruna yuwaná nakiyana kapichako”, ke rimaká najló.

Puráka'aloji lamá'atakana yukuna marí

(Lc 17.3)

¹⁵E rimá piño najló: “Pajluwa Tupana ja'apiyá jema'ajeri la'ajika ee piká chapú, pipura'ó rijwa'até rinaku ikó. Pimá rijló na aú ka rila'aká piká chapú. Ra'ajika ee pipuráka'alo rinakojó, ipala'ajó piño pajwa'atéchaka. ¹⁶Unkaja ke ra'á rinakojó pipuráka'alo, piwa'a pijwa'ató pajluwa ka'ajná, iyamá ka'ajná, nema'akáloje mékeka rimaká pijló. Raú nawe'epeje kaja mékeka rimaká pijló. ¹⁷Unkaja ke ra'á rinakojó pipuráka'alo ajopana wa'até, pi'imá riyukuna Tupana ja'apiyá jema'ajeño rawakákarono wa'atejlo. Unkaja ke ra'á rinakojó napuráka'alo, ika'á e'iyayó riká. Iwe'epí kaja rinaku: ‘Unká jema'alaño Tupana ja'apiyá nakiyana’, ke. Iwe'epí kaja rinaku: ‘Liñeru ña'ajeño ne'emakánajlo, unká nawátalarena nakiyana’, ke.

¹⁸“Jema'á marí: Je'echú chu i'imakaño wakára'ajeri Tupana. Ñakele riyurí ijló rinakojé, iwakára'akaloje rijwa'atéjena marí te'erí nakú. Nakaje unká iyurílaje nala'aká marí eja'awá chu, unká kaja Tupana yurílaje nala'alaká riká je'echú chu. Eyá nakaje iyuríjikare nala'aká marí te'erí nakú, riyureje kaja nala'aká riká je'echú chu.”

¹⁹Rimá piño najló: “Iyamá inakiyana ka'ajná pura'año pajwa'atéchaka marí te'erí nakú, ipechu i'imakáloje rejenowaja nakaje ikejá'ajikare Tupana, je'echú chu i'imakare, liyá nakú. Riká a'ajeri ijló riká. ²⁰Iyamá ka'ajná, weji kele ka'ajná, no'opiyá jema'ajeño awakákochu, napura'akóloje nujwa'até penaje, re nupechu najwa'até”, ke rimaká najló.

²¹E Pedro i'ijnari Jesús awa'ajé, rimá rijló:

—Wewíña'atajeri, no'owé la'akachu nuká chapú methú ke, ¿meke pe chi palani richaje amákano? ¿Iyamá kuwá'ata ke pe ejená chi palani?

22—Unká —ke Jesús kemaká—. Unká iná amalo richaje iyamá kuwá'ata ke pe ejenaja. Ñakeja iná amako richaje.

Pajluwa unká amalo apú chaje yukuna marí

23 Jesús kemari piño najló: “Chuwa nu'umajika yuku, iwe'epíkaloje raú meke Tupana la'aká nakaje nakojé. Marí ke riká: Ne'emakana i'imichari. Rijwa'até jápajeño lewérichaño rijló kajrú liñeru. Ñakele riwá'icha namaná, rilamá'atakaloje najwa'até riká penaje. 24 Kaja rilamá'atiya ne'iyajena wa'até. eyá apú rijwa'até jápajeri iphíchari rinaku. Riká lewérichari rijló kajrú wani. 25 Unká meke la'ajé ra'aláchajla rijló rilewéríkare wemí. Raú rikariwate kemíchari ajopana rijwa'atéjenajlo: ‘Marí ina'uké lewérika nojló kajrú wani. Eko a'á riká riwemí aú, rijápakaloje mawemíwaka ajopánajlo. Ñaké kaja a'ajika ajopánajlo rinane riwemí aú. Ñaké kaja a'ajika riyajalo, riyani, keke nawemí aú, najápakaloje mawemíwaka najló penaje. Ilé kaje aú liñeru jácho'oyo rijló, rilewéríkare nojló wemí penaje’, ke rimíchaka najló. 26 Ilé ke rimíchaka rinaku aú, rijwa'até jápajeri tári'icharo ri'irúpachi aú rikariwate jimaje. Mawó rimíchaka rijló: ‘Nukariwate, piyúcha'aniño nuchá. Rejómiko no'ó pijló riwemí’, ke rimíchaka. 27 Ilé kaje aú rikariwate we'epíchari rimu'ují. Ramicho richaje; rilamá'atiya riká rilewéríkare rijló aú. Kaja reyá a'ajná ño'ojó unká rilewérika i'imalacha rijló.

28 “Rejéchami ripi'ichako rikariwate eyá. Meketana i'imajemi riphátiya apú. Riká lewérichari rijló wejápaja. Rikariwate wa'até jápajeri kaja ri'imichaka. Ramíchaka riká aú, ripatiya riká rinúrupi nakiyá kamachá. Rikeño'ochá rinúrupi ajño'okana, rimicha rijló: ‘Chuwa ta pa'á nojló piyuke pilewéríkare nojló wemí’. 29 Eja apú tári'icharo rijimaje ri'irúpachi aú. Mawó rimíchaka rijló: ‘Piyúcha'aniño nuchá. Kéchamiko no'ó pijló riwemí’. 30 ‘Unká’, ke rimíchaka. E ri'ijichá ajopánajlo riyukuna i'imajé, naka'akáloje riká ina'uké wajákelana chojé penaje, nawajákalaje riká, ra'akáloje rijló piyuke rilewéríkare wemí. 31 Ajopana, rikariwate wa'até jápajeño, amíchaño meke rili'ichaka riká. Chapú wani ri'imichaka nanaku, raú ne'ejichá riyukuna i'imajé nakariwátejlo. 32 Raú rikariwate wá'ichari rimaná. Riphicha rinaku, e rimicha rijló: ‘¿Meke piká nujwa'até jápajeri ta, unká wani ina'ukélari! Nuká amaro pichaje, nulamá'ata piká

pilewérikare aú. Mawó pimaká aú nojló i'imaká aú nomó pichaje pilewérikare nojló aú. ³³Palani kaja piwe'epíkajla kele leweri pijló mu'ují, nuwe'epika pimu'ují ke kaja', ke rimíchaka rijló. ³⁴Íki'ija wani rikariwate yúchi'ichako richá, raú riwakári'icha riwajákana a'ajná ra'atajika rijló kajrú wani rilewérikare rijló wemí ejená", ke Jesús i'imaká najló riyukuna.

³⁵Kaja penaje rimá: “Ñaké kaja Nora'apá, je'echú chu i'imakare, la'ajika neká unká amálaño ajopana chaje chapú nala'akare neká liyá”.

Ina'uké kupaka piyá naluna yukuna marí

(Mc 10.1-12; Lc 16.18)

19 ¹Riñapátaka najló yuku i'imakana ejomi, ri'ijná Galilea te'eré eyá ají ke Judea te'eré ejo, iphari juni Jordán pa'anajo pitá. ²Kajrú ina'ukena chira'akó rijwa'até. Re ritejmo'ota natámina.

³Eyá fariséona nakiyana i'ijnaño Jesús chaje. Mapeja nawátaka yuku kejá'akana riliyá nemakáloje rinaku: “Mapeja ripajlaka”, ke, raú nemá rijló:

—¿E palani Tupánajlo iná yajalo yuríkana mapeja, iná wátaka kéchami?

⁴Rimá najló:

—Tupana puráka'alo iwe'epíkare nakojé kemari: Tupana keño'ótaka eja'awá i'imaká wakajé, rikeño'ota kaja achiñá, inanaru wa'até i'imaká. ⁵Ñakele achiñá wá'akako ejomi, ranúka'o richi'iná liyá ri'imakáloje riyajalo wa'até. Reyá kaja pajluwa japi keja neká pajwa'atéchaka. ⁶Raú unká iyamá ina'ukena ke kalé wá'akajeñomi, pajluwa japi keja neká pajwa'atéchaka. Ilé ke ri'imakale, unká paala nayurika pekowáaka. Kaja Tupana la'arí ne'emaká ne'emakáloje pajluwa japi keja pajwa'atéchaka —ke Jesús kemaká najló.

⁷E nemá piño rijló:

—Eta, Moisés kemari i'imaká iná yurijla iná yajalo, iná a'aká rojló puráka'aloji lana'akéjami ejomi. Richu iná kemá na pachaka iná yurika ruká. ¿Na penaje chi rimá ilé ke i'imaká?

⁸Jesús kemari najló:

—Riwakajé ijnú wani nema'aká Tupana ja'apiyá i'imaká, akuwaná Moisés yurí najló rinakojé nayuríkaloje naluna. Paineke chiyó, unká ñaké kalé ri'imaká ina'ukejlo. ⁹Eyá nuká kemari rinaku: Pajluwa ka'ajná yuríkachu riyajalo mapeja, unká rula'alá rumanáicho apú wa'até e'iyonaja, riwá'akakoloje apa'awelo wa'até

rulanakiya penaje, rila'á rimanáicho raú. Apa'awelo wa'até la'akana keja Tupánajlo riká. Apú ka'ajná wá'akajiko riyajalo penájemiru wa'até, rila'ajé kaja rimanáicho raú. Apa'awelo wa'até la'akana keja Tupánajlo riká, apú yajalo jo'ó ru'umakale rijló —ke Jesús kemaká najló.

¹⁰E kaja ra'apiyatéjena kemaño rijló:

—Ilé ke ri'imajika ee, palani ka'ajná unká iná wá'akalo.

¹¹Jesús kemari najló:

—Unká piyukeja kalé ina'uké we'epíjika meke kemakánaka kele numíchaje nakú ijló. Tupana a'akárena ñatheja kalé we'epéjeño meke kemakánaka riká. ¹²Re ne'iyajena achiñana motho'oño apicháka'alo. Ripachá unká meke la'ajé nawá'akalo. Eyá re kaja ne'iyajena apichátaño nanapona, pachá unká kaja meke la'ajé nawá'akalo. Eyá ne'iyajena achiñana unká wá'akalaño, nawe'epíkale natukumó Tupana puráka'alo yukuna i'imakana ajopánajlo. Wátari marí numakare nakú jema'akana no'opiyá, jema'ajeri riká —ke Jesús kemaká najló.

Jesús pura'akó palá yuwaná nakú yukuna marí

(Mc 10.13-16; Lc 18.15-17)

¹³Ne'iyajena wá'año yuwaná Jesús ejo, rito'otákalaje riyáthe'ela nanakojé, ripura'akóloje Tupana wa'até nanaku palá. Ra'apiyatéjena amaka aú nawá'aka neká rejo, nawíyo'o najló richá, nawá'aka piyá richaje neká. ¹⁴Raú Jesús kemari najló:

—Reja yuwaná i'ijnareja nuchaje, awíyo'oniña najló richá.

Yuwaná ke i'imakaño i'imaño Tupana wa'atéjena, nawakára'ajeri ri'imakale.

¹⁵Rito'otaka riyáthe'ela nanakojé Tupana la'akáloje palá neká ejomi, rácho'o reyá.

Kajrú le'ejepelari pura'akó Jesús wa'até yukuna marí

(Mc 10.17-31; Lc 18.18-30)

¹⁶Pajluwa ina'uké i'ijnari Jesús chaje, rimá rijló:

—Ina'uké jewíña'atajeri piká, palá la'ajerí piká. ¿Na chi nula'ajla nu'umakáloje Tupana wa'até matajnako je'echú chu?

¹⁷Jesús kemari rijló:

—¿Naje chi pimá nunaku: “Palá la'ajerí”, ke? Tupánaja kalé pajluwaja, palá la'ajerí. Eyá piwátajika ee matajnako je'echú chu i'imakana, pila'á riwakára'aka ke.

E rimá Jesusjlo:

¹⁸—¿Na chi Tupana wakára'a iná la'aká?

Jesús kemari rijló:

—Pinóniña ina'uké; pila'aniña kaja pimanáicho apa'awelo wa'até, apa'awelo wa'até ke; pata'aniña kaja; pipajlániña kaja apú nakú mapeja; ¹⁹ piphá kaja pichi'iná ja'apí palá; piwata ajopana ina'ukena piwátaka pikó ke kaja.

²⁰ E rimá Jesusjlo:

—Nujyuwako eyá maárejecha nula'á piyukeja ilé pimíchaka ke. ¿Na chi yuriro re jo'ó kaja nupé nula'akáloje penaje?

²¹ Jesús kemari rijló:

—Piwátajika ee nuwátaka ke la'akana, eko pa'atá piyuke pinane riwemí aú, rejomi pa'akáloje raú kamu'ují la'akaño ñathé. Ilé ke pila'ajika ee, kajrú nakaje i'imajika palá pijló je'echú chu. Rejomi pipa'ajó piño majó pi'imakáloje nujwa'ateje penaje.

²² Ilé ke Jesús kemaká rijló aú, ripa'ó reyá. Kamu'ují wani ripechu la'akó. Unká ra'alá rinakojó ripuráka'alo, kajrú le'ejepelari ri'imakale.

²³ E Jesús kemari ra'apiyatéjenajlo:

—Puwichani wani kajrú le'ejepelárunajlo nachó yuríkana Tupánajlo ri'imakáloje nawakára'ajeri penaje. ²⁴ Puwichani caméllonajlo luwirí aphú ñani chiyá ja'apákana. Richaje puwichaka kajrú le'ejepelárunajlo nachó yuríkana Tupánajlo ri'imakáloje nawakára'ajeri penaje.^e

²⁵ Ilé ke rimaká najló aú, napechu i'imá: “Unká na kalé ka'ajná ri'imatajla kapichákajo liyá”, ke. Nemá pajlokaka:

—¿Mékaajena ka'ajná Tupana i'imataje rijluwa kapichákajo liyá?

²⁶ Raú Jesús yaká'aro nachaje, rimá najló:

—Unká méño'ojo ina'uké i'imatálaje nekó kapichákajo liyá. Tupánaja kalé i'imatájerijla neká, riwe'epíkale piyukeja nakaje la'akana.

²⁷ E Pedro kemari rijló:

—Wawakára'ajeri, weká yuriño piyukeja wanane we'ejnakáloje pijwa'até penaje. ¿Meke nakaje i'imajika wajló ilé ke wala'akale?

²⁸ Jesús kemari najló:

—Ina'uké i'imakáloje nupalamane penaje i'imaká nuká. Wajé eja'awá i'imajika piño wakajé, nuká i'imajeri nawakára'ajeri. Palá wani nuwakára'ajika neká riwakajé. Iká, no'opiyatéjena, wakára'ajeño kaja nujwa'até. Re ñáka'ajori nawakára'ajeñojlo,

e 19:24 “Caméllonajlo luwirí aphú chiyá ja'apákana”, kemakana: expresión proverbial que indica algo imposible.

iyamá iphata ji'imaji nakojé kele (12). Richu iyá'ajo, imakáloje iká'ana nakú mékajenaka neká penaje. Iyamá iphata ji'imaji nakojé kele Israel lakénami a'ajútaya michuna i'imaká, nakú imaje. ²⁹Ne'iyajena nakiyana yuriño nañakaré, nejena ka'ajná, nach'i'iná ka'ajná, nate'eré ka'ajná, kaje, nala'akáloje nuwakára'aka ke penaje. Ne'ejnañaá kaja ka'ajná nayani kaja ñapákaño. Palá wani nakaje i'imajika ilé ke la'akáñojlo. Kajrú kaja Tupana a'ajika nañathé. Riká a'ajeri kaja neká ne'emakáloje matajnako je'echú chu rijwa'até. ³⁰Re kajrú ina'ukena, me'etení i'imakaño, pechu nanakuwá: “Ajopana chaje Tupana la'ajika weká palá”, ke. E'iyonaja unká ñaké kalé ri'imajika najló. Ajopana ja'apejé wani rila'ajika nanaku palá. Re kaja kajrú ina'ukena, me'etení i'imakaño, pechu nanakuwá: “Ajopana ja'apejé ka'ajná Tupana la'ajé wanaku palá”, ke. Ilé ke péchuruna nanakuwajlo, unká ñaké kalé ri'imajika, ajopana chaje wani rila'ajíkale nanaku palá —ke Jesús kemaká najló.

Jesús i'imari najló yuku, nawe'epíkaloje Tupana wa'atéjena nakojé raú. Riyukuna marí

20 ¹Jesús kemari najló: “Ina'uké nakiyana wakára'ajeri Tupana. Chuwa nu'umajika yuku ijló iwe'epíkaloje rinakojé: Pajluwaja ina'uké i'imichari. Kajrú rimena i'imichaka. Riká i'ijichari lapiwá ina'uké kulaje, najápakaloje rijló rimena e'iyá. ²Riphátiyaka neká ee, rimicha najló: ‘Iká jápajeño numena e'iyá. No'ojé ijló pajluwata denario ijápaka'ala wemí’. E riwakári'icha neká rimena e'iyá jápaje.’ ³Rejomi pe'iyochá kamú jácho'ochako ee, ramicha piño ajopana, le'ejepelaji ñakarelana awa'á. Mapeja ne'emichaka. ⁴Nekajlo rimicha kaja: ‘Ijápicha numena e'iyá najwa'até, palá no'ojika ijló ijápaka'ala wemí’. Raú ne'ejichá kaja jápaje. ⁵Kaápu'uku ri'ijichá piño ina'uké kulaje, amíchari piño ajopana. Ñaké kaja rimíchaka najló. Pe'iyochá kamú to'ochako ee, ri'ijichá piño, amíchari piño ajopana. Ñaké kaja rimíchaka najló. ⁶E laínchu, las cinco rijil'ichá piño le'ejepelaji ñakarelana ejo, amíchari piño ajopana. Mapeja ne'emichaka. Najló rimicha: ‘¿Naje ikapichata mapeja we'echú ka'alá?’ Nemicha rijló: ⁷‘Unká na a'alá wajló jápakaje’. E rimicha najló: ‘T'ijná numena e'iyajé, ijápicha nujwa'até’.

f 20:2 “denario” liñeru í napura'akó chu. Pajluwa kala iná kánaka iná jápaka'ala wemí.

⁸“E kaja najúwi'icha, rejéchami paminá kemíchaka rijwa'até jápajeño amájerijlo: ‘Chuwa piwá'icha neká majó, pa'achí najló najápaka'ala wemí. Kaja penaje iphíchakaño wa'até pilamá'ataje paineko najápaka'ala wemí. Eyá natukumá iphíchakañojlo pa'ájé kaja penaje najápaka'ala wemí’, ke rimíchaka rijló. ⁹E kaja nephicha jápajemi. Laínchu, las cinco iphíchakañojlo ra'achá rejenowaja najápaka'ala wemí: pajluwa kala iná kánaka rejenowaja. ¹⁰Ñaké waja ra'achaka ajopánajlo, ajopánajlo ke, najápaka'ala wemí. Raú lapiyami keño'ochákaño ajopana tukumá jápakana pechu i'imichá: ‘Richaje japi ra'ajika wajló riwemí’, ke. E'iyonaja rejenowaja ra'achaka najló riwemí. ¹¹Raú nakh'i'ichá paminá maná. ¹²Nemicha rinaku: ‘Kaja penaje iphíchakaño jápichaño pajluwaja kamú jená ketánaja, e'iyonaja ra'achá najló riwemí, ra'achaka wajló riwemí ejé ke kaja. Weká jápichaño ima'áwaka i'imichaka, ima'aní yajwé wamicha we'echú ketana i'imichaka’.

¹³“Paminá jemi'ichari mékeka nemíchaka pajlokaka rinaku, raú rimicha pajluwaja nanakiyánajlo: ‘Unká nula'alacha iká chapú. Numicha ijlo i'imichaka: No'ojé ijlo pajluwa kala ijápichaje wemí, ke. Palani ijlo ñaké i'imichaka, raú nujwa'até jápajeño amájeri a'achá ijlo riwemí ñaké. ¹⁴Chuwa ipa'ó, ra'achaje ijlo wa'até. Rejeja kaja nuwátiyaka riwemí a'akana kaja penaje iphíchakañojlo. ¹⁵Nuwátaka ke nula'aká nuliñérute wa'até. Unká na kalé awíyo'ori nojló richá. ¿Chapú chi iwó nuchá, a'akachi nu'umakale?’, ke paminá kemíchaka”.

¹⁶Ilé ke Jesús i'imaká yuku najló. Rejomi rimá najló: “Ñaké kaja Tupana la'aká riwátaka ke. Ne'iyajena ka'ajná pechu nanakuwá: ‘Ajopana ja'apejé Tupana la'ajika weká palá’, ke. Ilé ke péchuruna nanakuwá rila'ajé ajopana chaje palá je'echú chu. Eyá pechu i'imaño nanakuwá: ‘Ajopana chaje Tupana la'ajika weká palá’, ke, nakú rila'ajé ajopana ja'apejé palá je'echú chu.

Jesús i'imaká piño najló ritaka'ajika yukuna marí

(Mc 10.32-34; Lc 18.31-34)

¹⁷Jesús ja'apari ají ke Jerusalén ejo. Rapunana chu riwa'a ra'apiyatéjena a'ajná ño'ojó kemachi ajopana liyá. Iyamá iphata jí'imaji nakoje (12) kele ne'emaká, rimá najló: ¹⁸⁻¹⁹“Chuwa we'ejichaka Jerusalén ejo. Rejo na'ajé nuká nawakára'ajeñojlo. Sacerdótena wakára'ajeño, Tupana puráka'alo nakú jewiña'atajeño, kélejlo na'ajé nuká, nenókaloje nuká penaje. Na'ajé nuká ajopana te'eré eyájenajlo; nala'ajé namákaja nuká; naña'ataje nuká, rejomi

nenoje nuká. E'iyonaja weji ke kala i'imajemi numakápo'oyo piño nopumí chuwá. Ina'uké i'imakáloje nupalamane penaje i'imaká nuká", ke rimaká najló.

Santiago, eyá Juan, kele jaló kejá'aka ruyánijlo nakaje Jesús liyá yukuna marí

(Mc 10.35-45)

²⁰ Ra'apiyatéjena nakiyana i'imaño Santiago, eyá Juan, kele. Zebedeo yaní ne'emaká. Neká jaló i'ijnayo Jesús awa'ajé najwa'até. Rutára'o ru'urúpachi aú rijimaje rukejá'akaloje nakaje riliyá.

²¹ Rimá rojló:

—¿Na piwata?

Rumá rijló:

—Pi'imajika ina'uké wakára'ajeri wakajé, nuwata pa'aká nuyani pijwáke'ena penaje, nayá'akoloje pawá'a. Pajluwaja piyureje yá'ako pawá'a ka'añá chojó pitá, eyá apú pajrú chojó pitá.

²² Raú Jesús kemari ruyánijlo:

—Unká iwe'epila naka kele ikeja'a nuliya. Chapú wani nala'ajika nuká. ¿E chi ijña'akajla panaku riká ñaké, nala'akela iká chapú?

—A'a, wajña'akárejla riká panaku.

²³ Rimá piño najló:

—Kewaka jo'ó, nala'ajé kaja iká chapú, nala'ajika nuká ke kaja. E'iyonaja unká nuká kalé a'ajeri ina'uké, nayá'akoloje nowa'a ka'añá ejo pitá ka'ajná, eyá pajrú ejo pitá ka'ajná. Tupana a'ajeri neká, rikaja kalé we'epiri mékajenaka yá'ajeño nowa'a.

²⁴ Ajopana, iyamá thé'ela kele (10) ra'apiyatéjena kaja i'imakaño, jema'año mékeka nemaká rijló. Raú nayúcha'o Juan, Santiago wa'até, cha. ²⁵ E Jesús kemari najló nawakáloje rawa'ajé, rimá najló:

—Kaja iwe'epí palá ajopana te'eré nakiyá wakára'ajeño nakojé. Najwa'atéjena minaná keja neká najwa'até. Kaphí wani nachaje wakára'ajeño wakára'aka najwa'atéjena. ²⁶ Eyá ijló, unká ñaké kalé ri'imajika. Iwata ka'ajná inakiyana chaje i'imakana. A'ajeri inakiyana ñathé, chá'atajeri iká piyukeja. ²⁷ Iwata ka'ajná inakiyana chaje i'imakana. La'ajeri rinakuwá inakiyana wa'até jápajeri ke, i'imajeri ajopana chaje. ²⁸ Ina'uké i'imakáloje nupalamane penaje i'imaká nuká. Unká nuphala majó ina'uké la'akáloje nojló nakaje penaje; nula'akáloje najló nakaje penaje nu'ujná majó. No'ojé nokó kajrú ina'ukena chaya penaje ne'emakóloje kapichákajo liyá raú —ke rimaká najló.

Jesús ja'apátaka mejlukaji iyamá mejluruna liyá yukuna marí

(Mc 10.46-52; Lc 18.35-43)

²⁹Jerusalén ejo Jesús i'ijnaká wakajé, ra'apá pajimila Jericó e'iyowá. Kajrú wani ina'ukena i'ijnaká rápumichu. ³⁰Aajnare ke iñe'epú awa'á iyamá mejluruna wani yá'áño.

Nema'aká aú nemaká: “Jesús ja'apari marí iñe'epú chuwá”, ke, nawíyo'oko nemaká:

—Wawakára'ajeri, David michú lakemi piká. Piwe'epí wamu'ují.

³¹Raú cha'apá re i'imakaño nakiyana akha'año neká, nemá najló: —Imanúma'o ta.

E'iyonaja richaje wani nawíyo'oka:

—Wawakára'ajeri, David michú lakemi piká. Piwe'epí wamu'ují.

³²Raú Jesús tajnaro rejé. Riwa'a najló ne'ejnakáloje rawa'ajé. Nephaka rinaku ee, rimá najló:

—¿Meke iwátaka nula'aká iká?

³³Nemá rijló:

—Wawakára'ajeri, pa'apata waliyá mejlukaji, wamachi piño.

³⁴Jesús we'epiri namu'ují, raú rijapa nejlú nakú. Richuwaja mejlukaji ja'apaka naliyá, rejéchami palá namaka. E ne'ejná Jesús wa'até rápumichu.

Jesús iphaka Jerusalén ejo yukuna marí

(Mc 11.1-11; Lc 19.28-40; Jn 12.12-19)

21 ¹⁻²E kaja nephá Jerusalén awa'ajé, pajimila Betfagé ejé. Yenuri Olivos awa'á riká. Jesús wakára'ari iyamá ra'apiyatéjena:

—Ja'apá pajimila ejo watukumá. Iphájikaja rejoy ee, amaje burra, ru'urí wa'até. Namukú chu ne'emajé. Eko ikaráka'a ruká iwáakaloje ruká, ru'urí wa'até, majó. ³Nemájika ee ijló: “¿Naje chi ikaráka'a neká?”, ke, imaje najló: “Wawakára'ajeri wátari neká meketánaja, rejomi wapa'ataje piño neká napumí chuwá”, ke.

⁴Rimaká najló keja nephátaka neká. Tupana puráka'alo ja'apátajeri michú kemaká rinaku keja ri'imaká. Ripiyá rilana'alo marí ke riyukuna i'imaká:

⁵“Imá pajimila Jerusalén eyájenajlo marí ke:

‘Iyaka'o, iwakára'ajeri waícha pajimila e'iyajé mapéjari keja.

Burro i'irí nakú ra'apá.

Kachini ña'ajeri i'irí nakú ra'apá’ ”,

ke rilana'aká riyukuna júpimi i'imaká.

⁶E kaja ra'apiyatéjena i'ijnaño Jesús kemaká najló ke la'ajé. ⁷Nawa'a burra, ru'urí wa'até, Jesús ejo. E nayúma'a na'arumaká nakiyana riwajlé chojé. E kaja Jesús jácho'oro riwajlé chojé yá'ajo. ⁸Kajrú ina'ukena i'imaká re. Neká ayúma'año kaja na'arumaká nakiyana ra'apaka ewá. Palá napechu i'imakale Jesús nakú, nala'á ilé ke. Ajopana mata'año wejirí paná kaje, naka'akáloje riká iñe'epú chojé, palá ramákoloje raú penaje. ⁹Ritukumá ja'apákaño, eyá rápumichu ja'apákaño, awíyo'oño kajrú. Marí ke nemaká nawíyo'oko rinaku:

—¡Wephákare wani ja'apí, David michú lakemi! ¡Wapura'achó palá riká, Tupana wakára'akare majó ina'uké i'imatájeri penaje, nakú! ¡Wephákare wani ja'apí, Tupana! —ke nawíyo'oka.

¹⁰Ilé ke Jesús iphaka Jerusalén e'iyajé, raú kajrú ina'ukena awakako richaje yaká'ajo. Nemá:

—¿Na chi kele?

¹¹—Jesús, Tupana puráka'alo ja'apátajeri riká. Pajimila Nazaret, Galilea te'eré nakú i'imakare, eyaje riká.

Jesús ja'apaka Tupana ñakaré chu i'imakaño nakú yukuna marí

(Mc 11.15-19; Lc 19.45-48; Jn 2.13-22)

¹²Rejomi Jesús mujlúka'ari Tupana ñakaré chojé, amari kajrú ina'ukena i'imaká richu. E rikeño'ó nanaku ja'apákana. Nakaje a'ajeño riwemí aú, eyá nakaje warúwa'ajeño, neká kajena nakú ra'apá richiyá piyuke. Liñeru apiyákajeño mesané ripajno'otá; túku'uchina pirakana a'ajeño ñáka'aru ripajno'otá kaja. ¹³Rimá najló:

—Tupana puráka'alo lana'akéjami kemari: “Re nuñakaré piyukeja ina'uké pura'akóloje nujwa'até richu penaje”. E'iyonaja apichata riká, a'akale nakaje ajopánajlo richu riwemí aú.



Richuwaja jata'ano pekowáaka. Jata'ajeño ñakaré ke wani ila'aká ijluwa riká —ke Jesús kemaká najló.

¹⁴Tupana ñakaré chu ajopana i'ijnaño rawa'ajé. Ne'iyajena i'imaño mejluruna, ajopana unká ja'apálaño palá. Ra'apata mejluruna liyá mejlukaji; ritejmo'ota kaja unká ja'apálaño. ¹⁵Eyá sacerdotena wakára'ajeño, Tupana puráka'alo nakú jewíña'atajeño wa'até, amaño rila'aká kajrú nakaje Tupánaja kalé we'epíkare la'akana. Nema'á kaja yuwaná awíyo'oka Tupana ñakaré chu. Marí ke nemaká Jesús nakú: “Wephákare wani ja'apí piká, Tupana wakára'akare majó ina'uké i'imatájeri penaje”, ke. Ilé kaje aú nayúcha'o. ¹⁶E nemá Jesusjlo:

—¿E pema'aká mékeka nemaká pinaku?

—A'a, noma'á. ¿Unká chi iwe'epila mékeka Tupana puráka'alo lana'akéjami kemaká? Rimá:

“Yuwaná kapajareruna,
pura'ajeño palá wani Tupana nakú”, ke.

¹⁷E ra'apáña neká, i'ijnari ají ke pajimila Betania ejo. Rejé rajúwa'a, re rikamato.

Jesús yerúka'aka paijí higuera chaje yukuna marí

(Mc 11.20-26)

¹⁸Muní ke lapiyami Jesús pa'aró piño Jerusalén ejo. Rapunana chu kewí rijló me'epijí i'imaká. ¹⁹Iñe'epú awa'á a'ajnare ke, ramá paijí higuera tára'ako. Raú ri'ijná rejo richa kulaje, amari mecharú ri'imaká. Ripánaja kalé i'imá rinaku, raú rimá rinaku:

—Kaja keja pi'imajika mecharú.

Ilé ke rimaká rinaku aú, riyuró kuwichila ke. ²⁰Ilé ke ra'apiyatéjena amaka aú, napechu i'imá: “¿Meke piyuke wani rila'alaka!” E nemá Jesusjlo:

—¿Meke la'ajé chi riyuricho kuwichila ke kiñaja wani?

²¹Jesús kemari najló:

—Jema'á marí: Kaphí ipechu i'imajika ee Tupana chojé, ila'ajé kaja nakaje nuli'ichaka paijí higuera nakú ke. Unkájika ee ipechu i'imá kaphí Tupana chojé, imajla ka'ajná: “Unká ri'imalaje ñaké”, ke. Raú ñaké ri'imakajla. Richaje puwicha nojé ila'ajé nakaje, ipechu i'imajika ee Tupana chojé kaphí. Imakela marí ipurejlo: “Pácho'o, pikojno'ó juni jalomi jakojé”, ke, ñaké ri'imakajla.

²²Piyukeja nakaje ikejá'ajikare Tupana liyá rijwa'até pura'akano kewá, ra'ajé ijló riká, ipechu i'imajika ee kaphí richojé —ke Jesús kemaká najló.

**Nawata we'epíkana naka wakára'ari Jesús i'imaká.
Riyukuna marí**

(Mc 11.27-33; Lc 20.1-8)

23 E kaja Jesús mujlúka'ari piño Tupana ñakaré chojé. Re rewíña'ata ina'uké Tupana nakú. E sacerdotena wakára'ajeño, pheñawilana wa'até, iphaño rinaku. Nemá rijló:

—¿Na puráka'alo aú chi pila'á nakaje? ¿Na chi wakára'ari pila'aká ñaké?

24 Jesús kemari najló:

—Nukejá'aje kaja iliyá nakaje yukuna. A'ajipajika ee nojló palá riká, numaje kaja ijlo naka nuwakára'ajeri.

25 Rimá piño najló:

—¿Na wakára'ari Juan michú la'aká bautizar ina'uké i'imaká: Tupana ka'ajná, ina'uké ka'ajná?

Raú napura'ó pajwa'atéchaka nekámika ke, nemá pajlokaka:

—Wemájika ee rijló: “Tupana wakára'ari ri'imaká”, ke, rimaje ka'ajná wajló: “Eta, ¿naje kalé ta unká jema'alá ra'apiyá i'imaká?”

26 Eyá wemájika ee ka'ajná rijló: “Ina'uké puráka'alo aú”, ke, e mariruna yúcha'ajeño wachá raú. Napiyá wakero'ó, napechu i'imakale Juan nakú: “Tupana puráka'alo ja'apátajeri ri'imaká”.

27 Raú nemá Jesusjlo:

—Kaapí, unká wawe'epila na puráka'alo aú ka rila'aké bautizar ina'uké.

Jesús kemari najló:

—Ñakele unká kaja numalaje ijlo naka wakára'ari nula'aká nakaje.

**Nema'akáloje Tupana ja'apiyá penaje
Jesús i'imari najló marí yuku**

28 Jesús kemari najló:

—¿Meke ijlo marí yuku? Pajluwa ina'uké i'imichari. Riyani i'imichaño iyamá. Rimicha pajlúwajlo: “Nu'urí, chuwa pijápicha wamena e'iyá”. **29** “Unká”, ke rimíchaka rijló. Júpichami ri'ijnatiya ripéchuwa: “¿Naje chi numicha rijló unká, ke, maapami?” Raú ri'ijichá jápaje. **30** E rara'apá i'ijichari piño apú ri'irijlo kemaje: “Chuwa pijápicha wamena e'iyá”. “Je”, ke rimíchaka rijló, e'iyonaja unká ri'ijnalacha jápaje.

31 Ilé ke Jesús i'imaká najló yuku. Rejomi rimá najló:

—¿Mékaje chi la'arí rara'apá wátaka ke?

Nemá rijló:

—Paineko riwakára'akare.

Raú Jesús kemari najló:

—Jema'á marí: Ñaké kaja unká ina'ukélaruna, liñeru ña'ajeño nawakára'ajeñojlo, eyá inaana namanáicho la'ajeño, kele chá'ataka iká, nema'akale palá Tupana puráka'alo ja'apiyá, ne'emakáloje rijwa'atéjena penaje. ³² Juan el Bautista jewíña'atari iká palá la'akaná nakú i'imaká, e'iyonaja unká jema'alá ra'apiyá. Eyá unká ina'ukélaruna, liñeru ña'ajeño nawakára'ajeñojlo, inaana namanáicho la'ajeño, kele jema'año ra'apiyá i'imaká. Ilé ke amaka i'imaká, e'iyonaja unká ipajno'otala ipéchuwa pu'uaré ila'akare liyá Tupana ejo jema'akáloje ra'apiyá penaje —ke rimaká najló.

Jesús i'imari yuku nawe'epíkaloje raú mékeka nala'ajika riká chapú. Riyukuna marí

(Mc 12.1-12; Lc 20.9-19)

³³ Jesús kemari najló: “Jema'á marí yuku: Pajluwaja ina'uké ejátiyari kajmú kaje icha ijí ri'ikakapere e'iyowá. Rejomi richipúka'atiya kurara tujlá ke rinakuwá. Rili'ichá kaja ralá apáka'aruna. Rejomi rili'ichá rika'apó yenoje, richiyá riwa'aphena amákaloje riká palá penaje. E riyuricha rijwa'até jápajeño nakiyánajlo ri'ikakapere e, namákaloje rijló riká. Ri'ijichaka yámona, rimicha najló: ‘Chuwa nu'ujichaka, eko amá palá nojló riká. Kajmú kaje icha nakiyana no'ojé ijló ramákana wemí’. E ri'ijichá ya'ajnaje reyá. Júpija ri'imichaka rewá.

³⁴ “E kaja waja kajmú icha ña'akana iphicha rená chojé, raú paminá wakári'icha rijwa'até jápajeño i'ijnaká richa ña'ajé rijló. ³⁵ Raú ne'ejichá rejoy, iphíchaño rimena amájeño nakú. Nephíchaka nanaku ee, napatiya neká. Pajluwa naña'atiya, apú nenocho, eyá apú ne'ekatiya riwilá jipa aú. ³⁶ Raú paminá wakári'ichari ajopana rijwa'até jápajeño rejoy, apú wakajé chaje íkí'irunaka ne'emichaka. Ñaké kaja rimena amájeño li'ichaka neká chapú.

³⁷ “Raú riwakári'icha kaja penaje ri'irí wani rejoy, ripechu i'imichákale: ‘Nu'urí riká, raú nephaje ra'apí’. ³⁸ E'iyonaja rimena amájeño amíchaka aú riká waíchaka, nemicha pajlokaka: ‘Ilé ri'irí ta waícha, kélejlo riyureje rimena piyuke. I'ijná wenótachi riká ta, rimenami yuríkoloye wajló’. ³⁹ E kaja riphicha nanaku. E napatiya riká, nawá'icha riká rimena yámojo, rejé nenocho riká”, ke Jesús i'imaká najló riyukuna.

⁴⁰ Rejomi rimá najló:

—¿Meke ipechu nakú paminá la'ajika keleruna, rimena amájeño, riphájika nanaku wakajé?

41 Nemá rijló:

—Rinótaje neká, unká ina'ukélaruna ne'emaká pachá.

Unká wani riwe'epílaje namu'ují. E riyureje ajopánajlo rimena namákalaje riká penaje. Neká a'ajeño rijló palá richa riphájika rená chojé wakajé kewá.

42 Jesús kemari piño najló:

—Kaja iwe'epí mékeka Tupana puráka'alo kemaká marí ke:
“Pajluwaja ina'uké i'imajeri.

Ne'iyajena kemájeño rinaku: ‘Unká ina'ukélari riká’, ke.

E'iyonaja ajopana chaje ri'imajika,

ilé kaje penaje Tupana a'ajíkale riká.

Palani waja nakaje Tupana la'akare”, ke rimaká.

43 Ijló numá: Tupana jácho'otajeri iká rijwa'atéjena, judíona nakiyana, ra'akáloje apumí chojé ajopana te'eré eyájena rijwa'atéjena penaje. Ileruna la'ajeño palá Tupana wátaka ke.

44 Chapú wani ri'imajika unká wátalaño nukajlo. Kajrú wani namájika chapú kaje yajwé —ke Jesús kemaká najló.

45 Sacerdótena wakára'ajeño, fariséona wa'até, jema'año ripuráka'alo. Yúkuja ri'imá najló, e'iyonaja nawe'epí rimaká nanaku raú meke la'ajeñoka ne'emaká. **46** Ñakele nawata ripatakana nawajákaloje riká penaje, e'iyonaja nakero'ó ajopana ina'ukena piyá, napechu i'imakale rinaku: “Tupana puráka'alo ja'apátajeri riká”, ke.

Jesús i'imaká najló nawá'akako yukuna marí

(Lc 14.15-24)

22 ¹ Jesús jewíña'atari piño neká yuku kaje aú, rimá najló: ² “Chuwa nu'umajika yuku ijló, raú iwe'epíkalaje mékajenaka i'imajeño Tupana wa'até je'echú chu: Pajluwa ina'uké i'imichari. Ne'emakana ri'imichaka. Ri'irí wá'akichako wakajé riwakári'icha rijwa'até jápajeño la'aká kajrú a'ajnejí. ³ Rejomi riwakári'icha riyukupéra'akarena wá'aje. Raú ne'ejichá nawá'aje, e'iyonaja unká nawátalacha fiesta ja'apátakana rijwa'até. Raú napi'ichó riyukuna i'imajé rijló. ⁴ Kéchami riwakári'ichaka ajopana, rijwa'até jápajeño nakiyana, i'ijnaká piño riyukupéra'akarenajlo kemaje. Imá najló: ‘Kaja a'ajnejí ñapicha. Kaja nenó jémana pirakana ñópo'ojloruna nakiyana ajnákaloje ne'imi penaje. Ri'irí wá'akajero, ñakele riwata i'ijnaká fiesta ja'apátaje rijwa'até’, ke imájika najló.

“E ne'ejichá najló kemaje. ⁵ E'iyonaja unká na'alacha napuráka'alo nanakojó. Pajluwa i'ijichari rimena e'iyajé

jápaje; apú i'ijichari le'ejepelaji a'ajé. ⁶Ajopana li'ichaño chapú ne'emakana wa'até jápajeño. Nenocha nakiyana. ⁷Ilé kaje aú ne'emakana yúchi'icharo kajrú, raú riwakári'icha rile'ejena suráana nakapichátaje. Riwakári'icha kaja nakára'ataka pajimila nañakaré i'imakare e'iyá. ⁸Ilé ke nali'ichaka. E kaja rimicha rijwa'até jápajeñojlo: 'Chuwa nu'urí wá'akajiko, kaja lamá'atakeja ripé piyuke nakaje. Unká ina'ukélaruna neká, nuyukupéra'akarena paineko i'imaká. ⁹Ñakele chuwa i'ijná mapeja iñe'epú chuwa pajimila e'iyowá. Imá piyukeja iphátajikarenajlo ne'ejnakáloje majó fiesta ja'apátaje nujwa'até'. ¹⁰Raú ne'ejichá pajimila e'iyowá, apú iñe'epú chuwa, apú iñe'epú chuwa ke ina'uké wá'aje. Raú nawakátiya neká palájne'ekena, chapújne'ekena wa'até, ne'emakana ñakaré chojé. Kaja namano'otiya riñakaré.

¹¹"E ne'emakana iphicha rejé, amíchari pajluwaja najwa'até. Pu'uwareni ra'arumaká i'imichaka. ¹²Raú ne'emakana kemíchari rijló: '¿Meke pimujlúki'ichaka majó mapeja pu'uwareni pa'arumaká wa'até. Fiesta wá'akakajo wakajé unká iná ja'apátala riká pu'uwareni iná a'arumaká wa'até. ¿Meke pimujlúki'ichaka ta majó?', ke rimíchaka rijló. Unká ra'ajipalacha rijló. ¹³E ne'emakana kemíchari a'ajnejí tamáka'atajeñojlo: 'Jepo'otá riká ta ritajné nakiyá, ra'anapitá nakiyá wa'até, kéchami iki'ichaka riká waka'apoyo kalajerúwaka. Re ina'uké iyájeño kajrú. Kamachá najma'ajika naiwá re, namákale chapú kaje yajwé', ke rimíchaka najló", ke Jesús i'imaká yuku najló.

¹⁴E rimá piño najló: "Kajrú Tupana yukupéra'aka ina'ukena ne'emakáloje rijwa'atéjena penaje, e'iyonaja nanakiyánaja kalé jema'año ra'apiyá."

Liñeru na'akare ne'emakánajlo yukuna nakejá'aka Jesús liyá yukuna marí

(Mc 12.13-17; Lc 20.20-26)

¹⁵E fariséona nakiyana pura'año pajwa'atéchaka, nakulákatakaloje Jesús nakú, rijimaje nemakáloje rinaku: "Apo'ojó wani ripechu wate'eré eyá wakára'ajeño liyá", ke. ¹⁶Raú nawakára'a fariséona nakiyana, eyá Herodes wa'atéjena nakiyana, kele i'ijnaká Jesús chaje. Nemá rijló:

—Wewíña'atajeri, wawe'epí kewákaje nakaje pewíña'atakare nakú. Nakaje Tupana wátakare iná la'aká, kaje nakú pewíña'ata ina'uké. Re wawakára'ajeño nakiyánajlo unká paala pipuráka'alo, e'iyonaja unká pa'alá pinakojó napura'akaro nakaje pewíña'atakare nakú. Wawe'epí unká napechu i'imakáloje palá pinaku penaje kalé

pewíña'atala neká. ¹⁷Chuwa pimá wajló meke pipechu nakú liñeru nakejá'akare waliyá, na'akáloje riká we'emakana Césarjlo penaje. Romano nakiyana riká. ¿E chi palani liñeru a'akana rijló, unká ka'ajná?

¹⁸Jesús we'epiri mékeka napechu i'imaká rinaku, nawátakale rimaká najló apo'ojó ne'emakana liyá, nala'akáloje raú riká chapú. Raú rimá najló:

—Pajlákachina iká. ¿Naje iwata numaká ijló ilé kaje nakú, rejomi imakáloje nunaku: “Apo'ojó wani ripechu we'emakana liyá”, ke? ¹⁹Iya'atá nojló kele liñeru a'akare i'imakánajlo, nomachi.

Raú naya'atá rijló pajluwata. ²⁰Jesús yaká'aro richaje, e rimá najló:

—¿Na jenami chi kari liñeru nakú? ¿Na íi chi lana'akéjami rinaku?

²¹Nemá:

—We'emakana César jenami rinaku. Rií kaja rinaku.

Raú rimá najló:

—A'á i'imakánajlo nakaje rijló penaje i'imakare. Eyá Tupánajlo a'á kaja nakaje rijló penaje i'imakare.

²²Ilé ke rimaká najló aú, napechu i'imá: “¡Meke kapechú wani ra'ajpichaka wajló!”, ke. E na'apáña na riká reyá.

Kaja taka'akaño makápo'ojiko piño yukuna nakeja'a Jesús liyá. Riyukuna marí

(Mc 12.18-27; Lc 20.27-40)

²³Riwakajé saducéona nakiyana i'ijnaño Jesús chaje. Neká kemakeño kaja taka'akaño nakú: “Unká namakápo'olajo piño”, ke. Raú nemá rijló:

²⁴—Wewíña'atajeri, Moisés puráka'alomi chu kemari: “Pajluwa ka'ajná taka'añáakachu riyajalo mayanikeru, palani re'ewemi ra'apiyajé wá'akakojla rujwa'até, re'ewé michú yanimínami yuríkoloje rapumí chojé ripalamane aú”, ke rimaká. ²⁵Ñaké riká. Maare pajluwaja ina'uké i'imari wajwa'até. Iyamá kuwá'ata kele ne'emaká rejena wa'até, achiñana waja. Phe'ejrí i'imaká wá'akaro paineko. Riká tajnáñaari ruká mayanikéruja. ²⁶Rejomi ra'apejé i'imaká wá'akaro riyajálomi wa'até. Ñaké kaja rikapicháñaaka ruká mayanikeru kaja. Ají ke waja iyamá kuwá'ata kele ne'emaká wá'akako rujwa'até i'imaká. ²⁷Neká piyukeja kapichaño ruliya mayanikéruja. E kaja penaje nayajalo penájemiru kapichayo nápumichu. ²⁸Eta, Tupana makápo'otajika piño piyuke ina'ukena

kaja taka'akaño wakajé, ¿mékaje yajalo chi ru'umajika riwakajé? Iyamá kuwá'ata kele achiñana yajálomi ru'umaká.

29 Raú Jesús kemari najló:

—Meke unká wani iwe'epila rinakojé. Unká pachá iwe'epila Tupana puráka'alo lana'akéjami nakojé, raú unká kaja iwe'epila nakaje rila'akare nakojé. **30** Piyukeja kaja taka'akaño makápo'ojiko piño wakajé, unká ne'emalaje pajwa'atéchaka wá'akajeñomi ke. Unká kaja nawá'akalajo piño pajwa'atéchaka. Tupana wa'atéjena, je'echú chiyájena, ke waja ne'emajika riwakajé. **31** Re kaja taka'akaño makápo'ojiko piño yukuna Tupana puráka'alo lana'akéjami, iwe'epíkare nakojé, e'iyá. ¿Unká chi ipura'aló rijwa'até? Riká kemari: **32** “Nuká Tupana, Abraham, Isaac, Jacob, kele pechu i'imakare chojé kaphí. Unká méño'ojo kaja taka'akaño penájemina pechu i'imalá nochojé kaphí. Kajmuruna jo'ó i'imakáñoja kalé pechu i'imárijla kaphí nochojé”, ke Jesús kemaká najló nawe'epíkaloje raú kewaka rijwa'atéjena kaja taka'akaño i'imaká kajmuruna je'echú chu.^g

33 Ilé ke Jesús kemaká najló aú, napechu i'imá: “¡Meke palá wani rewíña'ataka ina'uké!”

Nakaje Tupana wátaka iná la'aká apú nakaje chaje yukuna marí

(Mc 12.28-34)

34 Kaja fariséona jema'año Jesús manúma'ataka saducéona yukuna, raú nawakó nekámika ke. **35** E kaja pajluwaja Tupana puráka'alo nakú jewíña'atajери iphari Jesús nakú nakaje yukuna kejá'aje riliyá, rema'akáloje mékeka rimájika rijló apo'ojó ka'ajná, raú rimá rijló:

36 —Wewíña'atajери, Tupana puráka'alo lana'akéjami wakára'ari iná la'aká kajrú nakaje. ¿Na riwata wala'aká apú rimakare nakú chaje wani?

37 Jesús kemari rijló:

—Piwata íki'ija wani piwakára'ajeri Tupana, pichi'inárikana ri'imakale. Pi'ijnatá palá pipéchuwa rinaku. Pewíña'o kaja nakaje nakú ri'imakáloje palá Tupánajlo penaje. Pila'á rijló piyukeja nakaje palá, íki'ija piwátakale riká. **38** Ilé kaje riwata iná la'aká apú nakaje riwakára'akare iná la'aká chaje wani. **39** Eyá re kaja apú nakaje ñakeja kemachi Tupana wátakaja iná la'aká. Riká kemari: Piwata íki'ija piyukeja ina'uké, piwátaka

^g 22:32 Pipura'ó riyukuna wa'até: Éxodo 3:6

pikó ke kaja. ⁴⁰Iná la'akachu ilé iyamá rimakare nakú aú, iná la'ajla piyuke Tupana puráka'alo kemaká ke, wa'até Ripuráka'alo ja'apátajeño michuna kemakare nakú i'imaká, ke kaja —ke rimaká rijló.

**Riká Tupana wakára'akare ina'uké i'imatájeri penaje,
yukuna marí**

(Mc 12.35-37; Lc 20.41-44)

⁴¹Re jo'ó kaja awakákajo nakú fariséona nakiyana i'imaká.

⁴²Jesús kemari najló:

—¿Meke chi ipechu riká, Tupana wakára'akare majó ina'uké i'imatájeri penaje, nakú? ¿Na lakénami nakiyana chi riká?

Nemá rijló:

—David michú lakénami nakiyana riká.

⁴³Jesús kemari najló:

—Tupana Pechu wakára'aka ke David lana'aká riyukuna i'imaká. Riká kemari rinaku: “Nuwakára'ajeri riká”, ke. Ñakele unká rilakénami nakiyana wani kalé riká. Marí ke rilana'aká riyukuna i'imaká:

⁴⁴“Wawakára'ajeri wani Tupana kemari Nuwakára'ajeri nakú marí ke:

‘Palá wani nupechu pinaku.

Pi'imá nawakára'ajeri nujwa'até.

Maare pi'imajé nowa'á a'ajná nuchá'atajika chapú pinaku péchuruna ejená', ke rimaká”.

⁴⁵Jesús kemari piño najló:

—David kemari: “Nuwakára'ajeri riká”, Tupana wakára'ajikare ina'uké i'imatájeri penaje nakú. Ñakele unká rilakénami nakiyana wani kalé riká, nemaká rinaku ke —ke rimaká najló.

⁴⁶Unká nawe'epila mékeka rapiyákakana raú. Reyá a'ajná ño'ojó nawó la'aró ra'apí nakaje yukuna kejá'akana riliyá nakú.

**Jesús akha'aká fariséona, eyá Tupana puráka'alo nakú
jewíña'atajeño, kele maná yukuna marí**

(Mc 12.38-40; Lc 11.37-54; 20.45-47)

23 ¹Jesús kemari ra'apiyatéjenajlo, ajopánajlo wa'até, marí ke: ²“Tupana puráka'alo nakú jewíña'atajeño, eyá fariséona, kele pechu nanakuwá: ‘Wekaja kalé we'epiño palá meke kemakánaka Tupana puráka'alo Moisés lana'akare i'imaká nakojé', ke napechu. Newíña'ata kaja iká rinaku. ³Ñakele

jema'á napuráka'alo ja'apiyá, e'iyonaja ila'aniña nala'aká ke. Palá napura'akó, e'iyonaja unká nala'alá ñaké. ⁴Nawakára'a ina'uké la'aká nakaje puwicha nojé wani, eyá neká unká wani wátala ñaké la'akana. ⁵Nala'á nakaje, piyukeja ina'uké amákaloje neká penaje. Nachúta'a kaja napulá nakojé, eyá na'anapitá nakojé wa'até, Tupana puráka'alo lana'akéjami nakiyana. Waphereni na'arumaká chu nachira'ó, ajopana amákaloje neká ne'iyá penaje. ⁶Najñákachu na'ajnewá ajopana ina'ukena wa'até, nawata nawakára'ajeño ñáka'aru chu yá'akano. Ajopana chá'atajeño ke nayá'ako nawakáka'alo ñakarelana chu. ⁷Nawata ina'uké iphaka na'apí; nawata kaja najalákaka neká palá. Nachira'akó ewá nawata nemaká najló: 'Wewíña'atajeri', ke.

⁸"Iwátaniña ina'uké kemaká inaku: 'Wewíña'atajeri', ke. Pajluwa yaní keja iká pajwa'atéchaka, raú pajluwaja kaja jewíña'atajeri. Nukaja kalé jewíña'atajeri wani. ⁹Imaniña ina'uké marí te'erí nakú i'imakaño nakú: 'Jara'apaji', ke. Re pajluwaja jara'apá wani je'echú chu. ¹⁰Iwátaniña kaja ajopana kemaká inaku: 'Wawakára'ajeño', ke, nukaja kalé pajluwa i'imatájeri i'imajeri iwakára'ajeri wani. ¹¹⁻¹²Mapeja la'aká rinakuwá ajopana chá'atajeri ke, ajopana ja'apejé riká Tupánajlo. Eyá la'arí rikó mapeja ajopana ñathé a'ajeri keja, chá'atajeri e'iyayá", ke Jesús kemaká najló.

¹³E rimá piño najló: "Chapú wani ri'imajika iká Tupana puráka'alo nakú jewíña'atajeñojlo, ñaké kaja fariséonajlo. Mapeja wani ila'aká inakuwá palá la'ajeño ke ina'uké ijlu chu, unká ñaké la'ajeño kalé i'imaká e'iyonaja. Iká jitaño kaja ajopana liyá Tupana ja'apiyá jema'akana apu. Unká jema'alá ra'apiyá, eyá unká kaja iyurila ajopana ina'ukena jema'aká ra'apiyá. ¹⁴Chapú wani ri'imajika iká Tupana puráka'alo nakú jewíña'atajeñojlo, ñaké kaja fariséonajlo, pajlákachina wani i'imakale. Mapeja ipajlaka iwakajílomina wa'até, ika'akáloje naliyá nañakaré. Rejomi ipura'ó Tupana wa'até jupi, raú nawe'epika piyá mapeja ipajlaka najwa'até. Ilé ke ila'aká pachá, ajopana chaje wani Tupana wajájika iká.

¹⁵"Chapú wani ri'imajika iká Tupana puráka'alo nakú jewíña'atajeñojlo, ñaké kaja fariséonajlo. Piyukeja te'eré nakuwá ja'apá. Ja'apá kaja juni jalomi chuwá ipuráka'alo yukuna i'imakana nakú, nema'akáloje ra'apiyá penaje. Eyá pajluwaja ka'ajná jema'akachu ra'apiyá, chapú wani ila'aká riká raú, ichaje wani ramájikale chapú kaje yajwé kera'athani unká yakálare chu.

16 “Chapú wani ri'imajika ijló. Mejluruna ke iká. Kaja imá marí ke: ‘Iná kemakachu nakaje la'akana nakú Tupana ñakaré íf a'akana aú, unká meke ri'imalá inajlo, unkachu iná la'alá iná kemaká ke’. Eyá iná kemakachu nakaje la'akana nakú: ‘Oro Tupana ñakaré chu i'imakare íf a'akana aú, unká wani paala iná la'aká, unkachu iná la'alá iná kemaká ke’. 17 ¡Meke mapechúruna wani iká! ¡Mejluruna ke wani iká! ¿Na chi ijló richaje wani: oro ka'ajná, Tupana ñakaré ka'ajná? Tupana ñakaré chu oro i'imakale, iwe'epí rinakojé: ‘Richaje japi riká’, ke, e'iyonaja unká ñaké kalé riká. 18 Imá kaja: ‘Kemari ka'ajná nakaje la'akana nakú altar íf a'akana aú, unkachu rila'alá rimaká ke, unká meke ri'imalaje rijló’. Eyá rimájika ee ka'ajná nakaje la'akana nakú piraji nenókare altar nakojé íf a'akana aú, unká paala rila'ajika, unkájika ee rila'á riká rimaká ke. 19 ¡Meke mapechúruna wani iká! ¿Na chi ijló richaje wani: piraji nenókare altar nakojé ka'ajná, altar ka'ajná? Altar nakojé nato'otákale piraji tami, riyuró Tupánajlo a'akanami ke. 20 Kemari nakaje la'akana nakú altar íf a'akana aú, unká kemalá altar íf nakuja kalé. Rimá kaja piraji nato'otákare richaje íf nakú. 21 Eyá kemari nakaje la'akana nakú Tupana ñakaré íf a'akana aú, unká Tupana ñakaré íf nakuja kalé rimá. Rimá kaja Tupana íf nakú, Tupana ñakaré ri'imakale. 22 Eyá kemari ka'ajná nakaje la'akana nakú je'echú íf a'akana aú, kemari kaja Tupana íf nakú, richu ri'imakale.

23 “Chapú wani ri'imajika iká Tupana puráka'alo nakú jewíña'atajeñojlo, ñaké kaja fariséonajlo. ¡Pajlákachina wani iká! Palani iyuríkano Tupánajlo iyamá thé'ela ka'alá ipaijíf icha nakiyá pajlúwa'ala. E'iyonaja unká wani a'alá inakojó Nupuráka'alo, apú chaje wani i'imakare, ila'akáloje rimaká ke penaje, raú ila'akáloje palá, iwe'epíkalaje kaja ajopana ina'ukena mu'ují, ila'akáloje kaja rimaká ke penaje. 24 ¡Mapechúruna wani iká! Iká a'año mapéjari puráka'aloji inakojó, eyá iná i'imakare wani palamane, unká a'alá inakojó.

25 “Chapú wani ri'imajika iká Tupana puráka'alo nakú jewíña'atajeñojlo, ñaké kaja fariséonajlo. ¡Pajlákachina wani iká ta! Iká jipañoño i'iraka'akú, eyá iparatune, kele wajlé chiyaja. Paineke ika'á ipechu nakiyá pu'uwaré la'akaná. Mapeja kaja ila'aká inakuwá palá la'akaño ke, pu'uwaré péchuruna i'imaká e'iyonaja. Iká jata'año kaja ajopana ina'ukena liyá nakaje, kanakúje'ekena wani i'imakale. 26 ¡Mapechúruna wani iká ta! Paineke ipá itiyélane chiyá richojó. Rejomi riwajlé chiyá, rejenowaja ri'imakáloje mapijaru.

²⁷“Chapú wani ri'imajika iká Tupana puráka'alo nakú jewíña'atajeñojlo, ñaké kaja fariséonajlo. Jareni aú ina'uké e'ejatá támijimina ka'akelana ramákolaje palá penaje, ke kaja iká. Majó ramó palá, e'iyonaja richojó kajrú támijimina aphinami, kajrú nakaje richu pu'uaré. ²⁸Ilé ke iká. Mapeja ila'aká inakuwá ina'ukejlo palájne'ekena ke, chapú i'ijnataka ipéchuwa e'iyonaja, chapújne'ekena i'imakale.

²⁹“Chapú wani ri'imajika iká Tupana puráka'alo nakú jewíña'atajeñojlo, ñaké kaja fariséonajlo. Pajlákachina iká. Iká wakára'año nala'aká Tupana puráka'alo ja'apátajeño, ichi'iná michuna nókarena michuna tami pajré i'imaká. Iwakára'a kaja natára'ataka jipa rawa'á, ina'uké pechu kapicháñaaka piyá neká, palá la'ajeño ne'emakale. ³⁰Rejomi imá: ‘We'emakela wachi'iná michuna i'imaká wakajé, unká wa'alajla nañathé Tupana puráka'alo ja'apátajeño nókana aú’. ³¹Ilé ke imakale inakuwá, iná we'epí raú ichi'iná michuna i'imaká ke kaja iká. ³²Ñakele iñapata nakaje unká ichi'iná michuna ñapátalare la'akana i'imaká.

³³“¡Unká wani ina'ukélaruna iká! ¿Meke la'ajé chi i'imajó kera'athani unká yakálare liyá? ³⁴Nuwakára'aje piño ijlo Tupana puráka'alo ja'apátajeño. Kapechú wani newíña'atajika iká, e'iyonaja inoje nanakiyana. Ne'iyajena inoje a'awaná apiyákakanami nakojé iphakeja. Eyá ne'iyajena iña'ataje nawakáka'alo ñakarelana chu. Kajrú ila'ajika neká chapú, apú pajimila ewá, apú pajimila ewá ke. ³⁵Ilé ke ila'ajika pachá palá la'ajeño, kajrú wani amájika chapú kaje yajwé. Abel michú nókana eyá rikeño'ó i'imaká, ajopana, ajopana ke, nenójika palájne'ekena. Kaja penaje nenó Zacarías, Berequías michú i'irimi, i'imaká. ³⁶Ilé ke nala'aká i'imaká pachá, Tupana wajájeri me'etení i'imakaño wa'ató ripachá”, ke Jesús kemaká najló.

Jesús iyaka Jerusalén e i'imakaño wa'até yukuna marí

(Lc 13.34-35)

³⁷Jesús kemari Jerusalén e i'imakaño nakú: “Jerusalén eyájena, iká noño Tupana puráka'alo ja'apátajeño michuna i'imaká. Ika'á kaja jipa nanakiyana cha inókalaje ne'emaká raú. Tupana wakára'akarena michuna, neká ila'aké chapú wani. Pulapé nuwátakajla awakátakana i'imakáloje no'opiyá jema'ajeño penaje. Kapéru awakátaka ruyani ruyuphé ja'apejé, ke kaja nuwátakajla awakátakana i'imakáloje no'opiyá jema'ajeño penaje, e'iyonaja unká iwátala. ³⁸Ñakele chuwa unká na i'imalaje amájeri penaje.

Ikoja i'imajika chuwa. ³⁹Ñakele numá ijló: Me'etení eyá unká amálaje nuká, a'ajná imájika nunaku: 'Wephákare wani ja'apí, kele Tupana wakára'akare majó ina'uké i'imatájeri penaje' ", ke ejená Jesús kemaká najló.

Jesús kemari nakajya'atájika Tupana ñakaré. Riyukuna marí

(Mc 13.1-2; Lc 21.5-6)

24 ¹E kaja Jesús jácho'oro Tupana ñakaré chiyá. E ra'apiyatéjena i'ijnaño rijwa'até pura'ajó Tupana ñakaré nakú. ²Rimá najló:

—Kele Tupana ñakaré amákare me'etení, jipa nakiyá la'akanami, unká i'imalaje piño maare, a'ajná ño'ojó chami chapú péchuruna kajya'atájikale riká piyukeja. Rejomi unká wani jipa yurílajo pacháaka rapukúnami chu.

Jesús i'imaká najló mékeka ri'imajika yewicha eja'awá kapichájiko yukuna marí

(Mc 13.3-23; Lc 21.7-24; 17.22-24)

³E ne'ejná yenuri Olivos ejo. Re ne'emaká ee, Jesús ja'apiyatéjena i'ijnaño rawa'ajé rijló kemaje:

—Pimá wajló mékechamika kele, pimíchaje nakú wajló, i'imajika pimíchaka ke. ¿Na aú chi nawe'epeje yewicha pipa'akó majó jená? ¿Na aú chi ina'uké we'epeje yewicha eja'awá kapichako jená?

⁴Rimá najló: “Amá ikó palá wani, ajopana pajlaka piyá ijwa'até. ⁵Ripiyá kajrú ina'ukena iphájika majó nanakuwá kemaje: 'Nuká Tupana wakára'akare majó ina'uké i'imatájeri penaje', ke. Kajrú wani kaja napajlájika ina'uké wa'até. ⁶Jema'ajé kaja kajrú ajopana nókakako pajwa'atéchaka yukuna. Ikeroniño ilé kaje yukuna jema'akana aú. Kaja keja ri'imajika, e'iyonaja unká jo'ó wani eja'awá kapichájiko jená iphálaje riwakajé. ⁷Ajopana te'eré eyájena nókajeño ajopana te'eré eyájena wa'até; kajrú ina'ukena taka'ajika me'epijí nakú; kajrú kaja te'erí ñaka'ajiko apú ewá, apú ewá ke. ⁸Ilé kaje aú nakeño'ojé chapú kaje yajwé ña'akana panaku.

⁹“Rejéchami napatájika iká nala'akáloje iká chapú penaje. Nenoje iká. Piyukeja ina'uké pechu i'imajika chapú inaku, jema'akale no'opiyá. ¹⁰Riwakajé kajrú ne'iyajena pechu yuríjika nochojé i'imakana kaphí. Chapú namájika pekowáaka. Napura'ajó kaja chapú pekowáaka la'akana nakú. ¹¹Riwakajé kajrú ne'iyajena kemájika mapeja nanakuwá: ‘Tupana

puráka'alo ja'apátajeño weká', ke. Kajrú napajlájika ina'uké wa'até.

¹²“Kajrú kaja pu'umaré la'akaná i'imajika riwakajé. Raú ne'iyajena yuréjeño ajopana wátakana kajrú. ¹³⁻¹⁴Unká yurílajeño Tupana puráka'alo ja'apiyá i'imakana nataka'ajika ejená, ri'imataje kapichákajo liyá, riwátakale piyuke ina'uké wakára'ajeri i'imakana, ne'emakáloje palá la'ajeño raú. Ne'ejnajé riyukuna i'imajé ajopánajlo, ajopánajlo ke piyuke eja'awá chuwá. Ilé kaje aú ajopana te'eré eruna, ajopana te'eré eruna ke jema'ajeño riyukuna. Piyukeja ina'uké jema'ajíkaja riyukuna ejéchami, riphájika rená chojé eja'awá tajnákoloje penaje.

¹⁵“Natára'ataje nakaje pu'uwareni wani Tupana ñakaré chojé. Tupana puráka'alo ja'apátajeri michú Daniel i'imari riyukuna júpimi i'imaká. (Marí lana'akéjami amájeñojlo numá: Iwe'epí meke kemakánaka riká.) ¹⁶Ilé ke ri'imajika wakajé, palani iká Judea te'eré nakú i'imakaño ñaakó ipuré e'iyajé. ¹⁷Eyá i'imajeri ka'ajná riwakajé riñakaré ji'iwata chu, palani riñaakó reyaja. Riwitúka'aniña nakaje ña'ajé riñakaré chiyá paineko. ¹⁸Riwakajé apú ka'ajná i'imajeri rimena e'iyá. Palani riñaakó reyaja, unká meke la'ajé ripa'alojla riñakaré ejo ra'arumaká ña'ajé. ¹⁹Riwakajé chapú wani ri'imajika kanupana inaana i'imajíkañojlo. Chapú wani kaja ri'imajika inaana kayanikérunajlo. Ñaké kaja ri'imajika chapú wani re jo'ó kaja yaní i'irakaño chu'uchujlo. ²⁰Ipura'ó Tupana wa'até, ri'imaká piyá ñaké ijlo yawijá i'imajika japi ka'ajná, watána'akaje wakajé ka'ajná. ²¹Riwakajé kajrú wani ina'ukena amájika chapú kaje yajwé. Tupana keño'ótaka eja'awá i'imaká eyá maárejecha, unká jo'ó wani namala ñaké chapú kaje yajwé. Unká kaja namálaje ñaké reyá a'ajná ño'ojó. ²²Tupana witúka'atajери najló rená, ri'imaká piyá júpija wani najló, íki'ija riwátakale ina'ukena, ri'iwapakárena rijluwa i'imaká. Najló riwitúka'ataje rená. Unkákela rila'ajla ñaké, unká na kalé i'imarojla kapichákajo liyá.

²³“Apala nemaje ka'ajná ijlo: 'Iyaka'o a'ajná ño'ojó ke ka'ajná, ají ño'ojó ke ka'ajná, kele Tupana wakára'akare majó ina'uké i'imatájeri penaje'. Ilé ke nemájika ee ijlo, jema'aniña na'apiyá. ²⁴Kajrú wani pajlákachina i'imajika. Mapeja nemájika nanakuwá apú, apú ke: 'Ina'uké i'imatájeri nuká', ke. Apú ka'ajná kemájeri rinakuwá: 'Tupana puráka'alo ja'apátajeri nuká', ke. Nala'ajé kajrú nakaje unká méño'oyo ajopana la'alare kaje, raú napajlákaloje najwa'até. Tupana i'iwapakárena rijluwa i'imaká

wa'até napajlaje kaja, e'iyonaja unká nema'alaje na'apiyá.

²⁵Iwe'epí numakare nakú: Unká chiyó ri'imá ñaké, numá ijló rinaku.

²⁶“Ñakele nemájika ee ka'ajná ijló nunaku: ‘Re riká ya'ajná desierto chu, amicha riká’, ke, i'ijnaniña rejo. Unká nuká kalé ri'imajika. Nemaje kaja ka'ajná ijló: ‘Re riká ukapú chu, amicha riká’, jema'aniña kaja na'apiyá. ²⁷Pichaní kamaré pataká je'echú chiyá, ke kaja namájika nuphaka majó. Ina'uké i'imakáloje nupalamane penaje i'imaká nuká. ²⁸Méreka támijimi i'imaká ee, rejé wayuna awakaño. Ñaké kaja ina'uké we'epika nuphájika piño majó nakoje”, ke Jesús kemaká najló.

Jesús pa'ajiko piño majó yukuna marí

(Mc 13.24-37; Lc 21.25-33; 17.26-30, 34-36)

²⁹Jesús kemari piño najló: “Kajrú wani ina'uké amájika chapú kaje yajwé. Riwakajé unká kamú, eyá kerí wa'até, kamaré amálajo. Iwijrina ja'ajeño kaja majó je'echú chiyá. Piyukeja nakaje je'echú chu i'imakare ñaka'ajiko. ³⁰Raú nawe'epeje meketánaja i'imajemi Tupana i'irí iphájika. Kajrú wani nakero'ojiko, akuwaná kajrú neyájika. Rejéchami namájika nuwitúka'aka majó je'echú chiyá juni juwáka'ala e'iyowá. Piyukeja ina'ukena wakára'ajeri penaje nuphaje majó riwakajé. Kajrú mejáma'atani ke i'imajika nowa'ó. ³¹Tupana wakára'ajeri kaja rijwa'atéjena, je'echú chiyájena, majó. Kajrú luwiluwí kaje mejé i'imajika. Nawakátaje piyukeja nujwa'atéjena, nu'uwapakárena nujuwa ajopana ina'ukena e'iyayá i'imaká. Nawá'aje piyukeja neká ne'emajika ewá.

³²“Kaja iwe'epí meke newíña'ataka iká pají higuera nakoje. Nemá rinaku: ‘Ri'iché pitúka'akachu ripaná motho'okáloje rinakiyá penaje aú, iná we'epí yewíchaja jarechí iphaka rená chojé’, ke. ³³Ñaké kaja amájika wakajé nakaje numakare nakú ijló ke aú, iwe'epeje yewíchaka riphaka rená chojé nupa'akóloje majó penaje. ³⁴Unká chiyó ina'uké marí eja'awá chu i'imakaño tajno, ri'imajé ilé numaká ijló ke. ³⁵Je'echú, eja'awá wa'até tajnájero, eyá nupuráka'alo unká tajnálajo. Numaká rinaku keja nakaje i'imajika.

³⁶“Unká na we'epila na wakajeka ri'imajika ñaké, na kamú jená jápika. Tupana wa'atéjena, je'echú chiyájena, unká kaja we'epilaño mékechamika ri'imajika. Nuká, Tupana i'irí, unká kaja we'epila riká. Rikaja kalé Nora'apá Tupana we'epiri mékechamika ri'imajika”, ke rimaká najló.

³⁷E rimá piño najló: “Noé michú i'imaké wakajé, ke kaja ri'imajika nupa'ajiko yámona. Ina'uké i'imakáloje nupalamane penaje i'imaká nuká ³⁸Ri'imaké wakajé Tupana wakára'ari kajrú juni ja'akó, pu'uwaré la'ajeño kapicháloje rakojé penaje. Unká chiyó riwakára'a kajrú juni ja'akó wakajé, mana'ija ne'emajika na'ajnewá ajñakana nakú. Nakaje jalá i'irakana nakú ne'emaké. Na'aké kaja nayani pajlokaka nawá'akakoloje penaje. Ilé kaje nakuja ne'emaké Noé mujlúka'aka riwapúrune chojé ejená. ³⁹Unká nawe'epila nakapichako jená. Kajrú wani juni ja'akó i'imaká aú rakojé nakapichó i'imaká. Ñaké kaja ri'imajika ina'ukejlo nupa'ajiko majó piyá. Unká kaja nawe'epílaje mékechamika nupa'ajiko piño majó. Ina'uké i'imakáloje nupalamane penaje i'imaká nuká. ⁴⁰Iyamá ina'ukena ka'ajná i'imajeño namena e'iyá. Je'echú chiyájena wá'ajeño pajluwaja nanakiyana. Apú yuréjero, unkale rema'alá no'opiyá. ⁴¹Riwakajé kaja iyamá inaana tujla'ajeño nakaje pajñakani ka'ajná nakaje tujláká'aruna chu. Nawá'aje pajluwájaruja, nujwa'atéjeru ru'umakale. Apa'awelo yuréjeyo, unkale roma'alá no'opiyá.

⁴²“Ilamá'ata palá ipéchuwa nupé, unkale iwe'epílaje mékechamika nupa'ajiko piño majó. ⁴³Jema'á marí: Paminá we'epíkela mékechamika piro'okeji iphájika nakaje jata'ajé riñakaré chiyá lapí, unká rikamátalojla. Kajmuni ri'imakajla a'ajná ramaka riphaka ejená. Unká riyurílajla rimujlúka'aka riñakaré chojé nakaje jata'ajé. ⁴⁴Ñaké kaja ilamá'ataka ipéchuwa nupé, unkale iwe'epílaje noná. Mana'í chiyó nuphaje inaku majó”, ke Jesús kemaká najló.

Pajluwaja jápajeri la'arí palá, apú la'arí chapú.

Riyukuna marí

(Lc 12.41-48)

⁴⁵Jesús i'imari najló marí yuku: “Re ka'ajná pajluwa wa'até jápajeri. Rikariwate i'ijichaka ya'ajnajo yámona, ra'achá riká a'ajnejí tamáka'atajери rijwa'até jápajeñojlo penaje riphaka rená chojé kewá. Palá rili'ichaka rijápaka'ala palá, remi'ichákale ra'apiyá. Kapechuni ri'imichaka. ⁴⁶Rikariwate iphíhchaka rinaku wakajé, ramicha rila'aká piyuke palá, riwakára'aka riká ke. Palá rila'ajika riká raú. ⁴⁷Ra'ajé ka'ajná riká piyukeja rinane amájeri penaje. ⁴⁸Eyá apala unká ina'ukélarí ri'imakela, rimajla rikariwate nakú ya'ajná ri'imaká ketana: ‘Meke júpija wani nuwakára'ajeri malára'ataka rikó rewá, unká riphálaje kiñaja’. ⁴⁹Ilé ke ripechu i'imakela, rikeño'ojla rikariwate wa'até jápajeño

la'akana chapú. Kajrú ra'ajnewá ajñakana nakú ka'ajná ri'imajla; yuwéra'akajo nakú ri'imajla ajopana yuwéra'akachona wa'até. ⁵⁰Wajátakajo rikariwate iphákela rinaku, riwajajla riká kajrú wani. ⁵¹Riwakára'ajla riká ya'ajnajje, rijña'akáloje chapú kaje yajwé panaku pajlákachina wa'até penaje. Re kaja riyajla kajrú; rajma'ajla raiwá kajrú, kewini yajwé akuwaná”, ke Jesús i'imaká najló riyukuna rewíña'atakaloje neká raú penaje.

Jesús i'imaká najló iyamá thé'ela kele ináyana yukuna

25 ¹Jesús kemari piño najló: “Chuwa nu'umajika ijló yuku, raú iwe'epíkaloje mékeka nakaje i'imajika Tupana ja'apiyá jema'ajéñojlo. Iyamá thé'ela kele ináyana i'ijichaño lapí ajopana wá'akako amaje. Naji'ichá nakamaré nakaje jilá aú lukúna'ako najwa'ató. E ne'ejichá ru'uwapanipé wátaje, ne'ejnakáloje rijwa'até penaje. ²Pajluwa thé'ela kele nanakiyana i'imichaño kapechúruna. Eyá pajluwaja thé'ela kele kaja i'imichaño mapechúruna. ³Mapechúruna i'imichákaño ji'ichaño najwa'ató nakamareja kalé. Unká najña'alacha najwa'ató rijilá nakho'okáloje rapumí chojé ritajnájiko ee. ⁴Eyá kapechúruna i'imichákaño ji'ichaño nakamaré jilá najwa'ató. ⁵E kaja ne'ejichá ru'uwapanipé wátaje. Júpija rimalára'atiyaka rikó. Kaja ewaja tapú nocha neká, raú nakamátiyo. ⁶E lapí jenaji ke, nemi'ichá nawíyo'oka: ‘Ilé ru'uwapanipé waícha, jácho'o majó ramaje’. ⁷Raú neká ináyana jácho'ochaño nakamaré lamá'ataje. ⁸Rejéchami mapechúruna i'imichákaño kemíchaka kapechúrúnajlo: ‘Aá wajló wejapa ikamaré jilá nakiyana, yewíchaja wakamaré yakaka’. ⁹E'iyonaja nemicha najló: ‘Unká wa'alaje ijló rinakiyana. Wa'akela ijló rinakiyana, unká riphálajla wajló. Iwarúwa'achi ijluwa riká riñakarelana chiyá’. ¹⁰Raú ne'ejichá riwarúwa'aje. Nayámona ru'uwapanipé iphíchari. Ji'ichaño nakamaré jilá najwa'atoja kalé mujlúki'ichaño rijwa'até pají chojé nawá'akako amaje. Namujlúki'ichaka ejomi, paminá chawí'ichari pají numaná. ¹¹Rejéchami ajopana ináyana iphíchaka rejé. Nemicha paminajlo: ‘Pijme'etá wajló rinumaná’. ¹²E'iyonaja rimicha najló: ‘Unká wani nuwe'epila mékajenaka iká’ ”, ke Jesús i'imaká najló riyukuna.

¹³Rejomi rimá piño najló: “Kaja numá ijló i'imakáloje lamá'atakejami ke maare nupé, unkale iwe'epílaje mékechamika nuphájika. Ina'uké i'imakáloje nupalamane penaje i'imaká nuká”, ke rimaká najló.

Pajluwa a'aká rijwa'até jápajeñojlo liñeru yukuna marí

(Lc 19.11-27)

14E Jesús kemari najló: “Chuwa nu'umajika piño yuku ijló raú iwe'epíkaloje nupa'ajiko majó nakojé: Pajluwaja ina'uké i'imichari. Riká wátiyari ya'ajnaje ajopana te'eré ejo i'ijnakana. Ri'ijichaka yámona, riwá'icha rijwa'até jápajeño maná. Nephíchaka rinaku ee, ra'achá najló riliñérute nakiyana nala'akáloje raú nakaje nakánakaloje richaje liñeru ri'imaká ya'ajno ketana. **15**Pajluwaja nanakiyánajlo ra'achá cinco mil monedas oro nakiyá la'akanami. Apujlo ra'achá dos mil. Apujlo ra'achá mil. Palá nawe'epika ramákana lokópa'ala ra'achá najló riká. E kaja rácho'ocho reyá ya'ajnajo.^h **16**Rijwa'até jápajeri, ra'akárejlo cinco mil monedas, warúwa'ari nakaje raú. Raú rikánicha piño apú cinco mil richaje. **17**Ñaké kaja apú ra'akárejlo dos mil monedas, warúwa'ari kaja nakaje raú. Raú rikánicha piño apú dos mil richaje. **18**Eyá ra'akárejlo mil monedas, lamá'atari riká te'erí e'iyajé.

19“Júpichami nakariwate pi'ichako piño nachaje ramákaloje mékeka nala'aká liñeru ra'akare najló i'imaká. **20**Paineko ra'akárejlo cinco mil, iphíchari rinaku. Richaje ra'achá rijló apú cinco mil. Rimicha rijló: ‘Nukariwate, cinco mil monedas pa'á nojló i'imaká, eyá maare re apú cinco mil richaje’. **21**Raú rikariwate kemíchari rijló. ‘Meke palá wani. Palá wani pila'aká liñeru no'okare pijló aú. Chuwa no'ojika pijló richaje wani. Majó pimujlúka'a, we'emachi keyajupa pajwa'atéchaka’. **22**Rejomi apú rijwa'até jápajeri, ra'akárejlo dos mil monedas i'imaká, iphíchari rinaku. Rimicha rijló: ‘Nukariwate, nojló pa'á dos mil i'imaká, eyá maare re apú dos mil richaje’. **23**Raú rikariwate kemíchari rijló. ‘Palá wani pila'aká liñeru no'okare pijló aú, chuwa no'ojika pijló richaje wani. Majó pimujlúka'a, we'emachi keyajupa pajwa'atéchaka’.

24“E kaja penaje apú rijwa'até jápajeri, ra'akárejlo mil monedas i'imaká, iphíchari kaja rinaku. Rimicha rijló: ‘Nukariwate, nuwe'epí kaphí wani piwakára'aka pijwa'atéjena. Piwakára'a nejátaka pijló nakaje icha ijí, richa i'imakáloje pijló penaje. Unká pijápala pimena e'iyá, e'iyonaja re nakaje pijló. **25**Ilé ke pi'imakale, nukero'ó pipiyá. Raú nota'á te'erí e'iyajé liñeru pa'akare nojló i'imaká. Marí riká pa'aká nojló ri'imaká keja’. **26**Raú rikariwate

h 25:15 “Moneda o talento”, nale'ejé liñeru íí. Cinco mil monedas equivaldría al salario de casi cien años de trabajo de un obrero.

kemíchari rijló: ‘¡Meke unká wani ina'ukélari piká ta kele! Ijnuni wani piká. Piwe'epí ajopana ejátaka nojló nakaje icha ijí, richa i'imakáloje nojló penaje. Piwe'epí kaja unká nujápala numena e'iyá, e'iyonaja re nakaje nojló. ²⁷Palani pilamá'atakajla kele liñeru riñakarelana chojé rikánakaloje richaje liñeru penaje. Ilé ke pila'akela, pipa'atakajla nojló nuliñérute me'etení richaje wa'até’.

²⁸“Raú rimicha re i'imichákañojlo: ‘Ijña'á riliyá ilé mil rikapi i'imakare a'akáloje riká diez mil kapi i'imakárejlo. ²⁹Kajrú kapi i'imajíkajlo no'ojé richaje. Eyá unká na kapi i'imalare liyá, nuka'ajé wejapa nakaje i'imakare rikapi wa'ató. ³⁰Chuwa iki'ichá ilé nujwa'até jápajeri maliyaru ta ají ke kalajeruni chojé. Re kajrú neyájika, kajrú kaja najma'ajika naiwá, namájikale chapú kaje wani yajwé re’, ke nawakára'ajeri kemíchaka najló”, ke Jesús i'imaká yuku najló.

Eja'awá tajnájiko wakajé yukuna marí

³¹Jesús kemari piño najló: “Ina'uké i'imakáloje nupalamane penaje i'imaká nuká. Nuphájika piño majó wakajé, kajrú mejáma'atani i'imajika nowa'ó. Ñaké kaja nujwa'atéjena, je'echú chiyájena, i'imajika nowa'ó. Ajopana chaje wakára'ajeri nuká. ³²Piyukeja ina'ukena, eja'awá chu i'imakaño, awakájiko nujimaje. Rejomi nutamáka'ataje neká paliyáaka. Ovéjana lamára'ajeri tamáka'ataka ovéjana, kawayana pirakana liyá, ke kaja nutamáka'atajika neká paliyáaka. ³³Palá la'akaño nuwakára'aje i'ijnaká ka'añá chojó pitá, eyá pu'uaré la'akaño nuwakára'aje i'ijnaká pajrú chojó pitá. ³⁴Eyá nuká, ina'uké i'imakana wani, kemájeri ka'añá chojó pitá i'imajíkañojlo: ‘Majó i'ijná. Palá wani Nora'apá la'ajika inaku, ñakele chuwa i'imajika wajwa'até matajnako. Ñaké Nora'apá pechu nakú ila'akana i'imaká rikeño'ótaka eja'awá i'imaká piyá’, ke.

³⁵“Kewí me'epijí i'imajika nojló wakajé, a'akeno nojló a'ajnejí i'imajika. Eyá nunúrupi chu makára'atajiko wakajé, a'akeno nojló i'irakaje i'imajika. Eyá ite'eré nakuwá no'opájikano wakajé, imakeno nojló nuyuríkoloje ijwa'até penaje. ³⁶Kamu'ují nula'ajíkano a'arumakaji nakú wakajé, a'akeno nojló riká. Nutami nu'umajika wakajé, iwojítakeno nuká. Ina'uké wajakelana chu nu'umaká wakajé, i'ijnakeno kaja nomaje, ke numájika najló. ³⁷E palá nupechu i'imakárena nakú kemájeño nojló: ‘wawakára'ajeri, ¿Mere wakajé chi wa'á pijló a'ajnejí i'imaká, pijña'akale me'epijí panaku? ¿Mere wakajé chi wa'á kaja pijló i'irakaje i'imaká, pinúrupi chu

makára'atako aú? ³⁸ ¿Mere wakajé chi wemá pijló i'imaká, piyuríkoloje wañakaré chu wajwa'até? ¿Mere wakajé chi wa'á pijló a'arumakaji, kamu'ují pila'akale rinaku i'imaká? ³⁹ ¿Mere wakajé chi wawojita pi'imaká, pitami pi'imakale? ¿Mere wakajé chi we'emá pamaje, ina'uké wajákelana chojé?', ke nemájika nojló.

⁴⁰“Raú ne'emakana wani kemaje najló: ‘Ilé ke ila'aká aú piyukeja nojena kamu'ují la'akaño nakú palá, nunaku ila'á kaja palá raú’. ⁴¹Rejomi rimaje pajrú chojó pitá i'imajíkañojlo: ‘Iijná nuliya kera'athani unká yakálaje, Tupana lamá'atakare Jiñá Chi'inárikanajlo, rijwa'atéjenajlo wa'até, chojé. ⁴²Kewí me'epijí i'imaké wakajé nojló, unká a'alá nojló a'ajnejí i'imaká. Nunúrupi chu makára'atako i'imaké wakajé, unká a'alá nojló juni i'imaká. ⁴³Ajopana te'eré eyaje ke nu'umaké ijwa'até wakajé, unká kaja imalá nojló i'imaká nuyuríkoloje ijwa'até iñakaré chu. Kamu'ují nula'aké a'arumakaji nakú wakajé, unká a'alá nojló a'arumakaji. Nutami nu'umaké wakajé, unká iwojítala nu'umaká. Ina'uké wajákelana chu nu'umaké wakajé, unká i'imalá nomaje', ke numájika unká jema'alaño no'opiyajlo.

⁴⁴“Raú nemaje nojló: ‘¿Mere wakajé chi unká wa'alá pijló a'ajnejí, kewí me'epijí i'imaká pijló e'iyonaja? ¿Mere wakajé chi unká wa'alá pijló i'irakaje, pinúrupi chu makára'atako i'imaká e'iyonaja? ¿Mere wakajé unká wemalá pijló i'imaká piyuríkoloje wajwa'até, pa'apaka wate'eré nakuwá i'imaká e'iyonaja? ¿Mere wakajé unká wa'alá pijló a'arumakaji, kamu'ují pila'aká rinaku i'imaká e'iyonaja? ¿Mere wakajé unká we'emalá piwojítaje, pitami pi'imaká e'iyonaja? ¿Mere wakajé unká we'emalá pamaje, ina'uké wajákelana chu pi'imaká e'iyonaja?', ke nemájika nojló riwakajé.

⁴⁵“Raú ne'emakana wani kemaje najló: ‘Unká ila'alale ñaké palá no'opiyá jema'ajeño, kamu'ují la'akaño nakú, unká kaja ila'alá nuká palá raú', ke numájika unká jema'alaño no'opiyajlo. ⁴⁶Ñakele neká amájeño chapú kaje yajwé ñakeja wani, eyá palá la'akaño i'imajeño matajnako je'echú chu”, ke Jesús kemaká najló.

Nawakára'ajeño pura'akó pajwa'atéchaka Jesús nókana nakú yukuna marí

(Mc 14.1-2; Lc 22.1-2; Jn 11.45-53)

26 ¹Jesús ñapátaka newíña'atakana ejomi, rimá ra'apiyatéjenajlo:

²—Kaja iwe'epí iyamá kala i'imajemi nale'ejé fiesta Pascua iphájika rená chojé. Riwakajé na'ajé nuká ajopánajlo nenókalaje

nuká a'awaná apiyákanami nakoje. Ina'uké i'imakáloje nupalamane penaje i'imaká nuká —ke rimaká najló.ⁱ

³Riwakajé sacerdotena wakára'ajeño, eyá Tupana puráka'alo nakú jewíña'atajeño, judíona nakiyana, kele awakaño Caifás ñakaré kópeje. Sacerdotena wakára'ajeri Caifás i'imaká riwakajé.

⁴Re napura'ó pajwa'atéchaka Jesús nakú, namákalaje mékeka napatakajla riká, unká ajopana we'epílaja nenókalaje riká penaje.

⁵E'iyonaja nemá pajlokaka:

—Unká wapatalaje riká fiesta e'iyá. Wala'akela riká ñaké re'iyá, kajrú wani ina'uké yúcha'akojla wachá raú.

Pajluwájaru akho'oká nakaje jilá Jesús nakoje yukuna marí

(Mc 14.3-9; Jn 12.1-8)

⁶Jesús i'imari Betania e Simón napona patáka'atarojlo ñakaré chu. ⁷Re ri'imaká ee, pajluwájaru iphayo rawa'ajé. Nakaje jilami i'imari rukapi wíluru chu. Jipa alabastro nakiyá la'akanami wíluru i'imaká. Richu pu'umé amarí, kawemini wani i'imá. Jesús yá'ako mesa nakú ejé rokho'ó riwilá e'iyajé riká. ⁸Ra'apiyatéjena amaka aú rula'aká ilé ke, nayúcha'o ruchá, nemá pajlokaka:

—¡Naje rukupá mapeja wani kele pu'umé amarí! ⁹Kawemini wani kele pu'umé amarí. Ro'okela ajopánajlo riká, rujña'ajla liñeru riwemí kajrú, raú ro'ojla kamu'ují la'akaño ñathé.

¹⁰Jesús jema'arí mékeka napura'akó pajwa'atéchaka, raú rimá najló:

—¿Naje chi iyúcha'o kelerú inanaru cha? Palá ruli'ichaka nuká nakaje ruli'ichaje nojló aú. ¹¹Ñakeja kamu'ují la'akaño i'imajika ijwa'até, eyá nuká unká ñakeja kalé nu'umajika ijwa'até maare. ¹²Palá marirú li'ichaka nuká, rokho'ochákale pu'umé amarí nunakojé, raú rulamá'atiya nunapona. Nato'otájika nutami támijimina to'otákelana chojé wakajejlo penaje ri'imajé. ¹³Nujwa'atéjena i'ijnajeño Tupana i'imataka ina'uké kapichákajo liyá yukuna i'imajé ajopánajlo, ajopánajlo ke. Riwakajé ne'emajé kaja waje ruli'ichaje nuká yukuna najló, napechu kapicháñaaka piyá ruká —ke Jesús kemaká najló.

Judas a'aká ripinánajlo Jesús yukuna marí

(Mc 14.10-11; Lc 22.3-6)

¹⁴Iyamá iphata ji'imaje nakoje (12) kele Jesús ja'apiyatéjena i'imaká, nanakiyana Judas i'imaká. Riká i'ijnari sacerdotena wakára'ajeño wa'até pura'ajó. ¹⁵Rimá rijló:

—¿Méreje a'ajé nojló liñeru, no'okáloje ijló Jesús?

Raú na'á rijló treinta monedas riwemí.^j ¹⁶Reyá a'ajná ño'ojó Judas a'akeri rinakojó Jesús, ramákaloje mékechamika palani ra'akana najló.

Jesús ajñaka fiesta a'ajnená ra'apiyatéjena wa'até yukuna marí

(Mc 14.12-25; Lc 22.7-23; Jn 13.21-30; 1 Co 11.23-26)

¹⁷E kaja nale'ejé fiesta Pascua iphari rená chojé. Riwakajé najñake pan mamúra'atakanaru. E ra'apiyatéjena iphaño Jesús awa'ajé, nemá rijló:

—¿Mere chi piwata wala'aká fiesta Pascua a'ajnená?

¹⁸Rimá najló:

—I'ijná pajimila ejo. Re iphátaje pajluwaja ina'uké. Rijló imaje: “Wewíña'atajeri kemíchari rinakuwá: ‘Yewicha riphaka rená chojé nojló, raú nuwata riñakaré chu fiesta Pascua a'ajnená ajñakana no'opiyatéjena wa'até’ ”, ke imájika rijló nunaku.

¹⁹Raú ra'apiyatéjena la'año Jesús wakára'aka nala'aká ke. Nala'á re fiesta Pascua a'ajnená. ²⁰Lapichami Jesús yá'ako iyamá iphata ji'imaji nakojé (12) kele ra'apiyatéjena wa'até mesa nakú. ²¹Najñaka na'ajnewá ee, rimá najló:

—Me'etení numá ijló: Pajluwaja inakiyana maare a'ajeri nupinánajlo nuká.

²²Raú kamu'ují napechu la'akó. E pajewémichaka ke nemaká rijló:

—Wawakára'ajeri, ¿nuká chi kele pimá nakú?

²³Jesús kemari najló:

—Ilé ejátari pan nuparatune chojé nujwa'até, a'ajeri nupinánajlo nuká. ²⁴Ina'uké i'imakáloje nupalamane penaje i'imaká nuká. Piyuke Tupana puráka'alo lana'akéjami kemaká nunaku i'imaká, ke nala'ajika nuká, e'iyonaja kalé chapú wani nakaje i'imajika ilé a'ajeri nuká nupinánajlo. Unkákela rimotho'ojla i'imaká, palani ri'imakajla rijló.

²⁵Raú Judas, ripinánajlo ra'ajeri, kemari rijló:

—Wewíña'atejeri, ¿nuká chi kele pimá nakú?

—A'a —ke rimaká rijló.

²⁶Najñaka na'ajnewá ee, Jesús ña'arí rikápojo pan, rimá Tupánajlo:

—Palá pila'aká weká marí pan aú.

j 26:15 Treinta monedas: pa'u keta kerí ketana iná jápaka wemí ejé ke ri'imaká.



Rejomi ritupa'á rinakiyana, e ritamáka'ata ra'apiyatéjenajlo riká. Rimá najló:

—Ajñá riká. Marí nunapona.

²⁷Rejomi rijñá'á rikápojo tiyela, kajmú jalá amúra'atakanami i'imari chu. Rimá Tupánajlo:

—Palá pila'aká weká marí aú.

Rejomi ra'apata ra'apiyatéjenajlo riká, rimá najló:

—I'irá riká. Piyukeja iká i'irajeño marí tiyela chu i'imakare.

²⁸Nutaka'ajika ichaya wakajé, kajrú nura akho'ojiko nophú chiyá.

Ripalamane aú Tupana amajo kajrú ina'ukena chaje, pu'uaré nala'akare liyá. Ilé ke rila'ajika ichaya, iyuríkoloje ripalamane.

²⁹Unká nu'uralaje piño ijwa'até marí eja'awá chu marí kaje jalá.

Nora'apá wa'até we'emajika je'echú chu wakajé, nu'urajé piño waje kaje jalá ijwa'até re —ke Jesús kemaká najló.

Unká chiyó Pedro micho'otá Jesús chaya, Jesús i'imari rijló riyukuna. Marí riyukuna

(Mc 14.26-31; Lc 22.31-34; Jn 13.36-38)

³⁰Natanika Tupana yale ejomi, ne'ejná yenuri Olivos ejo. ³¹Re Jesús kemari najló:

—Ñaano pani lapí piyuke ipechu la'ajiko ujwí nuliyá. Nokoja iyuríjika nuká. Tupana puráka'alo lana'akéjami kemari: “Nenoje ovéjana liyá nalamára'ajeri, raú makajmala neñáajika riká”, ke rimaká. ³²Nenoje nuká, e'iyonaja kalé numakápo'oyo piño nopumí chuwá. Rejomi nu'ujnajé Galilea ejo itukumá.

33E Pedro kemari rijlól:

—Apala ajopana ka'ajná pechu la'ajero ujwí piliyá, nuká kalé unká wani nupechu la'alajo ujwí piliyá.

34 Jesús kemari rijlól:

—Pema'á numaká pijlól: Unká chiyó kapere yaka'á chuwayá lapí, kaja weji ke pecha pimicho'otájika nuchaya.

35 Pedro kemari piño rijlól:

—Ewá kalé nenójika nuká pijwa'até, e'iyonaja unká wani numicho'otálaje pichaya.

Ajopana ra'apiyatéjena kemaño ñaké kaja.

Jesús pura'akó Tupana wa'até Getsemaní e yukuna marí

(Mc 14.32-42; Lc 22.39-46)

36E kaja Jesús jácho'oro ra'apiyatéjena wa'até ají ke Getsemaní ejo. Re rimá najlól:

—Maare iya'o, nupura'ajiko Nora'apá wa'até ketana.

37Riwa'a a'ajná ño'ojó kemachi rijwa'ató Pedro, Juan, Santiago, keleja. Rejéchami ripechu la'akó kamu'ují wani. **38**E rimá najlól:

—Kamu'ují wani nupechu me'etení nujluwa. Iyuró maare, ikamátaniño kalé.

39E ra'apáña neká a'ajná ño'ojó pani. Rejé rijláma'o te'erí jimaje. Ripura'ó Tupana wa'até, rimá rijlól:

—Nora'apá, piwátajika ee, pi'imatá nuká marí chapú kaje yajwé amákana liyá. Ri'imaniña kalé nuwátaka ke; nuwata ri'imaká piwátaka ke —ke rimaká rijlól.

40E ripa'ó ra'apiyatéjena chaje, amari mana'ija ne'emaká kamátakajo nakú. Rimá Pédrojlo:

—¿Unká chi méño'oyo i'imalajla kajmuruna nujwa'até pajluwa kamú jená ketana? **41**Ikamátaniño, ipura'ó Tupana wa'até pu'uaré la'akaná a'aká piyá ime'é rijluwa. Re ipechu nakú ila'akáloje palá penaje, e'iyonaja kalé unká méño'oyo ila'alajla palá ikoja —ke rimaká najlól.

42E ri'ijná piño Tupana wa'até pura'ajó, rimá rijlól:

—Nora'apá, piwátajika ee, pi'imatá nuká marí chapú kaje yajwé amákana liyá. Pila'á piwátaka ke nuká.

43E ripa'ó piño ra'apiyatéjena chaje, amari ne'emaká piño kamátakajo nakú, tapú chá'atakale neká. **44**Riyurí nakamátako. E ripa'ó piño weji ke pe la'aká nakú Rara'apá wa'até pura'ajó. Ñakeja kaja rimaká rijlól. **45**Rejomi ripa'ó piño ra'apiyatéjena i'imaká ejo, rimá najlól:

—¿Re jo'ó kaja chi ikamátako iwatána'akaloje penaje? Chuwa, kaja riphicha rená chojé nojló, na'akáloje nuká chapú la'ajéñojlo. Ina'uké i'imakáloje nupalamane penaje i'imaká nuká. ⁴⁶Jácho'o, chuwa i'ijná we'ejnachi. Kaja ilé a'ajeri nuká pu'uwaré la'ajéñojlo waícha —ke rimaká najló.

Napataká Jesús yukuna marí

(Mc 14.43-50; Lc 22.47-53; Jn 18.2-11)

⁴⁷Re jo'ó kaja Jesús pura'akó ra'apiyatéjena wa'até ee, Judas iphari nanaku. Iyamá iphata ji'imaje nakojé (12) kele ra'apiyatéjena nakiyana ri'imaká. Kajrú ajopana ina'ukena wa'até riphá rejé. Jajalu, kujyúwa'ala, kaje i'imari nakapi. Sacerdótena wakára'ajeño, eyá pheñawilana, kele puráka'alo aú ne'ejná rejo ripataje. ⁴⁸Maapami ke Judas a'aká rijwa'até i'ijnakáñojlo jenaji, nawe'epíkaloje mékajeka napatájika penaje. Rimá najló:

—Pu'uwaká nuchiño'ojika rijimá chiyá, riká ipataje.

⁴⁹Rejéchami ri'ijnaká Jesús awa'ajé rajalákakaloje riká, rimá rijló:

—Wewíña'atajeri.

Rejéchami richiño'oká rijimá chiyá. ⁵⁰Jesús kemari rijló:

—Nujwáke'ewe, pila'á nakaje pipechu nakú ri'imaká ke.

Reja netá Jesús cha, pataño riká.

⁵¹Rejéchami pajluwaja Jesús ja'apiyatéjena nakiyana jero'oká rijajálune ra'aruná chiyá. Riká aú rimata'á pajluwa sacerdotena wakára'ajeri wa'até jápajeri i'ijwí. ⁵²Raú Jesús kemari rijló:

—Pilamá'ata pijajálune ra'aruná chojé. Piyukeja jajalu aú nókajeño, kapichaño jajalu aú ja kaja. ⁵³¿Unká chi piwe'epila, nuwátakela numajla Nora'apajlo riwakára'akaloje setenta mil rijwa'atéjena, je'echú chiyájena, majó? Neká mejñátañojla nuká naliyá. ⁵⁴Ilé ke ri'imakela, unká ri'imalajla Tupana puráka'alo lana'akéjami kemaká ri'imajika nakú ke.

⁵⁵Rejomi rimá najló:

—¿Naje chi i'ijichá majó jajalu, kujyúwa'ala, kaje wa'até nupataje? ¿Jata'akachi ke wani ila'aká nuká ijluwa? We'echú ka'alá keja nowíña'atajika ina'uké Tupana ñakaré chu, e'iyonaja unká ipataké re nu'umajika. ⁵⁶E'iyonaja kalé ila'ajé nuká ilé ke me'etení, júpimi Tupana puráka'alo ja'apátajeño michuna kemaká nunaku i'imaká ke ri'imakáloje.

Rejéchami piyukeja ra'apiyatéjena ja'apáñaaka Jesús. Kaja neñaó reyá.



Nakulákatako Jesús nakú yukuna marí

(Mc 14.53-65; Lc 22.54-55, 63-71; Jn 18.12-14, 19-24)

⁵⁷E kaja nawa'a Jesús ají ke Caifás ñakaré ejo. Sacerdótena wakára'ajeri wani Caifás i'imaká. Tupana puráka'alo nakú jewiña'atajeño, pheñawilana wa'até, awakaño rejé. ⁵⁸Eyá Pedro i'ijnari rápumichu juká kemachi, iphari riñakaré kópeje. Rejé riyá'o Tupana ñakaré wa'aphé i'imakaño wa'até, ramákaloje reyá mékeka nala'aká Jesús.

⁵⁹Kaja nawa'a Jesús rejo. Re sacerdótena wakára'ajeño, pheñawilana, kele i'imaño ajopana wa'até. Neká kulaño ajopana pajlákachina nemakáloje Jesús nakú: “Pu'uwaré la'ajeri riká”, ke, nenókalaje riká richona penaje. ⁶⁰E'iyonaja unká nephátala na pura'akajo rinakojé. Kajrú ajopana ina'ukena iphaka rejé rinaku pajlaje mapeja. Kaja ewaja iyamá nanakiyana kemaño rinaku:

⁶¹—Marí ina'uké kemari: “Nukajya'atajla Tupana ñakaré, rejomi weji ke kala i'imajemi nula'ajla piño riká rapumí chuwa”, ke —ke nemaká najló.

⁶²Ilé kaje aú sacerdótena wakára'ajeri tára'aro, rimá Jesusjlo: —¿Unká chi papiyákalaje pinakojó neká? ¿Meke chi kele nemá pinaku?

⁶³Unká Jesús a'ajipalá sacerdótena wakára'ajerijlo, raú rimá piño rijló:

—Tupana, ñakeja wani i'imajika puráka'alo aú numá pijló, pimakáloje nojló kewaka. Pimá wajló: ¿Piká chi kele Tupana wakára'akare majó ina'uké i'imatájeri penaje? ¿Tupana i'irí chi piká?

⁶⁴Raú Jesús kemari rijló:

—Ilé pimíchaka nunaku, keja nuká. Iká amájeño nuká Tupana awa'á. Piyuke la'aká Tupana. Rijwa'até nuwakára'aje ina'uké. Iká

amájeño nupa'akó piño majó je'echú chiyá juni juwáka'ala e'iyowá. Ina'uké i'imakáloje nupalamane penaje i'imaká nuká.

65 Ilé ke rimaká aú, richaje wani sacerdotena wakára'ajeri yúcha'ako kajrú. Akuwaná rijiy'o'tá ra'arumaká, rimá najló:

—Pu'uaré wani ilé ta pura'akó Tupana nakú. Unká na penaje kalé wakulá ajopana, nemakáloje wajló mékeka rila'aká pu'uaré. ¡Kaja wemi'ichá mékeka rimíchaka ta pu'uaré wani Tupana nakú! **66** ¿Meke ijló riká?

Nemá rijló:

—Piwakára'a rinókana ilé kaje pachá.

67 E nathupá nawi rijimá chojé. Naña'atá riká. Ajopana ña'ataño kaja riká pajimaya. **68** Nemá rijló:

—Riká Tupana wakára'akare majó ina'uké i'imatájeri penaje pi'imajika ee, pimá wajló na i'ichari piká pajimaya —ke nala'aká namákaja riká.

Pedro micho'otaka Jesús chaya yukuna marí

(Mc 14.66-72; Lc 22.56-62; Jn 18.15-18, 25-27)

69 Ilé ke nala'aká Jesús ketana, Pedro i'imaká waka'apé yá'akajo nakú. E apa'awelo i'ijnayo rawa'ajé. Pají chiyá jápajeyo ru'umaká, rumá rijló:

—Nuwe'epí ilé Jesús, Galilea eyaje, wa'ateje piká.

70 E'iyonaja Pedro micho'otari richayo, rimá rojló ajopana e'iyá:

—Unká wani ta nuwe'epila na nakuka pipura'ó nujwa'até.

71 E ra'apá ají ke rinumaná ejo. Re apa'awelo amayo piño riká, raú rumá najló.

—Ilé chira'akero kaja Jesús, Nazaret eyaje wa'até.

72 Ñaké kaja Pedro micho'otaka piño richayo.

—Tupana we'epiri kewaka numaká. ¡Unká wani ta nomána'apa kalé kele imá nakú nojló!

73 Meketánaja i'imajemi ajopana iphaño rawa'ajé, nemá rijló:

—Rijwa'atéjena nakiyana piká. ¡Pa! Napura'akó rite'eré ewá, ke kaja pipura'akó.

74 Ilé kaje aú rimá najló:

—Nuwata Tupana wajaka nuká, unkájika ee numá kewaka ijló. ¡Unká wani nomána'apa kalé riká ta!

Rejéchami kapere yaka'aká. **75** Raú riphá Pedro pechu nakoje mékeka Jesús kemaká rijló maapami ke i'imaká: “Unká chiyó kapere yaka'á, kaja weji pe cha pimicho'otájika nuchaya ke”. Rema'aká aú kapere yaka'aká, rácho'o reyá. Jupejeno riyaka.

Nawá'aka Jesús Pilato ejo yukuna marí

(Mc 15.1; Lc 23.1-2; Jn 18.28-32)

27 ¹E kaja najme'etá. Sacerdótena wakára'ajeño, ajopana pheñawilana wa'até, pechu i'imari rejenowaja Jesús nókana nakú. ²E nepo'otá ra'anapitá panakojéchaka. Nawa'a riká nawakára'ajeri Poncio Pilato ejo.

Judas noka rikó yukuna marí

³Maapami ke Judas a'aká ripinánajlo Jesús i'imaká. Ramaka aú nawátaka rinókana, chapú riwó i'imaká richó. E ri'ijná liñeru pa'ataje najló, maapami ke na'akare rijló riwá'akaloje neká Jesús i'imaká ejo wemí. Riphaka sacerdótena wakára'ajeño, pheñawilana, keke nakú ee, ⁴rimá najló:

—Marí liñeru, unká wani paala nuli'ichaka riká. Unká la'alá pu'uwaré keke, e'iyonaja iwata rinókana. Chapú wani nuli'ichaka riká ijlo ra'akana aú —ke Judas kemaká najló.

Raú nemá rijló:

—Pijloja kalé chapú riká. Wajló unká ñaké kalé.

⁵Raú rika'á liñeru Tupana ñakaré chojé. Rejomí ra'apá reyá rinókaloje rikó penaje. Rakúwa'ata rikó rinúrupi nakiyá. Ilé ke Judas michú noka rikó i'imaká.

⁶Sacerdótena wakára'ajeño wayo'oño riliñérutemi rika'akare Tupana ñakaré chojé. E nemá:

—Ina'uké nókana wemí kari. Chapú wala'akajla, walamá'atakela ra'akuná chojé riká marí Tupana ñakaré chu.

⁷Raú napura'ó pajwa'atéchaka rinaku mékeka rila'akana nakú. Ñaké i'imakale nawarúwa'a támijimina ja'akelana pukuna raú, naja'akáloje ajopana te'eré eyájena tami rejé. Pajluwaja pukapé ipújeri le'ejé ri'imaká. Riká liyá nawarúwa'a te'erí rapukuna penaje.

⁸Maárejecha nemá rapukuna nakú: “Jirá Pukuna riká”, ke. ⁹Tupana puráka'alo ja'apátajeri Jeremías michú kemaká júpimi ke nala'aká. Marí ke rilana'aká riyukuna i'imaká: “Israel lakénami nakiyana a'ajeño apujlo treinta monedas, ra'akáloje najló riká riwemí penaje. ¹⁰Riwemí aú nawarúwa'aje pukunaji pajluwaja pukapé ipújeri liyá. Tupana Pechu kemaká nojló ke nala'ajika”, ke rilana'aká riyukuna i'imaká.

Jesús tára'ako Pilato jimaje yukuna marí

(Mc 15.2-5; Lc 23.3-5; Jn 18.33-38)

¹¹E kaja nawa'a Jesús nate'eré eyá wakára'ajeri ejo. Rimá Jesusjlo: —¿Judíona i'imakana chi piká?

Jesús kemari rijló:

—A'a, pimaká nunaku keja nuká.

¹²E sacerdotena wakára'ajeño, pheñawilana wa'até kemaño Jesús nakú Pilátujo na pachaka nawátaka rinókana, e'iyonaja unká Jesús apiyákala neká. ¹³Raú rimá Jesusjlo:

—¿Unká chi pema'alá mékeka nemaká pinaku: “Pu'uwaré la'ajeri riká”, ke?

¹⁴E'iyonaja unká ra'ajipalá rijló, raú nawakára'ajeri pechu i'imá: “¿Na ta chi kaji numajlo?” Raú unká méño'ojo riwe'epila mékeka rila'akana.

Nemá Jesús nakú nenókaloje riká penaje. Riyukuna marí

(Mc 15.6-20; Lc 23.13-25; Jn 18.38--19.16)

¹⁵Fiesta Pascua wakajé keja Pilato jácho'otajikano ina'uké wajákelana chiyá pajluwaja ina'uké. Riká, nawátajikare jácho'otakana, rácho'otake najló. ¹⁶Riwakajé Barrabás i'imari ina'uké wajákelana chu. Piyuke ina'uké amána'apa ri'imaká.

¹⁷Kaja nawakó i'imaká, raú Pilato kemari najló:

—¿Mékaje chi iwata nócho'otaka ijló: Barrabás ka'ajná, Jesús ka'ajná? Riká nemakare nakú: “Tupana wakára'akare majó”, ke, ¿riká chi nócho'otaje ijló?

¹⁸Ilé ke rimaká najló, riwe'epíkale chapú nawó i'imaká Jesús cha. Kajrú ina'ukena pechu i'imaká Jesús nakú palá. Riká jimaje chapú nawakára'ajeño wo i'imaká richá, richá'atakale neká ripechu aú. Ñaké i'imakale nawa'a ri'imaká rejo riwakára'akaloje rinókana penaje. ¹⁹Re Pilato yá'aro rimakáloje najló mékeka rila'akana. E puráka'aloji, riyajalo wakára'akare rijló, kemari: “Pácho'ota ilé Jesús, reja ri'imareja, unká la'alá meke riká ina'uké. Lapí nutapúni'icha riká, kajrú wani nukawíli'ichako raú”, ke puráka'aloji kemaká riyajalo wakára'akare rijló.

²⁰Kaja Pilato kemá najló i'imaká: “¿Mékaje chi iwata nócho'otaka ijló: Jesús ka'ajná, Barrabás ka'ajná?” Raú sacerdotena wakára'ajeño, pheñawilana wa'até, ka'átaño kajrú ina'ukena e'iyajé nemakáloje rijló: “Pácho'ota wajló Barrabás; piwakára'a Jesús nókana”. ²¹E ne'emakana kemari piño najló:

—Chuwata, imá nojló mékajeka iwata nócho'otaka ijló.

Nemá rijló:

—Pácho'ota wajló Barrabás.

²²Rimá najló:

—¿Eta meke chi nula'ajika Jesús, riká nemakare nakú Tupana wakára'akare majó?

Nemá rijló:

—Piwakára'a riphakana a'awaná apiyákakanami nakojé.

²³Raú Pilato kemari najló:

—¿Naje chi iwata rinókana? ¿Na chi rila'á pu'uaré?

Raú nawíyo'o piño rijló:

—¡Piwakára'a rinókana!

²⁴Pilato we'epiri unká nawátala Jesús jácho'otakana. Ramá kaja nayúcha'ako wani rijimaje, raú riwakára'a najña'aká rijló juni pachiya chojé. Najimaje ripá riyáthe'ela chiyá, nawe'epíkaloje raú unká riká kalé wakára'aka rinókana. Rimá najló:

—Unká nuwakára'alaje ilé unká la'alá pu'uaré nókana. Ila'á riká ipechu nakú ri'imajika ke.

²⁵Raú piyukeja nemaká rijló:

—Weká, wayani wa'até, a'ajeño wanakajó rinókana.

²⁶Ilé kaje aú Pilato jácho'otari najló Barrabás. Rejomi riwakára'a naña'ataka Jesús. E riyurí najló riká nenókaloje riká penaje.

²⁷Rejomi suráana wá'año Jesús nawakára'ajeri ñakaré ejo. Re nawakata suráana re i'imakaño piyuke Jesús awa'ajé. ²⁸E naka'á ra'arumaká rinakiyá, nala'akáloje riká namákaja penaje. Na'á rinaku ipiralukuni a'arumakaji, nawakára'ajeñoja kalé a'ajíkare nakuwá. ²⁹Nachipúka'ata kaja riwíla'aru nakojé tujripi. Na'á kaja ijijila ina ka'añá riyáthe'ela chojó pitá rikutiware penaje. Rejomi natára'o ne'erúpachi aú rijimaje. Namákaja nala'aká riká, nemá rijló:

—Judíona i'imakana, ¿piká?

³⁰Nathupá nawi rijimá chojé, e najña'á ijijila ina rikápiya, naña'akáloje riká phewíla'aruya raú. ³¹Kaja ewaja nayurí rila'akana namákaja. Naka'á a'arumakaji ipiralukuni rinakiyá, na'á piño rinaku apú ra'arumaká. Rejomi nawa'a riká nenókaloje riká.

Nephátaka Jesús a'awaná apiyákakanami nakojé yukuna marí

(Mc 15.21-32; Lc 23.26-43; Jn 19.17-27)

³²A'awaná apiyákakanami riwakúla'apa ke Jesús ja'apaka najwa'até. Nácho'oko pajimila e'iyayá ee, nephata pajluwa ina'uké. Cirene eyaje ri'imaká; Simón rií i'imaká. Riká nawakára'a wáko'oka a'awaná apiyákakanami Jesús ápumichu.

³³Ne'ejná ají ke Gólgota ejo. “Ina'uké wíla'arumi aphinami”, ke na'ajika rií napura'akó chu, ñaké ramákana i'imakale. Rejé nephá.

34 Re na'á Jesusjlo i'irakaje, kajmú kaje jalá amúra'atakanami, kechípa'akeja nakaje jalá ipijini wa'até. Jesús atá'ari riká, unká ri'iralá riká.

35 E nephá riká itapuwa aú. Rejomi suráana kátaño nakaje nakú, namákaloje mékeka natamáka'atajika najluwa ra'arumakami. Tupana puráka'alo ja'apátajeri michú kemaká rinaku, ke nala'aká raú. Júpimi rimá i'imaká: “Natamáka'atakaloje najluwa no'orumakami penaje nakátajo nakaje nakú, raú nawe'epíkaloje nájloka no'orumakami yuríjiko”, ke rimaká rinaku i'imaká. **36** Re natamáka'ata najluwa ra'arumakami rinaku i'imakare, rejomi naya'o. **37** E nephá lana'akéjami Jesús cha. Riká kemari na pachaka nenoka riká. Nalana'akare kemari rinaku: “Marí Jesús, judíona i'imakana riká”.

38 Nephá kaja Jesús awa'ajé iyamá jata'akáchina iyáma'ajo pitá ke. **39** Rawa'ayá ja'apájikaño la'akeño namákaja riká. Nañaka'aké newíla'aru rijló. **40** Nemá rijló:

—Piká kemakeri pinakuwá: “Nukajya'atajla Tupana ñakaré, eyá weji ke kala i'imajémija nula'ajla piño rapumí chuwá riká”, ke. Chuwa pi'imatá pikó. Tupana i'irí pi'imajika ee, piwitúka'a a'awaná apiyákakanami nakiyá.

41 Ñaké kaja ajopana la'aká namákaja riká. Sacerdótena wakára'ajeño, Tupana puráka'alo nakú jewíña'atajeño, fariséona, pheñawilana, kele ne'emaká, la'año kaja namákaja riká. Nemá rinaku pajlokaka:

42 —iMeke kalé ta ri'imataka ajopana kapichákajo liyá i'imaká, eta, rikó unká méño'ojo ri'imatala! Israel lakénami wakára'ajeri ri'imajika ee, riwitúka'aje a'awaná apiyákakanami nakiyá. Ilé ke wamájika ee rila'aká, wema'ajé ra'apiyá. **43** Kaphí Tupana chojé péchuri riká. Tupana wátakare ri'imakela, Tupana i'imatajla riká, rimakale rinakuwá: “Tupana i'irí nuká”, ke.

44 Jata'akáchina, nephákarena Jesús awa'á, pura'año kaja rinaku pu'umaré.

Jesús taka'aká yukuna marí

(Mc 15.33-41; Lc 23.44-49; Jn 19.28-30)

45 E kaja lapí ke i'imari nachá piyuke eja'awá chu. Kaápu'uku eyá pe'iyochami kamú to'okó ketana ne'emaká kalajerúwaka.

46 Pe'iyochami kamú to'okó ee, Jesús awíyo'ori kaphí wani. Napura'akó chu rimá:

—Elí, Elí, ¿lamá sabactani?

“Tupana, nupechu i'imakare chojé kaphí, ¿na penaje piyurí nuká?”, ke kemakana ri'imaká napura'akó chu.

⁴⁷Re i'imakaño nakiyana jema'año rawíyo'oka, raú nemá:

—Ilé, chuwa riwá'aka Tupana puráka'alo ja'apátajeri Elías michujlo.

⁴⁸Raú pajluwaja nanakiyana jecho'ótari i'irakaje rijló. Rejata nakaje jamára'apani kajmú kaje jalá amúra'atakanami jakú. Kéchami repo'oká ijijila lupukú nakojé riká. Riká aú ra'á rijló riká ri'irakáloje re'iyayá riká penaje. ⁴⁹Raú ajopana kemaño rijló:

—Reja ri'imareja. Wamáijla, apala Elías michú iphaje majó ri'imataje.

⁵⁰Jesús awíyo'ori piño kaphí wani kaja penaje, ejé ritaka'á.

⁵¹Wa'ató ke ya'ajná Tupana ñakaré chu a'arumakaji akúwa'akaro jiyo'okó pe'iyowá paliyáaka. Apa'alá ukapú ke penaje rakúwa'ako re. Rijiyó'ó yenuya ají ke kawakaje. Kaja iyamá ke riyuriko. Ritaka'aká ejéchami te'erí ñaka'akó, raú kaja jipa



kajruni e'echataro paliyáaka. ⁵²⁻⁵³Raú támijimina to'otákelana chiyá támijimina chaya me'etátaro. Riwakajé Tupana makápo'otari kajrú ina'ukena júpimi ke taka'akaño. Kaphí péchuruna Tupana chojé ne'emaká. Jesucristo makápo'oko piño ejomi, ne'ejná Jerusalén, Tupana le'ejé pajimila ejo. Kaja pu'uwaká nachira'akó rewá. Kajrú ina'ukena amaka nachira'akó rewá i'imaká.

⁵⁴Ritaka'aká apukuna e suráana wakára'ajeri i'imari ajopana suráana wa'até. Jesús wa'aphé i'imakaño ne'emaká. Ritaka'aká ejéchami namaka te'erí ñaka'akó, jipa e'echataro kaja. Ilé kaje aú kajrú wani nakero'okó, nemá pajlokaka:

—Tupana i'irí jo'ó kele taki'ichari.

⁵⁵Kajrú inaana i'imaká a'ajnare ke. Jukáyaja nayaka'o rejo. Neká i'ijnakeño Galilea eyá ají ke Jerusalén ejo Jesús wa'até i'imajika. Riñathé a'ajeño ne'emaká riwakajé i'imaká. ⁵⁶Re María Magdalena i'imayo najwa'até; apa'awelo María i'imayo kaja najwa'até. Santiago, Juan, kele jaló, i'imayo kaja najwa'até re.

⁵⁷E kaja najúwa'a. E José i'ijnari Pilato amaje. Kajrú le'ejepelari José i'imaká; Arimatea eyaje ri'imaká; Jesús ja'apiyá jema'ajeri kaja ri'imaká. ⁵⁸Riká i'ijnari Pilato ejo rikejá'akaloje Jesús tami riliyá penaje. E Pilato yuriri rijló ritami. ⁵⁹Raú ripa'ó ritami witúka'ataje. Riwitúka'ataka ritami ejomi, riphila'á palá nojé a'arumakaji ritami nakojé. ⁶⁰Támijimi to'otákelana chojé ri'ijnatá ritami. Wajé ichákanami jipa pana ri'imaká. Rijluwa riwakára'a richákana i'imaká. Riká chojé rito'otá Jesús tami. Kaja penaje netá kajruni jipa aú rinumaná. Rejomi ripa'ó.^k ⁶¹A'ajnare ke riloko'opani María Magdalena, apa'awelo María, kele yá'año.

Jesús tami wa'aphé i'imakaño yukuna marí

⁶²Kaja a'ajnejí lámá'atakana wakajé jená ja'apari. Muní ke sacerdotena wakára'ajeño, fariséona, kele i'ijnaká Pilato amaje.

⁶³Nemá rijló:

—Riphicha wapechu nakojé mékeka ilé pajlákachi ta kemaká rinakuwá. Kajmuni ri'imaká wakajé rimá: “Nenoje nuká, eyá weji ke kala i'imajemi numakápo'ojo piño nopumí chuwá”, ke.

⁶⁴Nakele piwakára'a suráana rejo, ne'emakáloje ritami wa'aphé weji ke kala ketana, ra'apiyatéjenami i'ijnaká piyá ritami jata'ajé. Nata'akela ritami, kaja nemajla rinaku: “Kaja rimakápo'o piño”, ke. Ilé ke nala'akela, napajlákare yukuna jema'ojla kajrú wani — ke nemaká Pilátojlo.

⁶⁵Raú rimá najló:

—I'ijná rejo. Ileruna suráana nakiyana i'ijnajeño ijwa'até, ne'emakáloje riwa'aphena penaje, ajopana mujlúka'aka piyá rejo.

k 27:60 “Sepulcro, tumba”, támijimi to'otákelana; apala jipa pana kaje chojé nato'otákare támijimi.

66 Raú ne'ejná rejo. Nachúta'a inimú jipa netakare rinumaná nakoje, raú nawe'epíkaloje apú kawitaka riká ka'ajná, rimujlúka'akaloje richojé rimicho'ojnoja penaje. Kaja penaje nayurí kajrú suráana re riwa'aphé i'imakaño penaje.

Jesús makápo'oko piño yukuna marí

(Mc 16.1-8; Lc 24.1-12; Jn 20.1-10)

28 ¹Kaja watána'akaje i'imaká wakajé ja'apá. Muní ke najme'etaka. Jápakaje keño'okó wakajé ri'imaká. E María Magdalena, apa'awelo María wa'até, i'ijnaño piño támijimi to'otákelana ejo. ²Mana'í chiyó kaphí wani te'erí ñaka'akó na'apiyá. Re'iyowá ke pajluwa Tupana wa'atéjeri witúka'aka je'echú chiyá jipa jatataje rinumaná eyá. Ratatá jipa reyá, rejomi riya'o rinaku. ³Mejáma'atani ke ramako, pichaní kamaré ke. Jaré nojé wani ra'arumaká i'imaká. ⁴Ilé ke suráana, támijimi wa'aphé i'imakaño, amaka aú kajrú wani nakero'okó. Kajrú kaja nakurúkaka raú. Matámiru keja nato'okó te'erí e'iyá re.

⁵E inaana iphaño rejo. E Tupana wa'atéjeri, je'echú chiyaje, kemari najló:

—Ikero'oniño. Nuwe'epí i'ijichaka majó Jesús tami amaje, riká nephákare a'awaná apiyákakanami nakoje i'imaká. ⁶Unká ri'imalá maare, kaja rimakápo'ocho. Rimaká rinakuwá i'imaká keja rimakápo'ochako. Imujlúka'a majó, amachi rapukúnami.

⁷E rimá piño najló:

—Chuwa ipa'ó kiñaja, i'imichá ra'apiyatéjenajlo: “Kaja rimakápo'ocho. Kaja ri'ijichá natukumá Galilea ejo rawakákolaje re najwa'até penaje”.

⁸Raú inaana jácho'oño reyá kero'okajo nakú. Wa'ató ke pu'ují napechu i'imaká raú. Necho'ó ají ke riyukuna i'imajé ra'apiyatéjenajlo.

⁹E napunana chu Jesús ya'ataro najló. Rajalaka



neká, raú ne'ejná rawa'ajé. Pu'ují napechu i'imaká rinaku aú, najláma'o ri'imá nakojé. Namawílo'o riká ritajné nakiyá. ¹⁰Rimá najló:

—Ikero'oniño. I'ijná, i'imichá nuyukuna nojénajlo. Imicha najló ne'ejnakáloje Galilea ejo. Re namaje nuká.

Mékeka suráana kemaká najló yukuna marí

¹¹Kaja inaana i'ijná riyukuna i'imajé ajopánajlo. A'apona ke suráana, riwa'aphé i'imakaño, i'ijnaká pajimila ejo riyukuna i'imajé sacerdotena wakára'ajeñojlo. ¹²Riyukuna jema'akana aú sacerdotena wakára'ajeño i'ijnaño pheñawilana wa'até rinaku pura'ajó. Panakojéchaka ke napechu i'imaká mékeka nala'ajika nakú. Eyá na'á suráanajlo kajrú liñeru, ne'emaká piyá riyukuna ajopánajlo. ¹³E nemá suráanajlo:

—Marí ke imájika ajopánajlo: “Lapí wakamátako cháyomi, ra'apiyatéjenami iphaño ritami jata'ajé”. ¹⁴Iwakára'ajeri jema'ajika ee riyukuna, weká pura'ajeño ichaya, riwátajika ee iwajákana, unká pachá i'imalá riwa'aphé palá —ke sacerdotena wakára'ajeño kemaká najló.

¹⁵E na'á najló liñeru. Rejomi nawakára'aka ne'emaká riyukuna, ke ne'emaká riyukuna reyá a'ajná ño'ojó. “Ra'apiyatéjena jata'año ritami”, ke nemájika rinaku. Eyá maárejecha ñakeja riyukuna. Re jo'ó kaja judíona nakiyana kemaño ñaké rinaku.

Jesús a'aká ra'apiyatéjenajlo ripuráka'alo na'apátakaloje riyukuna penaje, yukuna marí

(Mc 16.14-18; Lc 24.36-49; Jn 20.19-23)

¹⁶Kaja ra'apiyatéjena jema'á rimakápo'oko yukuna, raú ne'ejná Galilea ejo, yenuri Jesús kemakare nakú najló i'imaká, ejo. Pajluwaja iphata ji'imaji nakojé kele (11) ne'emaká. ¹⁷E nephá Jesús nakú. Pu'ují kaje aú ne'ejnataka napéchuwa rinaku ramákana aú. Ne'iyajena pechu i'imari: “¿Riká wani chi riká, apú ka'ajná?” ¹⁸E Jesús i'ijnari nawa'ajé, rimá najló:

—Kaja Tupana a'á nuká piyuke marí eja'awá chu i'imakaño wakára'ajeri penaje, eyá je'echú chu i'imakaño wakára'ajeri wa'até, penaje ra'á nuká. ¹⁹Ñakele numá ijló: Eko i'ijná ajopana te'eré ejo, ajopana te'eré ejo ke, nupuráka'alo ja'apátakana nakú piyukeja ina'ukénajlo rewá. Raú ne'iyajena jema'ajeño no'opiyá, ne'emakáloje nujwa'atéjena penaje. Re Nora'apá Tupana, eyá nuká Ri'irí, eyá Tupana Pechu, kele. Kele ja'apiyá ne'emajika ee, ila'ajé

bautizar neká. **20** Jewíña'ataje kaja neká na'akáloje nupuráka'alo nanakojó piyukeja penaje. Ńakeja nu'umajika ijwa'até, unká nuyurílaje ikó iká —ke Jesús kemaká najló.

Maárejeja riyukuna San Mateo lana'akare i'imaká.